

040

23

八米
刀大



調 廣東巡撫江西巡撫臣李鴻鏡跪 奏為查明總兵大員被參各節據實覆陳仰祈 聖鑒事竊臣

於 緒二十八年六月初三日承准軍機大臣字寄光緒二十八年五月二十八日奉 上諭有人奏署江

西兩鎮總兵申道發貪婪猥欺鄙冒功並有縱容子弟濫混列保尅扣軍餉情事等語著李興銳按

照所指各節確切查明據實參奏毋稍徇隱原片著鈔給閱看將此諭令知之欽此欽遵寄情前來臣查

署南鎮鎮篆本任廣東雷瓊鎮總兵申道發在江帶兵垂二十年勤仔撫臣以其起自軍外貌似有勇

敢之氣間遇小隙跳梁委令辦不無僥倖成功荐任專閫嗣因職位既崇兵權日重遂乃驕滋日甚臣

前此到任聞其劣迹多 即將所部營伍陸續汰汰原冀加之抑制擇尤檢束勉 良將乃諺鎮氣質未

化可以位任闡寄益復遇事任性於 奏定軍制應辦事件動多抗拒臣因函商督臣劉坤一檄委記名

提督金德恒 往接署鎮篆臣亦委留工補用道王芝祥馳往接統其續備勇軍一面於五月二十日拜

摺請 旨予以開缺隨於六月初七日奉 上諭李興銳奏參署江西南鎮鎮篆本任雷瓊鎮總兵申道發

所部營勇全不足額每遇出防到處騷擾自到任以來並復放縱任性不受調度等語現由整頓軍制之

時似此劣迹多端舉動驕恣僅予開缺 足蔽辜申道發著即行革職以肅軍律欽此並摺拜發後遵復

有人參奏奉 旨交臣查 遵即檄 藩司柯逢時委員馳 玉 萍鄉審加訪察茲據該藩司查明稟

復前來參以臣所見聞謹為我 聖主 一陳之如原參申道發貪贓畏鄙欺罔冒功光緒十三年雲邵

土匪王嗣隴一案尤為殘忍殺戮脅從至數 人殃及平民萍鄉舍恨切骨一節查光緒十三年贛州府

屬雲邵縣有土匪王嗣隴假冒 職被獲刑逃煽誘 勇 守中明土寨抗官掠民經前撫臣派營剿辦

京報輯要 卷二 八月廿九日中外日報附張

申道發首先進兵攻破土圍匪平事定是役譽之者其勇往直前毀之者即言其焚殺過甚事後曾經
署贛州府知府王之藩親往查明殲斃匪黨尙無可稽者九人兼可稽者十餘人緣該處鄉民恐被干連
譴莫如深故卒不能符其確數原參所報殺戮脅從至數百人實無如是之多又光緒十八年湖南醴陵
會匪起事匪首鄧海山潛至袁州府萍鄉縣境天 里嘯聚數千人謀逆申道發經前撫臣派往會同各
營直抵匪巢斃匪數百人餘衆乃散該處地形險固從前未被髮逆竄擾尙多温飽之家頗有議其良莠
不齊縱兵擾累者但該鄉民共處匪巢本難辨別且未經人告發並無確據可指雲都與萍鄉本屬隔府
原參以兩案叙爲一事自屬傳聞之誤又如原參二十六年浙江會匪吳癩頭丑糾合閩省土匪起事竄
至玉山該鎮帶兵防堵並未開仗捏報戰勝率請保獎沿途勒索鄉民致送牌傘一節查二十六年浙江
會匪吳癩頭丑糾合閩省土匪劉加幅起事申道發先派營官趙春廷馳往防堵繼經前撫臣松壽照會
該鎮親往督辦時則玉山竄匪業經營練擊退該鎮到後於三省交界之周村竹巖等處搜捕逸匪殲戮
頗聚適鄂皖等省票匪滋事該鎮奉調回省留營會防隨經廣豐縣緝獲匪首吳癩頭丑邊境始告肅清
事經奏報似非該鎮一人所能捏報邀功至商民致送地方官員牌傘久成陋習實該鎮不知例禁原參
申道發擁資百萬尅扣軍餉一節查申道發所部營勇全不足額臣前已指明奏參然謂其因尅扣軍餉
擁資百萬則未免言之太過竊見軍興以來武職大員坐擁厚資者往往縱情揮霍以之結納逢迎不旋
踵而復散盡尅扣之術彌工則揮霍之情愈甚人徒見其慾壑之難滿而不知其貪囊亦易頓申道發平
日豪放自由必無能積至百萬之理聞其本籍田業僅有租穀數百石若任所資財則更寥寥無幾似亦

不足深較又如原參申道發之孫申羣英目不識丁捐縣丞附於萍鄉案據保知縣其所統剛字營以其子申得貴申得福爲營官狼狽爲奸圖營畏懼一即查申羣英以捐納縣丞到江光緒二十年因拿獲會匪李正東案內保俟補缺後以知縣用遵例加補迨知縣班二十六年玉山剿匪案內復保俟補缺後以直隸州知州用並加四品銜該員履歷註明祖父追發而遠近傳說皆稱爲申道發義孫其生長蹤跡已近詭秘雖不至目不識丁而人品猥鄙實難勝兵社之任山東原參有名之申得貴已於二十六年正月二十五日病故尙有申得福一名係藍翎都司銜補用守備現在續備後軍充當營官臣已撤調旋省該員於萍鄉玉山各案皆未列保自無朦假冒功情事原參謂其狼狽爲奸亦查無實據以上各節皆按照原參確切查訪之實在情形也總而論之申道發在江多年情形已熟若能小心謹慎講求治軍之道未嘗一無可用乃輒敢放縱任性所部營伍既不足額辦理匪案又未能杜絕滋擾以致人言嘖嘖指摘叢生臣前此奏參各款核與言官論劾及現查情形大致相符前奏但請開缺業已奉旨即行革職合無仰懇天恩寬其一面免再議處出自逾格仁慈四品銜直隸州用候補知縣申羣英人亦猥鄙不堪造就相應請旨即行革職以肅官方至藍翎都司銜補用守備申得福既經撤差容俟隨時查看如有劣跡再行參辦是否有當謹繕摺具陳伏乞皇太后皇上聖鑒謹奏奉硃批著照所請該部知道欽此

頭品頂戴陝甘總督臣崧蕃甘肅新疆巡撫臣饒應祺跪奏爲新疆幅員遼闊開省十八年地闢民繁原設地方官太少遠轄難周擬請增改廳州縣五升三直隸州爲府以資治理合詞奏懇仰祈聖鑒事

竊維綏邊置吏因地以制宜增治建官隨時而盡善新疆爲古西域三十六國週迴二萬餘里前任督臣左宗棠於光緒四年克復全疆後奏請改建行省擬設郡縣頗多督臣譚鍾麟以地方新復議暫於南路喀什噶爾阿克蘇兩處各設巡道七城各設一官復經撫臣劉錦棠通籌全局會商具奏於東西地設喀喇沙爾直隸廳溫宿直隸州轄拜城縣庫車直隸州烏什直隸廳西四城設疏勒直隸州轄疏附縣英吉沙爾廳莎車直隸州轄葉城縣和闐直隸州轄于闐縣嗎喇巴什廳南八城建置既定始建省治於迪化城十一年簡放劉錦棠爲甘肅新疆巡撫調甘肅布政使魏光燾爲新疆布政使原設鎮迪道加按察使銜兼管全疆刑名驛傳事務奏請升迪化直隸州爲迪化府添設迪化縣爲附郭首縣餘仍舊升伊犁廳爲伊犁府增綏定寧遠兩縣添設庫爾喀喇烏蘇直隸廳精河直隸廳升塔城通判爲直隸廳同知裁霍爾柔斯巡檢改設分防通判計通省四道二府十二廳四直隸州十一縣其時種民多未復業地曠人稀所設地方官足資控制迄今已十有八年土戶客籍生齒日衆邊境安謐歲事屢豐關內漢回携眷來新疆就食承墾傭工經商者絡繹不絕土地開闢戶口日繁而原設州縣所轄或千餘里數百里撫字催科遠難親到不得不分派司事並用鄉約回目以助之而弊端歧出良懦之民多受其魚肉狡詐之民動肆其刁強牧令疏於防範率多撤任遇有命盜案件呈報勘驗往來動經彌月傷形腐變兇犯遠颺辦理實多爲難且府少而直隸廳州較多升調鼓舞之術有時而窮表率督察之權亦欠專重揆之今日形勢非增設廳縣升設郡守不足以宏治化而安邊氓查喀什噶爾道屬無知府惟三直隸州而疏勒州爲道首轄廣延一千一百餘里徵糧一萬八千餘石地富民繁五方雜處極關重要擬請改升爲府名曰疏

勒府原轄疏附縣徵糧一萬九千餘石兩處轄境均寬訟獄錢糧多難兼顧查有距府百八十里之排素
巴特當末路之衝居民繁廣歷駐防營彈壓不如添設縣治劃附近罕愛里克大莊轄之增設一縣其地
屬唐伽師城擬名曰伽師縣莎車直隸州袤延一千一百餘里地廣而腴近年新墾三十餘萬畝爲通省
之最英商醫集交涉尤繁擬請改升爲府名曰莎車府所轄葉城縣地亦膏腴且廣應劃府南之坡斯坎
再益以縣北之一肯蘇各莊增設一縣其水爲澤勒普善河擬名曰澤普縣又莎車西南七百四十里之
色勒庫爾爲坎巨提出入要路西踰阿克塔什又與英俄接壤年來駐紮防營營多交涉採運糧草開墾
地畝必需得人經理擬請設分防通判地爲古蒲犁國擬名曰蒲犁通判和闐直隸州廣延一千八百里
徵糧二萬五千餘石銀一千四百餘兩轄縣于闐徵糧八千三百餘石銀九千八百九十餘兩距縣四百
里之洛浦莊地廣民強擬劃西屬地糧增設一縣名曰洛浦縣瑪喇巴什直隸廳水利通判廣延八百里
徵糧九百石銀一千三百餘兩時與疏勒有爭收爭界之事擬請改廳爲知州歸疏勒府管轄庶無畛域
之分地爲古巴爾楚名曰巴楚州此擬西四城增設大略也阿克蘇道屬溫宿直隸州廣延一千五百里
徵糧一萬九百九十餘石銀六千八百餘兩地腴民富南疆要衝擬請升爲府曰溫宿府歸城巡檢距府
二十餘里巡檢職卑難資管轄擬請升爲縣曰溫宿縣距縣四百八十里之柯爾坪地遠民頑擬請增設
分防縣丞曰柯坪縣丞一員以資佐理焉者府南六百三十里布告爾分防巡檢地廣民多詞訟錢糧向
由該巡檢就近代理不如分設一縣以專責成其地爲古輪台擬名曰輪台縣新平縣轄境二千餘里光
緒二十四年臣以羅布淖爾撫輯纏回均已歸化安插甘回亦已就緒奏請改設一縣以資撫綏近因升

署該府現任阿克蘇道江遇璞與現署該府劉嘉德設法開通溝渠招民屯墾業已水利暢行足蔭地數十萬畝該縣令草創經營近且不違難再遠及距縣十餘站之卡克里克分防縣丞地小而腴轄境甚遠東接敦煌南通于闐爲邊隅衝要之區擬請升爲縣以便專意開墾地方經理民事其地爲古塔羌國卽名曰塔羌縣庫車直隸廳廣延八百里徵糧一萬餘石銀五千五百餘兩土性沃饒轄境遼闊擬請改爲州曰庫車直隸州州南一百八十里之沙雅爾民風強健地僻而寬先年開辦善後本局庫車分局不可無官鎮攝擬請添設一縣名曰沙雅縣仍歸庫車管轄此擬東四城增設大畧也至於北路原設廳縣尙多惟迪化府阜康縣屬濟木薩縣丞距縣二百五十里土地膏腴錢糧戶口較阜康爲多未便末大於本擬請升爲縣其底驛爲孚遠卽名曰孚遠縣吐魯番直隸廳同知廣延六百餘里徵糧一萬七千餘石銀二千一百餘兩距廳二百四十里關辰巡檢轄境甚遠物產頗饒爲東南路衝要擬請分割地糧改升爲縣地爲古鄯善國卽名曰鄯善縣仍歸廳轄濟木薩縣丞旣升爲縣昌吉所屬之呼圖壁巡檢向收錢糧應改爲縣丞以便升調以上計擬升設三府改一直隸州知州增一通判九縣兩縣丞並各縣擬增設一典史如此分地而理庶民事可就近經理地利亦可逐漸墾興邊防亦益增嚴密矣其升設之知府卽仿照焉耆府例仍舊徵收錢糧管理訟獄卽以該直隸州舊有之養廉移爲知府養廉直隸廳改直隸州與知州亦然其缺均優原准公費悉行裁減增設分設之縣卽以該州縣原有之公費移作養廉所升之府之州吏目卽改爲府經歷改直隸州之庫車照磨改州之瑪喇巴什廳照磨均改爲州吏目其餘有應添廉俸及縣丞典史俸薪書役工食修理衙署倉廩監獄經費擬仿照內地經徵錢糧例加收耗羨酌留動

支升增各州縣皆舊有驛站不過酌增數處不須多添驛費均暫從善後項下開支不另請款除原有防營照舊駐防外其無防營者由就近防營撥駐亦無須再添防兵此皆亟應變置之事就地可以籌辦因應祺自光緒十五年出塞宣藩察看地勢民情即擬變通辦理而未敢操切圖功歷經十四年悉心考察欲圖長治久安之策實無逾此亦何敢苟且遷延因循以廢吏治與臣藩再三往復函電交馳臣蓄查畿前設官甚少係因地廣人稀現在人稠地闢政務殷繁委屬鞭長難及增設邊縣實爲良圖亟應詳議入告於吏事邊事均有裨益所有酌擬增設郡縣情形據甘肅新疆布按兩司會議請奏前來謹會同伊犁將軍臣長庚署喀什噶爾提督臣谷振傑合詞恭摺具奏是否有當仰懇天恩俯念邊疆重要飭部議准照辦如蒙俞允即請飭鑄各府廳州縣印信並補刊焉耆府新平縣印信派員祇領頒發啓用以昭信守至各府廳州縣如何劃分地界勻撥錢糧及各應作何項缺分與一切未盡事宜容俟奉准部覆後再行陸續分別奏陳伏乞皇太后皇上聖鑒訓示遵行再此摺係臣應祺主稿合併聲明謹奏奉 硃批政務處會同該部議奏片併發欽此

甘肅新疆巡撫臣饒應祺跪 奏爲援案籲懇 特恩加定新疆鄉會中額以廣文教而育邊材恭摺仰祈 聖鑒事竊查科場條例鄉試定額肅州安西烏魯木齊等處另編隸右字號按科取中一名嘉慶二十三年奉 上諭鎮西府及迪化州遠處口外近年居繁民衍涵濡教澤應試人數日增祇因限於中額

向隅者衆著加恩將鎮西府迪化州屬鄉試士子另編隸中字號於陝甘兩省取中六十一名外另增廣一名用示賒加惠邊陲士子至意欽此後因陝甘分闈隸右字號歸入大號取中而烏魯木齊前合肅州

一名用示賒加惠邊陲士子至意欽此後因陝甘分闈隸右字號歸入大號取中而烏魯木齊前合肅州

安西取中者併入聿中每科仍止額中一名迄新疆設省照舊辦理臣前在蘭州道任戊子科派充提調聞正副考官僉云聿中佳卷頗多奈限於定額遺珠可惜及任新省藩專課試書院士子頗多可造之才於光緒十七年詳請奏加鄉會試中額前護撫臣魏光燾比卽咨商前督臣楊昌濬咨部核辦嗣准禮部覆應令督撫奏明辦理各等因前任交卸未及舉辦上年辛丑甘肅補行庚子恩科並辛丑正科合中舉額八十四名內第三名唐庶熙二十一名李俊之係廸化縣生員臣接正副考官函稱聿中佳卷甚夥其最優者已拔中前茅其餘額滿見遺者不少深堪歎惜臣查直隸承字號一名後廣二名且字號中額三名後加中一名福建至字號中額二名後加中一名皆因人文日盛量予增額新疆事同一律且遠在關外分省已十有八年額少人衆可否於聿中編號定額一名之外加中一二名出自逾格鴻慈再查新疆土著北準南回蒙番榛狉向不讀書讀書者無非外來客籍除鎮西入籍甚早且未殘破外其餘兵燹後地畝荒蕪學校廢弛地方官招徠陝西甘肅四川安徽湖南湖北直隸山西等省客民承墾納糧前督臣左宗棠奏定章程以領地納糧稅契之日扣足十年准其入籍應考故入學諸生半屬寄籍陝甘分闈後已歷十二科中式者十二人前因新疆無京官甘肅京官不相認識甘肅新中舉人恐佔會額不准出結覆試半皆勒令改回原籍後經前督臣楊昌濬奏請以督撫咨文代結暫准入場又經伊犁將軍臣長庚奏准停止改回原籍其已入籍者仍准一體會試而士子以遠道赴京不易且歷經阻抑仍多裹足不前至今尙無會試中式之人查福建至字號舉人會試到京果有十名禮部開單另請欽定中額一名兩廣總督張之洞以瓊州地方緊要援照奏懇於通省會試中額內撥中一名經部議覆瓊州久隸

廣東非新闢之地可比於中額內撥出一名應毋庸議新疆係新闢之省且向係另額取中興瓊州情形不同應請照福建至字號辦理惟前中舉人多已改回原籍現在會試人數未滿十名擬懇援照零數過半取中一名之例如赴京舉人果有五六名由禮部開單奏請 欽定於甘肅中額外另准新疆中額名仍憑文取中如無佳卷任缺毋濫庶既示嘉惠遠士之恩仍寓珍重科名之意合無仰懇 天恩俯允破格 特旨飭部立案以廣文教而育邊材臣無任籲懇祈禱之至謹會同陝甘總督臣崧蕃伊犁將軍臣長庚甘肅學政臣葉昌熾恭摺具奏伏乞 皇上聖鑒訓示施行謹 奏奉 硃批禮部議奏欽此

崧蕃等片 再迪化州原設學正一員前撫臣劉錦棠奏請改設各官摺內請升為府教授照舊兼管各縣學務俟將來學校大興再議添設此外惟鎮西應設有訓導一員亦兼管哈密學務餘均未設學官而於設立義餘堂挑選纏民俊秀子弟並漢回幼童入塾延請教讀並通事教以華語讀書作文久漸通曉光緒十二年劉錦棠奏請將塾童並講經書講解文藝者取作俊生俟學業有成再議設學官學額奉

旨允准欽遵辦理在案甘肅學政距新疆太遠不能按臨考試臣兩次照例代辦歲科考飭鎮迪廳縣並府學准各義塾纏回童之能文者附入學考錄送院臣當堂面試頗多清通之文密封試卷咨送學臣衡閱列榜取進除漢童外計取入各學纏生童十名回童三名足見種族中皆有聰穎可造之才有教無類其理相同查新疆四道惟鎮迪有學校餘均無學官學額茲既涵濡教澤人才日興自應增建學官以宏

聖朝異域同文之化擬請於伊犁府並溫宿疏勒政府後各裁義塾數堂即就其經費設立訓導各一員並各准學政額三名仿照迪化府教授鎮西廳訓導之例凡伊犁所屬各廳縣學務由伊犁訓導兼管

溫宿疎勒所屬各州廳縣學務中溫宿訓導疎勒訓導兼管各生童之讀書應考者平日歸其教誨臨考由其申送學校既立庶責成可專較之各義塾教讀皆遠方遊學之士不能專心訓課者固自有別而各義塾由該學官隨時考查亦藉以益臻專勤免致曠廢仰懇 天恩飭部議准以興文學而化夷風實爲鴻陲之幸謹附片具 奏伏乞 聖鑒訓示謹 奏奉 硃批覽欽此

宗人府府丞臣王培佑跪 奏爲議裁釐局預防流弊以遏亂萌專摺仰祈 聖鑒事竊七月二十六日奉 上諭商約一經定議即將各省局卡裁撤不再抽收釐金等因欽此仰見 聖謨高深具有權衡臣維抽收釐金助餉本一時權宜祇以積習相沿各省疆吏所恃爲騰挪彌補之術 劑屬員之資釐局實一大宗故莫肯建議裁撤今 朝廷洞燭弊端擬將一律相除議者以爲國用所需可取償於加稅惟各疆吏彌補劑之私計不知此後將何所取償若謂各省陋習從茲革除淨盡臣未敢深信變本加厲心竊憂之查當年抽釐之舉謂取諸民不若取諸商商連貨到卡有貨可抽無貨者不能抽也且增價售貨以取盈商無損若捐民戶則雖無別貨亦不得免且蚩蚩者將何術以償所失此商捐與民捐利害相懸之比較也是故釐雖叢弊行之數十年尙無大害向使派捐民戶而以厘局之弊行之其害必不可終日烏能相安以至於今耶今 國家賠款既鉅方議藉資民力倘各疆吏因失釐局之利競以資民力紓國難爲名恣意添設各項民捐等局師厘局無弊之故智以濟其彌補調劑之私貽害何堪設想我朝深仁厚澤二百餘年際此時雖使各出財力以紓 宸廑此民心之所甘也使罄財力以便猾吏之私圖飽蠹吏之貪橐此民心之所必不甘也大亂初平民氣未靖生計復蹙民不甘則將起而與官吏爲難

而其禍卒中於 國家不待智者而後知矣恭讀此次 諭旨以局卡辦理未善弊端百出久擬一概廓清 天心至仁聞者感激第念釐雖病商極其弊不過不樂爲商若改增各項民捐等局窮其弊且將不樂爲民不樂爲商猶可別謀生業至不樂爲民而其禍尙忍言耶伏惟 聖朝軫念民艱無微不至若任各疆吏變本加厲致令我 皇太后 皇上恤商之美意竟轉爲厲民之虐政是恤商僅得虛名而厲民反受實禍臣竊痛之夫今日需欸雖多如果激發天良綜核名實一空積弊並不煩於正供而外另立捐條此等情形當早在 聖明洞鑒敢祈預行 飭下各省疆臣仰體 皇仁將來裁釐以後毋輒巧立名目增置局員以償其私卽萬不得已而間設公局當奏明立案嚴行察核毋得徂厘局商捐之弊端轉而施之於民以速亂而誤國民生幸甚大局幸甚臣爲預防流弊起見是否有當伏乞 皇太后 皇上聖鑒謹 奏奉 旨一道欽此

宗人府府丞王培佑片 再加稅免釐一事中外大局攸關 朝廷詳慎權衡實因除弊興利一舉兩得竊惟 宣示中外對臣民言之揭其弊足見 聖主惻怛之誠對各國言之明其利可無商約參差之慮恭讀七月二十六日 諭旨釐局辦理不善之弊業已摘發無遺擬請將加稅利益重中 異命俾共知釐爲國用所關因加稅利益校大始行議免則免釐之期自當以加稅之日爲準庶各國商約易歸畫一卽各省商民亦不至誤會 諭旨致啓紛紜矣臣愚昧之見謹附片具陳伏乞 聖鑒謹 奏奉 旨欽此

內閣學士兼禮部侍郎銜四川學政臣吳郁生跪 奏爲請修政治專書以裨實學事竊臣伏見 朝廷

變通科舉以政治策論試士又飭翰林院各官分課政治之學聖主造就人才實事求是欽佩莫名
臣維經世之學不通乎古則無體不通乎今則無用通今者知朝廷立法之本原尤宜知近日通行之
事例國家大經大法備於乾隆一朝至今百數十年而戶部之錢法丁漕茶鹽兵部之軍制邊防工部
之河渠諸大政事勢遷流章程增易既非國初之舊即考之道咸兩朝而已多通變矣夫此百數十年
之間聖訓諭旨河王之奏議有事之定章纂入會典則例者不過撮其綱要至其事之本末則京外
各衙門之案牘薈萃而加詳焉至關局稅釐之則交涉通商之務皆先時所無今惟通商條約有專書而
交涉之案闕焉不詳此皆國家之要政乃今昔不同各省又不同當官者非遇事而稽案牘不能通其
曲折況乎旁觀坐論或得之傳聞而原委未曉或徵之故事而陳迹已非何怪迂闊之說多不近於事情
鹵莽之談欲盡吏夫咸法哉臣愚以為培才之要學者宜為政治之實學朝廷宜修政治之專書惟是
設館修書既糜經費且無暇日不如即由各衙門分類編輯如交涉通商修之外部錢法丁漕鹽茶釐稅
修之戶部軍防河渠修之兵部工部請旨飭下各衙門設立修書局一所選派司官數員飭下掌院
學士選派翰林官數員分赴修書處各認一門會同編輯仿賦役全書鹽法志之例各自為書限一二年
陸續修成在事人員編輯以資學問長官即藉為考察之方不得圖開保舉另請經費書成進呈欽定
命名刊頒各省官司用以課吏學堂用以課士雖在邊陲僻壤觀斯完書亦藉知我朝之政典與近今
之事例庶幾仕者學者考核各有專詣經濟不為迂談加以閱試諸政事異時必有通達之材出其中矣
所有請修政治專書以裨實學事宜臣愚昧之見是否有當伏乞皇太后皇上聖鑒謹奏奉 硃

前並不干遊小酌入式部部運魚亦不陸原實監程國典業
來頭十餘年不取香粉並大因何對出被藥則眼督堂賦題小
聖主令未發善前大令對山陸來

批政務處議奏欽此

劉坤一片 再准軍機大臣字寄光緒二十八年五月十四日奉 上諭有人奏淮北鹽務向歸運判辦

理監掣同知一缺久成虛設請旨裁撤等語著劉坤一確切查明據實具奏原片著鈔給閱看將此諭令知之欽此遵 旨寄信前來並鈔原片等因當經轉飭欽遵確切查明據實詳辦去後茲據兩淮鹽運使

程儀洛稟稱伏查淮北監掣同知一缺向管北鹽掣運事宜自淮北改票後一切場壩捆連各事責成海州分司經理監掣同知僅有會辦之名並無掣驗之實自應遵照裁撤其所屬之烏沙河巡檢一缺情事

相同應請一併裁汰又淮北永豐壩監掣淮南白塔河巡檢兩缺改辦票鹽以來均無專責應辦事宜當此澄叙官方之際擬請均予裁撤等情臣覆查無異相應 奏明請 旨准將淮北監掣同知一缺查照

原片裁撤並將無關緊要之烏沙河白塔河巡檢兩缺及淮北永豐壩差缺一併全裁以省冗濫惟以上請裁各缺係准北監掣之員現查淮南尚有監掣同知一缺應請歸於裁缺即補班內序補至巡檢一項

兩淮祇有烏沙河白塔河二缺既經一律裁去所有裁出之二員暨候補巡檢中之堪以補缺者此後均無缺可補未免向隅應如何改歸有缺省分補用或改補地方巡典之處除咨商部臣核辦外理合會同

江蘇撫臣恩壽附片具陳伏乞 聖鑒訓示謹 奏奉 硃批吏部知道欽此

頭品頂戴兩廣總督臣陶模頭品頂戴廣東巡撫臣德壽跪 奏為靈濼驟漲沖決基圍廣肇兩府屬被災甚重現已分別賑撫並擬援例請開賑捐恭摺仰祈 聖鑒事竊本年入夏以後雨水過多粵東東西

北各江水勢驟漲廣州肇慶兩府屬基圍適為其衝先經委員會同地方文武嚴加查勘防護迭據稟報

四會縣屬之豐樂園高明縣屬之大沙圍高要縣屬之白渚盤塘香山赤塘等圍南海縣屬之荻洲良安等圍均於六月十三十五等日先後被沖決口其豐樂園界連三水高要四會三縣受累最重居民十數萬田廬牲畜盡被漂沒傷斃人口甚多尙難查點確數當卽電飭在就近稅釐各廠提銀數千兩並催辦糧米多僱船隻逐鄉拯救散賑一面委員廣東布政使丁體常急籌賑款親往災區查勘撫卹現據詳稱先從被災較重之豐樂園和履踏勘該圍分隸高要三水四會三縣爲西北第一大圍此次在四會縣境上名大沙墟尾決口寬三十三丈深四丈一尺該處居民一萬餘人淹斃將及百人其受災較輕之處居民亦不下萬人淹斃較少次及高明縣屬之大沙圍沖決三十二丈沿小沂流而上至高要縣屬查勘白渚圍沖決二十丈零盤塘圍沖決一十四丈香山圍沖決亦一十四丈赤塘圍沖決一十二丈泰和榕村圍沖決十餘丈迴龍沙上圍沖決十餘丈大陳屋基沖決三十餘丈復查南海縣屬之荻洲良安兩圍受災較輕核與各該印委所報相同前聲明此次災區既廣賑撫需款甚鉅各處基圍沖決修築工程尤爲浩大必須援案開辦賑捐以資挹注等情詳請具奏前來臣等伏查此次災區界連三縣災民十餘萬田廬被毀困苦顛連徧野嗷鴻殊堪憫惻現雖分別賑撫惟田漕沖刷卽仰涸後補種恐亦難望收成爲日方長賑需甚鉅且基圍爲兩府居民田廬保障亟應趕緊修理粵省庫儲奇絀旣斷不能籌此鉅欸民間被災甚重財力更匱近甫勸辦賑捐等項無一不借資民力事關民瘼更不能不竭力籌辦再四設法惟有援照湖北江西安徽福建等省請辦賑捐之例遵照部定新章准捐封典虛銜翎枝貢監等項以五成上兌所捐之款全歸外銷趕將各屬沖決基圍認貢培修以工代賑俾災民十餘萬得延殘喘

以待春耕出自 高厚鴻慈所有厝鑿兩府基圍決口被災賑撫及擬開辦賑捐情形臣等謹合詞據實具陳伏乞 皇太后 皇上聖鑒訓示謹 奏奉 硃批准其開辦賑捐以資撫卹著卽妥籌辦理毋任災黎失所欽此

廣西巡撫臣丁振鐸跪 奏爲柳州府屬陡被水災現飭查勘妥籌撫卹恭摺具陳仰祈 聖鑒事竊臣

據右江道戴鴻恩柳州府知府趙淶彥稟稱本年六月初一起大雨滂沱晝夜不止初五日 河水驟長數丈自上游洶湧而來由西南門淹入城內道署及民居多成澤國城外房屋沖塌無數民人遷避不及者致被淹斃初八日以後水漸消退派人查探傳聞水自黔省之古州地方山中陡發上流柳城懷遠融縣均當其衝必致受災而下游附近之象州武宣等州縣亦難免水患惟道途尙 爲水阻未得確據情形馬平縣爲柳州府附郭首邑鄉間田廬被淹自必不少現由該署縣陳京華親往查勘此時府城內外被災貧民棲食無資自應急籌撫卹卽經該道府籌撥倉米飭令陳京華及保甲局員會同城內善堂紳商等先行設廠施粥賑濟俟查明災戶再請籌款撫卹等情臣當卽批飭妥爲賑濟毋令失所一面飭行藩司遴委補用知府莊蘊寬帶銀二萬兩馳往會同各地方官親詣災區辦理急賑並查勘實在損傷田畝房屋淹斃人口各若干迅速呈報以憑核辦臣奉職無狀上干天和致地方遭此水患實深惶悚惟有督同藩司力籌撫卹以免澤國遺黎流離失所稍贖愆尤惟此次災區遼闊待賑方殷就地籌款仍恐不敷甚鉅相應仰懇 天恩俯准撥款接濟以紓民困而廣 皇仁所有柳州府屬驟遭水災情形理 會同兩廣督臣陶模恭摺具陳伏乞 皇太后 皇上聖鑒訓示謹 奏奉 硃批仍遵前旨妥籌撫卹賑款不

敷著戶部速迅撥濟欽此

頭品頂戴兵部尙書銜山東巡撫臣周馥跪 奏爲山東黃河秋汎異常盛漲下游南岸利津縣境馮家庄堤岸漫決情形恭摺陳仰祈 聖鑒事竊查東省黃河著名棘手下游則尤稱難治尾閘不暢河身淤墊日高每遇上流來源過旺動輒漫溢幾無抵禦之方臣抵之任後正當秋汎加漲迭經河南撫臣錫良飛文各報陝州萬錦灘於七月二十五二十七等日共長水六尺五寸武涉沁河於是月二十三四五六等日共長水九尺八寸均經飛飭各游總辦嚴督防守並 奏明在案先是下游營委紛報搶險並據總辦候補道吳煜先後稟稱各所奇險迭出循利津縣境內南岸馮家庄水勢異常洶湧兼以附近海口不暢溜益拗折該處適當其衝倍形吃重又值七月二十三四兩日大雨晝夜不息以致掃走堤裂當因水深溜急作掃不易隨用捆廂做法並跑買土料竭力補救八月初三日傍晚西南風大作二十二十一各所大掃又被沖走全溜直趨堤根刷坍至七十丈堤頂寬剩三四尺不等報險之文絡繹於道臣聞之萬分焦灼復經嚴飭在工各員無論如何爲難必得拚命搶護詎現據該道飛報該處土性純沙新幫創堤復爲風浪猛撲塌陷殆盡大溜建瓴直下萬不能支八月初八日午時漫溢成口刷寬至三十餘丈水深三四丈不等分溜三分之一漫水直趨東河入海等情前來臣查該處本係民修民守地段自光緒二十三年經前升任撫臣李秉衡 奏歸官守始設防營堤岸本極形單薄本年秋汎之大又爲歷年所罕見在工文武員弁晝夜搶救已歷兩旬有餘乃因風浪過大人力難施致成漫口雖係實在情形究屬無可辭咎自應分別 奏參以示懲儆相應請 旨將防汛委員候補知縣李祖壽試用府經歷馮銘書前

哨官把總郭金良一併革職管帶河安中營儘先補用副將郭成革職留工效力督辦三游河工臬司
向其亨總辦下游河工候補道吳煜提調候補同知查蔭穀一併交部議處仍責令督率營委先將口門
設法盤築裏頭免致塌寬俟水勢稍定相機堵合如能奮勉再行 奏請 恩施臣督率無力咎有應得
不敢以到任甫及一月稍自諉過應請一併交部議處擬俟水勢稍定臣即親詣工次查看情形詳細
奏明辦理所有被水地方現經利津縣查放急賑仍諭令向其亨親行察看一切應須加發賑款即提附
近州縣錢糧應用不使災民失所此外上游中游各處現因盛漲未退仍嚴飭各員竭力防守不使再有
疏虞所有下游利津縣境南隄馮家莊漫決緣由謹恭摺馳 奏伏乞 皇太后 皇上聖鑒訓示謹
奏奉 硃批另有旨欽此

周馥片 再上游沿河各屬民埝如壽張縣南岸之魏莊北岸之大寺張莊米家徐家劉橋范縣北岸之
邵家集邙沙窩等莊據上游總辦候補道崔鍾善暨各該縣於八月初五六等日先後稟報均因秋汛
大豫自來源過猛以致漫溢成口雖係民修民守例不開奏而被災情形如何殊為懸念經臣諭令藩
兩司派員前往查勘量為振撫以免小民失所仍責成各該地方官指率紳民趕築堵合並設法疏消
水免致久淹為患理合附片具陳伏乞 聖鑒 奏奉 硃批覽欽此

頭品頂戴兩廣總督臣陶模頭品頂戴廣東巡撫臣德壽跪 奏為欽廉匪首次第就獲地方肅清恭摺
仰祈 聖鑒事竊查欽廉一帶山多地僻北接廣西南鄰越南近年匪徒糾從拜會潛謀不軌始僅偶
槍掠繼竟圍劫村墟甚至焚掠巡檢衛署圖攻廉州府域其間頭目以翁允佳鄧東良王振編三人為

魁各有黨羽千數百人不相統屬互為應援其餘不在三匪股中者亦皆假借聲勢擄掠打劫凶燄日熾揭竿思逞經臣等於上年十二月間檄調二品頂戴候補道秦炳直署理高廉欽道移往廉州會同署北海鎮本任南澳鎮總兵潘瀛督辦欽邊防遇缺簡放道潘培楷督率營勇分投剿辦當經瀛奏報在案炳直等率所統營勇分紮要隘並選精隊作為遊弋之師一面責成地方即清辦團保使良民不為匪害匪徒無可潛蹤遇有大股聚集之匪聯營夾擊先後與匪接仗大小數十次匪皆持有新式鎗械亡命死鬪弁勇雖時有傷亡而奮勇追逐匪徒既無休息之時更鮮窩頓之所遂日見窮蹙秦炳直又定以匪攻匪之策許匪黨拿匪自贖因是互相猜忌黨羽離心本年四月間匪首鄧東良在欽州地面就擒業經附片陳明旋據先後稟報六月十六日拿獲匪首王振綱二十日拿獲匪首翁光佳皆由匪黨內應營團圍攻冒死力戰始克成擒統計先後陣斬及拿獲匪黨不下一千數百名大股匪徒均已剿平仍責成地方文武逐鄉搜捕餘匪其實係迫脅入會者並悔罪自新不加株累地方已臻安靜祇以西省遊匪尚多時虞竄越不得不留營防堵此次剿辦欽廉會匪候補道秦炳直連籌調度悉合機宜解脅擒渠功績最著其在出力人員以及大小將弁團紳均能戮力同心不避艱險迭次苦戰實與身臨大敵無異合無仰懇天恩俯准分別異常勞績擇尤保獎以昭激勸而資鼓勵所有欽廉匪首次第就擒地方肅清情形理合聯銜恭摺具奏以慰宸廑伏乞 皇太后 皇上聖鑒訓示謹 奏奉 硃批准其擇尤酌保

許冒濫欽此

頭品頂戴兵部尚書銜山東巡撫臣周馥跪 奏為山東黃河北岸惠民縣境劉旺莊大堤又因盛漲

游利津縣境馮家莊南隄漫溢業將大概情形及疏防各員分別叅辦具奏臣現閱電抄欽奉 上諭著
督飭在工員弁將該處口門相機堵合等因欽此謹卽分飭一體欽遵在案伏念馮家莊工賑事宜臣先
已諭令督辦三游河丁臬司尙其亨前往相機籌辦惟連日水勢仍未見退各處紛紛告險而下游更甚
如王莊王堯家等處尤爲奇險正在分飭搶辦聞據下遊北岸承防委員候補知縣蔣茲管帶河成後營
候補叅將宿延蒼會稟惠民縣境北岸劉旺莊舊係平工原有淤灘約百餘丈殘壩基四道自迤上之桑
家渡溜勢南滾大溜至此南折而北該處遂成坐灣頂衝巨浪奔騰又值西南風勁數日之間淤灘塌盡
溜逼隄根當卽廣收梢料放價買土堆壓掃面兼繞後坡一面搶做頂廂六段暫資搪護東大溜直撲搶
廂各掃均墊入水隄頂刷盡是日戍刻風大浪急直逼頂人力難施遂至漫溢黑夜之間咫尺莫辨等
情臣查該處如惠民縣被淹必廣濟陽縣濱州兩處亦必波及當以急救人命趕盤裏頭爲目前緊要關
鍵隨卽諭令藩司遴派多員分投查放急振臣另派營官楊榮春酌帶哨勇自省星夜赴該口幫做裏頭
不使愈塌愈崩旋據該營委各員馳報現在口門刷寬約七十丈水深三四丈不等分溜十成之六維時
總辦下游河工候補道吳煜正在下段督險工至十九日始據稟同前情請將在工失事各員叅辦前來
臣查劉旺莊迤上之桑家渡本係坐灣險工一經溜勢北徙該處正當其衝雖係新險猝生物料難以應
手而防汛實有攸歸實難辭咎相應請 旨將分防委員候補直隸州州判崔櫓俊哨之官外委安保林
一併革職承防委員候補知縣蔣茲管帶河成後營候補叅將宿延蒼一併革職留工自贖提調候補直
隸州知州任嘉拭交部議處督辦三游河工臬司尙其亨總辦下游河工候補道吳煜雖因在下段督工

不及兼顧而平時度失當未便姑容均應再請一併交部議處臣前已蒙恩免議慚悚無地此次又遭失事應請加重議處惟黃河秋漲未退瞬息遷變將來堵塞決口如何施工及被災情形急籌振撫均應從速履勘分投料理臣定於八月二十三日由省親往勘工臣署日行向循例檄飭藩司代折代行遇有緊要事件仍包封送臣行次核辦俟回省後再將查明確情議定辦法詳細奏聞現在節逾白露疊據各總辦稟報上游中游搶護半穩惟下游仍搶險不已如大小崔家蝎子灣卡家莊等處掃多走失異常棘手聞之殊深焦灼除仍嚴飭在工人等認真搶護力保完善不使再有失事外所有下游北岸惠民縣境劉旺莊大堤漫決緣由謹恭摺由驛馳陳伏乞皇太后皇上聖鑒訓示謹奏奉 硃批另有旨欽此

奴才增祺鈕楞額跪 奏為裁撤鐵嶺路記添設防守尉以資管轄恭摺仰祈 聖鑒事竊查鐵嶺原設滿洲鑲白旗路記防禦一缺漢軍正白鑲黃正藍三旗防禦三缺所有地方事宜以及各項稅務均係路記防禦會同鐵嶺縣辦理其漢軍三旗防禦應辦公事向係報由路記核轉無如品秩相等遇事爭權紛紛稟行實屬不成政體該處近為火車停站之區交涉案件日形殷繁以及會徵稅捐在在均關緊要若不量予變通實不足以資整頓而期振作奴才等再四通籌擬請將鐵嶺路記即行裁撤另設防禦守尉一員定為滿洲額缺由滿州佐領內選擇照例擬定正陪咨送部旗帶領引 見其原設鑲白旗滿州防禦仍令辦理本旗事務嗣後該四旗防禦遇有呈報公事均由防守尉承轉亦毋庸由開原城守尉兼管以一事權惟既改設防守尉應添設經理檔案筆帖式一員每年應支俸銀一百零五兩並照章由東流

圍荒撥給隨缺地五十畝筆帖式一員每年應支俸銀二十八兩俸米二十八斛均由盛京戶部照章支領並路記公所作為防守尉衙門亦無須另行請款修建奴才等為因時制宜起見是否有當理合恭摺具陳伏乞 皇太后 皇上聖鑒訓示謹 奏奉 硃批該部議奏欽此

周馥片 再河標中左右三營員弁兵丁前經河南撫臣錫良奏准自光緒二十八年為始分作五年裁竣裁缺各官歸入山東撫鎮各標補用所撤兵丁每名發給恩餉一年等因知照到東經調任撫臣張人駿亦因運河營一營改隸山東仿照黃河營裁減章程具奏欽奉 硃批該部知道欽此欽遵轉行在案臣維黃運兩河營員衙門駐紮山東境內本為修守隄防催 漕艘而設自同治十一年以後東省河防久有專營運河漕船現經停止該河營官弁兵丁既無地方之責操練亦屬具文而四營經費綜稽之則歲需共銀三萬五千兩有奇散給之則每兵一日得銀四錢六分不等值此時艱餉絀糜費不資若循原案遞年裁減二成則所汰者非必無良暫留者豈盡得力棄取既難得當轉不足以服將士之心更恐屬託營求流弊叢出臣未敢以案經奏准在先稍事遷就當經咨委兗州鎮總兵田恩來並札飭兗沂曹濟道彭虞孫前往濟寧州會同點明河標中左右三營運河一營兵丁按名照章發給本年正餉之外照案加發一年恩餉即行一律裁汰俾回籍安業另行謀生不致失所以廣 皇仁至於裁缺實任各官並候補員弁不下七十餘人原奏聲明均歸山東標營非特補缺無期即差委亦難遍及應請量為變通如籍隸外省之員由臣咨回原籍收標其年老人員一體資遣回籍實缺千總把總外委各弁發給恩餉一年候補千總以下如願回籍而無川資者酌發半年恩餉仍按員列標註冊俟補缺到班或需員差遣隨時

調取補用以免向隅所有光緒三十年以後節省裁缺官兵俸餉等銀留作巡警等軍經費挹注除咨戶
兵二部查照外理合附片具陳伏乞 聖鑒訓示謹 奏奉 硃批該部知道欽此

奴才于珊跪 奏爲地方緊要駐防旗兵差務殷繁戶衆餉單深虞凍餒據情籲懇 天恩俯准將應支
俸餉等項仍按減成章程發放以濟兵食而資應差恭摺具陳仰祈 聖鑒事竊奴才兼轄之古北口駐
防旗兵二百一十名甲兵月領餉銀二兩三河縣玉田縣駐防旗兵各一百名昌平州順義縣駐防旗兵
各五十名每名月領餉銀三兩自咸豐年間軍興以來帑藏支絀官俸減按六成古北口三河縣兵餉減
按八成玉田縣昌平州順義縣兵餉減按七成支領向由各州縣轉詳霸昌道通永道按季由直隸藩司
詳由前大學士直隸總督臣李鴻章 奏明將藩庫應放二十六年秋冬二十七年春夏四季兵餉各欸
暫行停發其自二十七年秋季起應放之項均按減成實數轉行核發一半等因當經札飭各該防守尉
遵照迨至事局甫定節據各該防守尉以兵丁待餉迫切稟請籌撥欠餉等情當即咨明直隸藩司仍以
欸絀未能發放今於本年八月初十等日復據古北口等五處防守尉勝福等稟稱各該駐防旗兵近年
生齒日繁別無生計全賴所領餉銀餉米糊口當差加以銀價低落物價昂仰事俯畜恒形不足兵力
已屬困憊自庚子秋拳匪變起餉需無處請領時值軍情戒嚴而該兵衆具有天良咸知大義腹雖枵而
志不可奪或保守關口分防設卡或守護城池彈壓地方晝夜嚴防罔敢疎懈是以未遭拳匪土匪以及
潰勇蹂躪地方幸獲保全會事局幸已大定欠發之餉仍一時未能補放而現領之餉仍按減成發給一
半兵力困窘萬分難支查古北口兵餉按照減成減半每名合計月領八錢三河縣等四處兵丁每名合

計月領一兩有零當幸糊口一餐維得轉瞬人冬天氣漸寒日擊兵衆身無暖衣腹無飽食凍餒荷戈殊堪憫惻爲此瀝情稟請將官兵俸餉米折等項自本年秋季起免其減半仍按成章呈請整季發放以濟兵食等情稟請前來奴才伏查兼轄之五處駐防古北口南拱 京師北屯朔莫爲京北首要關隘自直隸提督移住以來提標調兵或戍或調字營無幾斤有保守關口盤委出入彈壓地方該旗營責無旁貸斤來熱河所屬地方賊匪出沒無常肆行擾竄節經奴才札飭該防守尉等官督率兵丁嚴守關口認真盤詰以方賊匪闖入該官兵等尙解不遺余力毫無懈弛其三河孫玉田孫順義縣三處爲京東首站通衢各達三省昌平下州爲北京首站也當衝要該四處主方官兵全操方外時有三省各處來往要差列由各該處撥派官兵護送其一切川資並無公款向皆該官兵自備似與無差徭之駐防官兵更覺苦累該防守尉等所稟曰衆餉單差糊口凍餒堪虞案屬實在情形奴才竊思藩庫應撥之款減平發放係因大同有宅軍各用先期博下易乃一時權宜之舉今已該成一年量可通融各該駐防官兵或嚴守關口或差務繁重囿冬令天氣漸寒一切操防更不容稍涉鬆懈但饑飽維期莫收折衝之效爲此據情叩懇 聖慈俯念地方緊要占北口等五處往防官兵口衆餉單異常困苦 恩准將應支俸餉米折等項銀兩自光緒二十八年秋季起免其減半仍按成章呈整季發放以濟兵食而資應差如蒙 俞允俟命下之日奴才即行恭錄咨行直隸總督轉飭藩司辦理奴才爲目擊兵艱整飭操防起見是否有當理合恭摺具 奏伏乞 皇太后 皇上聖鑒 訓示遵行謹 奏請 旨奉 硃批著照所請片併發

欽此

奴才于珊片 再奴才所屬密雲駐防併兼轄之古北口等五處支食養贍錢糧之孤寡幼丁殘廢人等及支食終身週年半餉孀婦月領銀兩向由戶部領到備用銀內關支自咸豐同治年間軍興以來帑藏支絀奉准部咨密雲等處應領備用一項內養贍半餉按八成支領其應支公費等項減按五成支領等因歷經辦理在案迨至本年二月間接准戶部咨開現在賠款驟增部庫異常支絀奏請將在案八旗鰥寡孤獨養贍自光緒二十八年正月起減按五成放給業經欽奉 諭旨允准所有密雲等處孤寡幼丁殘廢人等月支養贍銀兩亦均按定額應支十成之數減按五成放給等因咨行前來當即轉飭各旗遵辦隨據該孤寡人等紛紛哀祈叩懇設法憐憫經奴才督飭該管協領佐領等曉以大義以八旗世僕世受 國家參養之恩至優極渥值此庫欸支絀自當共體時艱勉爲支持當即遵照辦理迄今已逾半年現在復據該孤寡等以所領減成銀兩實在不敷糊口縱有親誼亦只告求一餐難期常遠刻值天氣漸寒凍餒交迫乞告無門惟有叩懇設法拯救等情據該管協佐領等轉請核辦前來查支食養贍錢糧者皆係孤寡殘廢獨無告之人無論人丁多寡一戶例不准支食二分每一分月領八成減半銀一兩二錢向無米石近年以來生齒日繁物貴銀賤已屬窮苦難堪自遭庚子變亂該孤寡等二十六年僅領過兩個月銀兩二十七年僅按八成支領一半自本年正月減按五成月共領銀七錢五分易東市錢四串有奇以目下之糧貴終日一飽宜係難得更兼密雲地處山僻素稱瘠苦除由部所領餉糴之外別無謀生之路該孤寡等縱有親誼多半戶衆餉單自顧不暇實難責其兼顧現值天氣漸寒凍餒交迫實有待艱之勢其所稱窮苦已極萬難度命奴才體察委係實在情形是以不揣冒瀆謹將該孤寡幼丁殘廢人

等窮苦下情據實瀝陳籲懇 聖慈俯准將月支養贍銀兩自本年八月起賞還仍按原減八成實銀支領俾煢獨無告之人可免凍餒之苦其各旗支食終身半餉之孀婦皆係陣亡丁兵之寡母或妻室及現在病故官兵所遺情願守節之妻室支領期半年餉向隨養贍銀兩按八成支領前奉部咨自本年正月起按照兵餉七成放給所有孤寡養贍如蒙 恩准賞還八成支領可否一併規復之處出自 鴻慈逾格所有孤寡殘廢人等窮苦已極懇祈將應支養贍銀兩仍按八成支領以活煢獨而廣 皇仁緣由是 否有當爲此附片具陳伏乞 聖鑒謹 奏請 旨奉 硃批覽欽此

廣西巡撫臣丁振鐸跪 奏爲剿匪出力鎮將擬籲懇 天恩量予獎叙在事各將弁擇優保獎以昭激勸而振軍心恭摺仰祈 聖鑒事竊維廣西游士會匪到處勾結竄擾幾於無地無之自今春二月以來

臣與前署扶督凱署左江鎮正任柳慶鎮總兵馬盛治電飭各營隨檄堵剿疊據電咨擒斬頗多地方雖未一律肅清而各將士仍剿跟追出入於密菁巖巖來往於蠻烟瘴雨傷亡不少危險萬分自當甄叙及之俾資鼓勵查署理右江鎮總兵馬盛治自到任親親出督剿宣化縣屬大小那舊賴村新塘那畔等匪村復剿崑崙隘以下三四五六塘股匪其部將黃忠立陸榮廷馬漢等分率營哨擊匪於上林隆安慶遠思恩甯明鎮邊等處均屢攻克匪巢殲擒甚衆督臣陶模派署廣東北海鎮正任南澳鎮總兵潘瀛統帶四營赴西協剿會同糧道張棠蔭剿劫木梓木格股匪該匪竄入東西兩省交界之聖大山延袤數十里徑險巢堅該總兵等分路進剿而上匪分數股抗拒鎗彈如雨自辰及午鏖戰數時之久軍心益奮部下弁勇僅傷亡二十餘名摧堅陷陣殲匪二百餘名墜巖死者無算生擒僞元帥李玉都一名匪目李鴻基

等三名從匪首一十餘名攻破匪巢搜獲偽印旗幟軍火等件實屬出奇制勝足以寒賊膽而快人心臣於得報時已電囑該鎮等將才事出力弁勇擇尤請獎具履歷咨送前來該鎮等雖辭以軍務未竣不敢遠邀獎叙惟臣既確知其勞勩未便竟置之不言除記名提督廣西柳慶鎮總兵署右江鎮總兵馬盛治於六月十八日在武緣屬縣攻匪村受傷陣亡另摺請卹外記名提督廣東南澳鎮總兵署北海鎮總兵潘瀛擬請旨仍以提督記名簡放臣交卸在即各營出力將弁文冊尙未齊到可否籲懇天恩俯准該鎮及馬盛治部將黃忠立等冊開尤爲出力員弁勇丁彙報新任撫臣王之春核明分別奏咨請獎以昭激勸而振軍心之處出自聖裁伏乞皇太后皇上聖鑒訓示謹奏奉硃批著照所請該部知道欽此

雲貴總督臣劉光燾跪奏爲滇省土藥釐金請仍照案劃撥恭摺仰祈聖鑒事竊臣准戶部咨據湖南省片奏劃撥解部協滇餉銀萬難撥解請仍由滇自行籌解等因當經轉行去後茲據總理雲南釐金局司道署布政使劉春霖等詳稱查滇省土藥釐金從前報撥每千兩扣銀六兩解司充餉光緒十七年奉旨將藥釐照各省通章按年解交海軍衙門支片當行滇省餉項奇絀各省協撥勢難源源撥濟全賴藥厘隨時支發以應急需難提解經前督臣王文韶奏准將土藥釐金自光緒十七年起按年造報查明各省欠滇餉數開單部配令欠餉之省照數劃撥嗣於二十三年奉文加重土藥釐金又經奏明每土藥一担銀十九兩二錢仍以六兩留滇支用照案由各省欠餉撥餘銀十三兩二錢全數解部

劃留七成支放各在案上年奉文將藥釐再加三成備償賠款經司局議准每土藥一担酌加釐銀四兩八錢藉資彌補但滇省以藥厘爲大宗一再遞加恐商力難支辦無成效擬暫行試辦尙未奏咨立案茲湘省於欠餉項下奉部指撥滇省應解二十五年分藥釐銀三萬兩奏請由滇自行籌解是各省欠協之餉不獨不能籌撥轉使受協之滇省變而爲解部之欠款滇力實屬難支竊念土藥厘金迭次加增計每担現抽釐二十四兩除新加之四兩八錢專供賠款萬難挪動卽解部之十三兩三錢雖准劃留七成以作津貼票息現因賠款無著業將加給津貼全數提補是截留之七成均非滇用計留充餉糶者不過四分之一此時綜核常年支款不敷甚鉅竭力搜羅計無所出益以賠款三十萬已屬萬分難支且復奉文振興庶務在在需費均屬刻不容緩之圖正不知從何籌備應請將此項土藥釐金仍由部核飭湘省照數撥解並請以後仍照舊案留滇備用以支困局等情詳請具奏前來臣查滇省素稱邊瘠歷賴協濟近以時艱同際各省皆然協撥虛文早成畫餅現值粵匪潛滋添兵防剿加以創修鐵路改建學堂講求工商維新庶政一切需款爲數不資目前搜剔無遺計窮力竭正擬呈請部臣設法籌措俾濟急需何能對此照案指撥之欠餉實滇自解合無仰懇天恩飭部收滇省二十八年以前應解之六兩藥釐仍由欠協各省劃數指撥以符原案其自二十八年起仍舊照滇支用無庸由部劃解以免往返稽遲徒煩文牘出自逾格鴻施除咨部查照外謹恭摺具陳伏乞皇太后皇上聖鑒訓示再雲南巡撫係臣兼署毋庸列銜併聲明謹奏奉硃批戶部知道欽此

頭品頂戴浙江巡撫臣任道鎔跪奏爲剿捕大嵐山匪徒一律廓清並籌善後事宜恭摺具陳仰祈

聖鑒事竊維大嵐山爲四明山分支綿亘鄞縣慈谿奉化上虞餘姚五縣之地界連寧紹台三府周廣八
百里菁密林深向爲盜賊淵藪自前數年海疆多事台匪游勇勾結本地奸民盤據山內黨羽幾至千人
肆行劫掠出沒不常浸成地方巨患光緒二十六年前撫臣劉樹堂惲祖翼先後會商署提臣余宏亮以
該匪根株已深非痛加懲創不足戢匪燄而遏亂萌遂調派防練五六營與該管文武合力兜剿先令各
縣於近山村鎮查保甲舉辦民團並探明山口各要隘派營堵截其迤南之柵墟嶺關嶺班竹爲台匪
往來要道均以重兵遏其去路卽令管帶鄒鎔劉賢斌等會合印委各員購覓眼綫於十月間帶隊入山
搜捕所歷皆峻巖絕壑人跡罕至該匪憑高據險抵死抗拒往往鑿戰連日鎗彈雨下我軍傷亡甚多當
經激勵弁勇奮力猛進直搗賊巢迭在黃巖墩雪巖等處拿獲要匪姚佩玉徐滋生陳元水龐阿蓮陳培
九張方得等及夥匪多名並格斃大肚阿三等二十餘名又在南風岡山嶼獲小癩頭項得獸徐亞順
葉方元施利潮王各旋又帶綫於上海租界內擒獲匪首老龐麻卽陳阿寶一名又於台州訪獲羅老五
王小先五王漢涼等數名嗣匪徒二百餘人竄入新昌境內連搶十餘家經該處營團圍剿擒斬數目小
周謝鐵隴並扶回被擄人口先後搜捕洋鎗藥彈刀叉並起出銀洋珠玉綢綾衣飾各贓物數百件歷訊
犯供該匪有新舊三幫分據各山迭出搶掠陳元水小癩頭均係匪首而尤以老龐麻爲魁業將首要各
匪交地方官訊明嚴懲脅從黨羽悉予寬究現已一律肅清准署提臣余宏亮將在事出力員弁開摺
咨送核辦並據營務處司道詳請具奏前來臣查大嵐山久爲匪徒窟穴夥黨衆多屢出重案幾至勢
成燎原經前撫臣由署提臣派隊剿辦奏奉批旨著匪首老龐麻等嚴拿懲辦等因欽此經設法購獲

該匪首老隴麻及各要匪先後訊明正法餘黨解散地方救平惟該處重巒疊嶂最易藏奸而地介數縣之間距各縣治所均極窳遠控制難周匪蹤飄忽無常往往兵至則散兵去復聚前此屢經拿辦迄無成效者正是此失亟宜妥籌善後思患預防茲議於山內設立鄞慈奉餘上五縣保甲局籌給經費派員專司編查駐紮適中之岡公宅地方俾可連絡五邑策應四路又調撥練軍一營於山口要隘如鄞縣之鄞江橋俞山廟奉化之如溪溪口餘姚之梁弄等處擇要駐防往來巡緝誠使辦理得力清內地之窩頓即可杜外匪之闖入庶期永絕亂源至前奏擬酌設營汛以專責成原爲懲前毖後起見惟事關更制尙須詳細核議另案辦理在事各員弁督率剿捕深入窮山覘冒鋒鏑不辭艱險俾積年巨匪悉行殲除寶屬著有勞勩可否仰懇 天恩俯准擇尤保獎以資激勸而勵將來所有大嵐山匪徒一律廓清並籌辦善後各緣由理合會同閩浙總督臣許應駱浙江提督臣呂本元恭摺具 奏伏乞 皇太后 皇上聖鑒訓示謹 奏奉 硃批准其擇尤酌保毋許冒濫欽此

太子少保北洋大臣直隸總督臣袁世凱跪 奏 為敬舉賢能懇 恩擢用以資激勸恭摺仰祈 聖鑒事竊查直隸本係缺額省分自經兵燹以後民物彫殘公私掃地重以擬還洋款賠償教案以及創行一切新政辦理地方善後各事交迫迭起百廢待興經費則艱絀異常而用度則浩繁倍昔以故理財籌款尤爲目前切要之端然非經理得人則叢弊長奸罅漏白出而莫可究詰其間素行廉謹者又或怵於身爲怨府不免瞻徇以便其私此實心任事者所以不可多得也茲查有軍機處記名直隸候補道汪瑞高學優操潔心細才長在直多年情形熟悉臣既任以先後委辦支應籌款善後各局務皆能掃除積習

釐剔盡奸凡應付軍需鉤稽餉項綜覈出入款目莫不悉心擘畫綱舉目張雖衆謗羣疑而該員覈實認真力任勞怨絕不困之稍改其度洵所謂公家之利知無不爲有裨時局殊非淺鮮理值時艱方殷需才孔亟臣既深資臂助不敢壅於上聞可否仰懇 天恩破格擢用以勵賢能而資激勸之處出自 聖裁謹恭摺密 奏伏乞 皇太后 皇上聖鑒訓示謹 奏奉 硃批另有旨欽此

雲貴總督臣魏光燾跪 奏爲滇省會剿粵邊游匪陸續照常備軍制添募營勇擬請別爲一軍專備剿游事竊裁撤恭摺仰祈 聖鑒事竊滇省防練兵營上年始經臣釐訂營制餉章奏明就現有各營一律裁改歸併額設營備十二營續備二十四營炮隊工程隊四哨合共萬人比緣光緒二十六年越邊滋孽添改綱字二十營營柱字植字各營分布沿邊一帶戒備不虞嗣以粵邊游匪漸形猖獗移用防剿尙未能照章撤併僅將省防各營改照常備軍餉制督練新操旋調赴邊更替冀將原舊各營漸次抽調歸併俾兵數不逾常額然後通飭一律改編以歸畫一替防方始適值廣西遺勇叛勾結煽引匪蹤大張乘勢分股竄滇始陷剝隘繼陷皈朝時思撓我堅壁清野之策雖經調軍次第剿除搜捕而沿邊要隘過多防不勝防原駐各營不敷分佈陸續添募隊伍補苴罅漏計踰原擬額設兵數已十有四營皆照常備軍餉支給邇來粵境游匪蔓延日廣迭奉 嚴旨三省會剿並蒙 特簡廣西撫臣王之春辦理軍務滇省廣南開化兩府羅平師宗邱北各州縣均三面緊接粵邊延袤二千餘里扼要防堵約會夾擊在在均須兵力粵境一日不靖滇備卽一日難紓而通省所擬改設常備續備軍爲之牽掣不能就範因循固陋頓無期殊非至計且南防臨蒙安平各屬界連法越西防騰順緬甯各處毗鄰英緬西北之麗 淮西與

台免涉洪山烏龍之險惟開深後尤須另築堤壩以防復淤此濬復支河以紓水道使商民之法也綜其大要以裁灣取直束水攻沙保舊有之田開中洪之路使河歸故道水不旁溢數年以後順流既久西南兩濬無衝決之虞烏龍兩岸復增新洲之益其效有可預決惟舉百餘里之要工祛百餘年之積患工程浩大需款甚鉅閩省庫儲支絀無法騰挪再四商籌擬請自本年七月賑捐限滿之日起仍准接辦賑捐兩年寬以時日次第興作並可招集附近貧民以工代賑捐款不敷再當另行籌撥請奉明辦理等情前來臣覆加查核該司等所擬辦理均屬周妥如果款項應手工作屬實弭患消災爲民間廣興水利明知近來賑捐欠成弩末能否勸集鉅款殊無把握然事關民生至計除此別無可籌之款惟有仰懇 天恩俯准接辦賑捐兩年以濟要工即派藩臬兩司設局督辦遴選幹員妥定章程認真經理不准稍涉草率浮糜仍特用過經費彙入工賑案內開單奏知除咨部外所有閩省開濬河道擬請辦賑捐緣由謹恭摺具陳伏乞 皇太后 皇上聖鑒訓示謹 奏奉 硃批著照所請戶部知道片併發欽此

頭品頂戴新授熱河都統河南巡撫奴才錫良跪 奏爲查明豫省辦理糧運出力各員援案擇尤請獎仰懇 聖鑒事竊准 行在戶部咨附奏辦理轉運採買交倉出力各員請獎一片聲明其餘辦運接運

出力人員應由各該省督撫自行查明擇尤請獎無稍冒濫等因光緒二十七年八月十九日奏奉 硃批著照所請該部知道片併發欽此欽遵咨行到豫查光緒二十六年八月間前撫臣裕良以 行在屆

從人衆深虞糧運不繼 奏明購糧萬石運陝以資接濟嗣又遵奉 諭旨截留京餉採買白米一萬七千石在省城設立糧運總局河南府陝州等處均設轉運分局派員星馳分設購買招覓舟車水陸並進

後以陝西災重籌備雜糧十千石由潼關西運長安彼時採購米石皆在皖豫交界及光山產米之區設法轉輸水運則黃河上游三門底柱節節阻隔半途仍須登陸方折泝挽入渭飛挽甚難陸運則自鄭州迤西路漸崎嶇冬間冰雪載途而駝車滯倍形艱阻各該員等或妥籌購運或照料催趲分批抵陝交納無誤要需至候補知府黃履中修理陝州一帶運道閱時五六月之久丁堅費省尤著勤勞均屬異常出力據布政使延祖糧儲道王維翰稟詳呈請 奏獎前來奴才伏查前當 鑾輿西幸適值陝省荒旱成災糧價騰貴全關鄰近各省購運接濟屢軍既無虞之食節待哺災黎亦可藉資賑恤如江蘇轉運出力之戴運寅等已由戶部 奏請獎叙奉 旨允准在案豫省辦理糧運事同一律在事各員始終勤奮自末便沒其勞動奴才核實刪減繕具清單恭 御覽合無仰懇 天恩俯准照擬給獎以昭激勸除飭取各員履歷咨 外所有援案查明糧運出力人員擇尤請獎緣由理合恭摺具陳伏乞 皇太后 皇上 聖鑒訓示謹 奏奉 硃批該部議奏單併發欽此

頭品頂戴 授熱河都統河南巡撫兼管河工事務奴才錫良跪 奏為拿獲泌陽教匪首要訊明懲辦遵 旨將在中出力 昌擇尤開單懇 恩獎叙恭摺仰祈 聖鑒事竊照泌陽縣匪徒糾眾滋事已拿獲要犯席小發等懲辦 兩次剿辦匪黨經奴才再摺 奏明光緒二十八年四月二十九日奉 硃批著趕緊拿拿等因 仰等傷獨懲辦俟全案定後再行擇尤保獎毋許冒濫欽此欽遵奴才查首要張雲卿等在逃未獲出案雖經議結豈容任令為首滋事之犯倖逃法外節經嚴飭地方文武實力購拿毋任漏網旋據分統豫軍奏補信陽協副將汝甯營參將韓立本兩汝光道朱壽鏞南陽府知府傅鳳颺等

督飭員弁將張雲卿程勞十即程意歧羅勞六即羅振杰三名先後拿獲稟報前來當飭南汝光道督同府縣提研訊據張雲卿供認因抗攤教案賠款被教民指控差緝心懷忿恨糾邀刃匪席小發等乘隙煽惑又邀程勞十即程意歧羅勞六即羅振杰糾合多人商同鬧教燒營窪烏金溝等處教堂殺害教民多命並圍攻泌陽縣城各情形不諱據程勞十即程意歧供稱帶同張雲卿殺人放火扒堂圍城又因聞拿緊急率黨執持炮械在二門並拒敵官軍據羅勞六即羅振杰供稱聽從張雲卿鬧教後因官兵分投躡躡又復逼脅多人入夥在郝莊翟廟抗拒官軍各等情不諱經奴才先後批飭就地正法傳首犯事地方懸桿示衆以昭炯戒查此次泌陽匪徒聚衆仇教圍攻縣城兇醜甚張幾有燎原之勢嗣將席小發等緝獲後人心初定而該匪等聞拿緊急又復結黨逼脅鄉民意圖抗拒據泌陽首事程入云等以被脅情急民聊生稟請派隊往剿官軍兩次兇拿餘黨一律解散旋將教案磋商議結羣疑盡釋民教相安而首要張雲卿等亦即於夕弋獲刑正典刑洵足以儆兇頑而絕後患現在全案完結泌陽一帶民情安帖地方靜謐如常堪以上紓宸廑所有在事出力人員不無微勞足錄謹遵旨擇尤分別擬獎不使稍有冒濫開具清單恭呈御覽合無仰懇恩准請獎叙以示鼓勵除飭取各員履歷並千把以下各武職緣由奴才查明獎分別咨部外將辦教案首暨擇尤開單請獎各緣由恭摺具陳伏乞太后皇聖鑒訓示謹奏奉硃旨著照所請部知道單併發欽此

太子少保北洋大臣直隸總督臣袁世凱跪奏為查明知州被案各款據實覆陳恭摺仰祈聖鑒事

竊臣承准軍大臣字光緒二十八年五月初一日奉旨諭奏州牧苛斂民財控案多端請飭查辦

一稱正裁知州振鵬在 多合劣著前 匪之藉勒索枉殺無辜並有加徵船稅

匿 情請飭 等 著袁世凱按照川各節切查明據實奏參勿稍徇隱原摺著抄給閱

看等因欽此當將該州李和鵬任 面飭委 任 驛張 宸 平府知州管延獻分別查訊在案

茲 該州等 照所參 欺分別查訊明 先後具覆前來如原參二十六年洋兵過境並無擾害該

牧勒 鋪商籍民之 下八十餘萬串各舖帳簿及鄉民所領諭帖似可按戶稽查一節查光緒二十

六 閏八月英俄德日四國聯軍到境該州 鵬率同 以禮接待洋人責令保護鐵路該州商請

保全民命當經立 字 兵不得至鐵路以南一面設局供應食物始免騷擾即樂亭境內亦賴以保

全 自是年閏八 至 年九月止城內及偏 汀兩局共用銀一萬一千餘兩內由商民捐助銀七

千餘兩不敷 振鵬及紳士 補足 將用款榜示其唐山開平兩處係潯州豐潤縣轄業經設

局支應 用東 十三 餘串約 銀二 兩紳民自捐自辦未經官吏之手至天主教賠款訂定 萬

七千兩由滋事之土家 等二 村 攤又耶穌 案當賠東錢一萬三千餘吊合銀一千九百餘兩

亦由各該莊 償統 應洋兵及教案賠款 自 方者實祇銀 萬 兩 合東錢三十餘萬吊

共八十餘萬吊之多亦無藉端勒索情事又原參州 開平 復 當院內有穀 埋藏 節 尊快

鎗二千餘支子彈 白米數千包該牧遺其心腹李重樓密向 人通信 去又 人欲

開平詐得洋銀二 元統計需 該鎮不下五 萬 元核牧素以 索 事是以訟 上蒙 當 業

畢超瑞曹殿元劉管和 皆為 一節查二 年五月間 軍 山 關 開平 業

復成當房爲行營糧台旋即撥隊西去李振鵬並不知有埋藏鎗砲等物二十七年二月突有洋兵入內
樓去無門後膛砲十七尊並洋鎗子藥多件洋人追究砲門將辦理支應之李殿增即重樓同當夥等帶
往唐山因該牧聞信立即照會辯論旋即釋放稟報有案李重樓亦被拘囚其非密向洋人通信可知
日當時搜出鎗砲其勢洶洶欲洗甲平之說出洋人之口並非李振鵬之言詎商民被拘經李振鵬辯
論釋放其無恐嚇詐財亦可知至謂統計需索五六萬元更無其事劉管和查無其人凌富王樹堂畢超
瑞曹殿元並無劣蹟原參稱爲李振鵬爪牙白係傳聞之言原參訪聞麻灣挖賀家泰家道殷實該牧捏
稱費家奉係搶劫山西人楊姓要犯派勇阻楊朝元率勇將賈家泰費鳴歧及工人張姓用洋鎗擊斃並
將其子費鳴蘭及十一歲幼孩嚴刑逼認路劫楊姓之案迨楊姓到堂供稱被劫時並未見費家泰在場
該牧恐被虛誣之名仍將費鳴蘭及幼孩監禁意在滅口一節杏麻灣挖並無費家泰其人二十六年閏
八月教民費漢章等在榛子鎮誑索過客楊生春等洋藏於井內旋因犯事逃避其井內銀洋被費鳴歧
偵知竊去數十富成功查知其事呈請緝究李振鵬派勇緝拿費鳴歧等拒捕勇役開鎗致將費鳴歧費
家遠等有德三名格斃該牧稟府委據樂亭縣驗訊詳報並因費鳴歧等拒捕屬實審明照律格殺勿論
曹鳴歧族人費九思屢次省控筋據永平府訊結詳報李振鵬從無嚴刑逼認及監禁滅口情事又原參
該牧藉端索詐甚於鄉票各城子莊人張紀德孟家店莊劉生榮白殿該牧鎖拿共勒索銀三千兩並令
馬勇劉鳳軒劉緒玉王振東榜掠富戶曾家莊董洛德挖莊方旗曉莊王桓尤各莊單姓王廷獻等共勒
索銀九千餘兩其餘數十兩之家難以數計現督方旗官控有案一節合該州教案賠款民間不肯出資

由州酌量攤派五城子等莊即在滋事之王家莊二十四村之內所指銀數均有簿籍該牧實未侵吞及
鎧拿榜掠情事方旗卽有上控之案亦係教案捐款經府會與原捐印簿相符提訊斷結又原參該牧創
立名目爲苛派差徭之舉如解倉穀送學出兵車三項斂銀五萬餘兩經生員袁姓王姓韓姓等上控
批飭遷安縣代審卽有該州四百餘村民赴遷安呈報苛斂錢數濼州衙役杜文秀錢永盛供認已有確
據當卽被押該牧聞信卽將該役要出控稟該生各情復請嚴拿至今此案未結一節查該州倉差係津
貼榆關山海永豐二倉兵米運脚每年冬季起解兵米照派一次該州學差向章學政按臨永平考試派
濼州津貼大車六輛以上兩差原有定時每項僅派東錢三四千串爲數無多且原派錢文多未收足至
該州兵差自同治十年十一年前任州牧游智開朱靖旬原定章程遇有兵差無論需車多寡各村公攤
大車一百二十輛計往返守候回空口糧柴草一切支應內每兵千名按二十八日計算每日每車折交
東錢十串山官先行雇備應差兵多則日期照增兵少則日期照減如兵二千名按五十六日計算五百
名按十四日計算光緒二十五年甘軍三千餘兵各駐紮永平三月間移駐薊州李振鵬接奉前永平府
檄飭趕辦車輛赴盧龍縣站應差原文謂各營途次需用糧料柴草自行發價而車輛不與焉計官軍三
千名照定章應按八十四日派車李振鵬因此次甘軍自備糧草當卽減去八百名僅按二千五百名派
各社車一百二十輛按六十二日計算派定東錢六萬五千五百餘串僅收五萬一千七百餘串其餘尙
屬民欠生員袁鳴珂等因甘軍自發糧草各價遂疑車價亦可不派控經永平府飭派遷安縣移提審辦
因原告不到暫行結案委辦四百餘村赴遷安縣呈控暨該牧將州役杜文秀等要出情事此案現經道

員張翊宸督同前署縣朱家寶訊明書役併無浮收舞弊袁鳴珂等控情不實念其事出懷疑從寬申飭斷令此後遇有差徭仍循舊章派辦取結完案又原參灤州志書內向無差徭一條該牧與劣紳莫寶善將新修志書註明舊有差徭爲異日永遠苛索地步一節查地方差徭原爲志書所不載同治十年十一年州牧游智開朱靖旬先後蒞任以兵差最易擾民定章存案以垂久遠光緒二十二年署州楊文鼎續修州志將兵差一條列入係爲預杜中飽藉免擾累起見李振鵬到任時板已刻成但於篇前加叙一篇並未刪改尙無弊端又原叅家丁張雲台有私押無辜訛索銀錢之事經劉莪道控告有案一節查劉莪道係該州已革刑書州民葛有順因向葛鳳歧索欠爭毆致被用刀扎斃牽連葛有順子媳鄭氏謂與葛鳳歧通姦所致傳訊不認劉莪道旋與鄭氏有姦並向本夫葛廷彩價買爲妾葛廷彩之弟葛廷緩以鄭氏因姦釀命呈請辦罪復將鄭氏傳案劉莪道疑係值堂家丁張雲台從中干預控由府道飭州錄案詳覆至張雲台早經該牧驅逐查無私押訛索實據又原參灤州向有商船二千餘隻按年有稅該牧於常稅外多索新稅各落船稅約計每年可得百餘金經張運亨府控有案又隱匿升科地糧八百餘石亦經李清佐呈控有案等情一節查船捐數目從前無畫一章程李振鵬定以貨載捐東錢四百文人載捐東錢二百文空船不捐所收之項詳明作爲修理山道之用並無加收落船稅等情事張運亨係因漏稅被罰赴府妄控飭傳未到照例詳銷升科地糧查無隱匿李清佐係該州南衛社催書因與櫃書耿培第有嫌控其捏報民欠該牧查係虛誣薄責銷該此委查該牧被參各款之實在情形也臣查灤州知州李振鵬被人糾參經臣撤任查辦現據派出各員逐款查詢尙無貪劣實迹且當聯軍到境與其立約簽字

鐵路以南得免騷擾保護地面不無微勞惟該牧身體孱弱約束丁役不甚嚴整未可再任繁劇撥請開缺另補所遺灤州知州一缺應歸外補所有遵旨查明緣由理合據實覆陳伏乞 皇太后 皇上聖

鑒訓示謹 奏奉 硃批知道了欽此

山西道監察御史臣黃昌年跪 奏爲申明舊章嚴督程限以祛壅蔽而免稽留恭摺仰祈 聖鑒事竊
臣謹繹順治以來 祖宗諭旨明慎用刑凡送到在京死罪人犯刑部必詳加審擬成招定罪奏請下三
法司然後會同部寺覆核康熙十二年議准各省刑名分道御史與掌道御史一同稽核雍正三年議准
凡審事件刑部定稿取供兩次送堂官畫題續送部都察院畫題若意見不符或有兩議者應於五日內
繕稿送部一併具題至外省事件或有另議亦於五日內繕稿送部嘉慶二十四年議於定限五日外寺
院各增三日誠以人命至重不厭察理詳情典至鉅也乃近來會審會稿餽羊鈔存猶賴有秋審朝審分
送招冊得以悉心校勘共証矜疑自乾隆二十八年奏准刑部招冊於十五日以前分發各衙門積漸因
循輒難如限或竟至會議前一二日始行分送嘉慶七年御史瞿會輯條奏會議章程奉 仁宗睿皇帝
諭此項冊籍著該部飭司於秋審朝審上班一數日前分送大學士九卿科道等因欽此嗣於嘉慶十二
年給事中嚴烺奏會議上班第會於畫稿之後並不議於未會稿之先擬請將照例虛文停止當奉 諭
旨此等事件雖經大學士九卿會議實皆刑部衙門照例具稿傳次畫押各該給事中所云於會議上班
時將奏稿宣讀一遍殊屬有名無實朕意與其視爲具文莫若酌歸簡易旋經部議奉 諭仍著循照向
例至上班時將奏稿宣讀一遍轉似虛文殊可不必此後著即停止等因欽此嗣是科道屢以早送招冊

爲請而刑部仍前玩愒光緒五年御史甘體銘奏近年招冊分送太遲會奉 上諭著刑部恪遵定限於
上班十五日以前將招冊分送各衙門以符舊制臣忝列台垣思盡職守竊見今年秋審招冊仍於會議
前二三日始由書吏發給祇將督撫所擬摘錄略節一班之日書吏宣喝刑部擬定考語但聞某人改緩
決改情實及某人聲明留養各等語一過一時卽已闕散又各道亦有招冊並未見擬定考語臣從掌道
查得各省重案一省或有數百起之多宣喝何能徧及自是敷衍向章並非始於今日夫以 仁宗明聖
特傳宣讀奏稿之虛文則舊習相沿未嘗不可釐正擬請援照道光五年成案 皇上明降諭旨著刑部
將議定改擬考語彙齊繕刻於會議上班前五日分送其分送招冊日期一遵向來前十五日定限至書
吏宣喝考語旣已不能徧及不若止將刑部改擬之案宣喝一次如衆情允協卽定擬請題或意有難同
卽面商互証主稿無得挾成見罪名出入可實處分於具奏之前會議毋得有後言律例重輕非以攻訐
爲沽名之舉年來六曹判事惟刑部尙不假手吏胥而亦故違定章者其弊一在專擅一在規避以爲能
事旣盡豈借助於他人若稍有疏虞復受過於局外於是以規避而致故違以故違而成專擅不思有心
之罪大無心之遇輕故莫若寬其處分於具奏之先始能共協寅恭於會議之日庶幾明刑弼教屏去虛
文抑亦 朝廷勤求上理之一端也竊更有請者臣查吏律內外衙門公事小事五日中事十日大事二
十日原有一定程限若 諭旨特交之件皆當依限審結卽或有須彙稿行查閱追踏勘或人証難齊重
要公出除原有定限外亦當隨案聲明始准扣展乃近 督撫 比年事件有數年不奏覆者部臣有數
月不奏覆者在部臣督撫以爲方今講求新政無習習舊 豈知律例 日不更官民一日當守律例

即有改訂程限豈任遲逾法執變通之說、開玩泄之風、瑯瑯庶務振興所關匪細、應請 詔旨嚴飭、分別懲若、係書吏耽閣、從中舞弊、當戮其尤、桀黠者以儆將來、臣爲明刑懲政起見、是否有當、伏乞 皇太后 皇上聖鑒、謹 奏奉 旨一道

太子少保北洋大臣直隸總督臣袁世凱跪 奏爲已故大員至行可風懸 恩旌獎仰祈 聖鑒事竊

據新疆布政使署直隸布政使周浩直隸按察使楊士驤長蘆鹽運使汪瑞高清河道李樹棠東邊道袁大化記名道洪恩廣等聯名呈稱已故承襲一等肅毅侯候補四品京堂李經述安徽合肥縣人原任大學士直隸總督臣李鴻章之子由一品廕生刑部員外郎中式乙酉科江南鄉試第二十一名舉人故大學士奉 命出使俄德英法美各國 特賞三品銜隨出洋二十七年九月二十七日故大學士於全

權、臣差次因病出缺奉 旨承襲一等侯爵無庸帶領引見以四品京堂候補二十八年二月二十八

日以哀毀致病歿於喪次年三十有九該故襲侯生有子性操履端嚴故大學士以其奇慧夙成特所鍾愛故人學士總督直隸前後垂三十年文武實僚大半舊部該襲侯隨侍在署閉戶讀書未嘗有一私交問一外事親戚故舊亦無一人能干以私前居母喪哀痛嘔血故大學士見其毀瘠深以爲憂遇禮慟時輒手爲撫摩以慰在不毀爲勗該故襲侯乃強自抑制慮次則銜哀枕塊寢門則委婉承歡執禮無違一時和歎前歲大學士拜全權、臣之 命冒暑北來自冬徂春積勞觸疾時發時止至秋增劇臥閣五旬諒故襲侯跬步不離勞瘁臻至及大學士出缺旁觀早慮其不支未及二旬果以觸發痰喘舊疾綿延五閱尸身以不起故大學士身故後疊荷 朝廷恩禮飾終之典至優極渥該故襲侯每聞 恩旨卽感慟

逾時忠孝之誠根於天性固有鬱結而不可解者秉性本厚能耐勤勞隆冬不寒感夏不葛服食儉約有非寒士所能堪平日取予極爲矜嚴而見義勇爲性好施濟丙申廬州大湖之災丁西湖北之災倡捐巨金數至累萬至今鄉人道及感頌不忘自以家世受恩志在報稱勉爲有用之才歷代史事最爲研究旁及唐宋說部近而國朝故實凡有關治體者皆能講其源流一時推爲異才謂其成就方遠年未強仕遽以孝死有識同悲該司道等與共鄉關服官畿輔見聞既瞻不忍聽其湮沒弗彰呈請轉奏等情前水臣杏已故承襲一等侯候補四品京堂李經流忠勤卅胄學行兼優純孝性生至情可憫該司道等臚陳冬節均係實在情形李鴻章以壽率隕身朝廷軫念逾恒恩禮至爲隆重李經流仰承門蔭早鬱時名以有用之才際方壯之歲正期異日爲國家効力不負聖明延賞之恩迺以哀毀渡天天年深可痛惜伏讀光緒十二年六月初十日諭旨故國子監司業治麟至性過人學行粹美伊父景廉病篤時該員竭力侍奉積成羸疾丁憂後哀痛過深遂致沉疴不起實屬大性純篤孝行可風治麟著准其列入國史館孝友傳以示旌獎等因欽此仰見朝廷敦孝勵俗彰善樹風之至意李經流與治麟事同一律行述均卓然可傳合無籲懇天恩准其一例旌獎列入國史館孝友傳不墜宗臣義方之澤益徵聖朝孝治之隆理合恭摺具陳伏乞皇太后皇上聖鑒訓示謹奏奉硃批另有旨欽此

太子少保北洋大臣直隸總督臣袁世凱跪奏爲直隸防軍疊次剿平拳匪各匪謹將在事出力文武

員弁彙案擇尤開單懇恩獎敘恭摺仰祈聖鑒事竊自庚子拳匪肇亂直境各屬所在蔓延一時不

逞之徒乘機構煽揭竿並起重以潰勇團匪土匪鬪梟與夫海洋之巨盜邊外之馬賊紛紛擾攘四出橫

行却掠焚燒恣意屠戮闔境糜爛幾無完土督臣李鴻章疊派各軍分投擊剿進戰數月賊氛稍戢而根株未淨伏莽猶蕃出沒靡常勾結爲患此拿彼竄動淹歲時雖各屬之聯莊團會概行解散民間之私藏軍火悉令繳還而漏網之匪徒跳梁之小醜猶不免伺隙蠢動致有重煩兵力之處迨次第勘定全境帖然而直隸各軍之負弩奔馳者自始亂以訖今固不知幾經況瘁矣上年八月李鴻章以甘肅提督姜桂題所統武衛左軍剿匪得力爲諸軍之冠專摺開單請獎又另片請獎浙江提督呂本元所部各營員會聲明此外各軍將士亦應擇尤酌保容詳加考核另摺續陳等因均先後仰邀 俞允在案及臣蒞任後各軍陸續呈請 奏獎臣以各軍開單列保人數未免過多而呂本元上年謹保數十人李鴻章以該軍人衆曾許續保俾免向隅此次亦開列至百餘人均經臣駁其浮濫各將原單發還飭令從嚴刪汰現據久該軍以減定人數另單早送前來臣稍加詳核查閱署貴州提督梅東益一軍駐紮直隸交界之區轉戰畿南北之地甲兵多戰有餘疊次剿平大城文安霸州定興雄縣涑水任邱吳橋景州滄州南皮鹽山等處 匪大小數十戰始終弗懈擒斬最多保全甚大勳勞實爲卓著此外則前署天津鎮總兵章高元剿平景州故城甯津東光吳橋南皮青縣靜海等處之匪正定鎮總兵董履高剿平安平深澤定州曲陽高邑晉州等處之匪通永鎮總兵李安堂剿平大興三河昌平順義懷柔等處之匪大名鎮總兵何永盛剿平永清固安新城雄縣容城任邱甯津等處之匪宣化鋪總兵何乘熬剿平口外及本境各屬之匪統領新盛軍記名提督鄭才盛剿平深州冀州衡水棗強武強新河等處之匪統領淮軍毅字營記名總兵郭學海剿平寶坻三河香河通州寧河武清東安永清固安等處之匪多倫諾爾京協副將胡金元擊走

地甲卅字等處之匪統帶常備軍等隊記名總兵吳鳳嶺統帶練軍等隊補用參將孟恩遠管帶巡警隊
候補直隸州知州趙秉鈞會剿祁州博野蠡縣清苑饒陽安平深澤等處之匪天津交還後又經天津鎮
總兵吳長純督率各營會同地方官搜剿沿河沿海一帶餘匪以上諸軍帶甲邊征裹糧轉戰馳逐於酷
暑嚴寒之際出入於鎗林彈雨之中或陷陣衝鋒殺敵致果或臨機策應險冒出奇莫不戮力誓心備嘗
艱苦用能使凶渠悍匪依次剿除髮櫛苗孳不留餘孽 畿甸一律廓清閭閻得慶安堵現在時局平定
而洎論功績實不忍沒其成勞自應照姜桂題呂本元兩軍剿匪請獎成案擇其在事尤爲出力者悉按
異常勞績列保惟事閱兩三年之久人萃十餘軍之衆併案彙獎核減主再合計之雖見爲多分計之實
形其少要於鼓勵羣材之中仍寓矜慎名器之意不敢稍涉冒濫謹繕清單祇呈 御覽合無仰懇 天
恩俯准均照所請給獎以爲効命行間者勸出自 鴻施逾格飭取各該員履歷送部查核暨千總把總
以下咨部核獎並各軍陣亡員弁另行查明奏卹外理合恭摺具陳伏乞 皇太后 皇上聖鑒訓示謹
奏奉 硃批該部議奏單併發欽此

太子少保兩品頂戴湖廣總督臣張之洞頭品頂戴湖北巡撫臣端方跪 奏爲鄂省先後裁撤各營並
將現有各營更換各紳帶督帶管帶恭摺具陳仰祈 聖鑒事竊照前准兵部咨光緒十五年十月二十

八日奉 上諭各省防營如有更換管帶員弁或移紮他處者隨時奉聞欽此查鄂省前因沿江富有票

匪作亂各種會匪乘機蠶起防務吃緊長江上下游及邊境各要隘風鶴頻驚添募各營分布防剿疊將

匪首捕拿懲治地方漸就安謐當經酌量緩急情形分別裁撤更換以節餉需因將江安一底營裁撤酌

京報 卷二 二十四 十月十九日中外日報附送

留勇丁五十名改爲沿江督捕營委湖北補用知府現署夏口廳同知馮啓鈞兼帶復因沿江匪徒伏莽未淨飭本任長樂縣知縣竇以莊募勇五十名專司沿江緝捕改委本任襄陽縣知縣李祖蔭接帶又因李祖蔭另有差委改爲歸併現署夏口應同知馮啓鈞接帶籌度沿江緝捕情形酌量添募以資分布梭巡取名爲沿江下游緝捕營又裁撤武襄第一第二第三第四共四底營其第二營駐紮老河口該處商賈繁盛教堂林立不可無勇彈壓保護當飭原帶該營之參將陳金元於撤勇內挑留兩哨改爲襄防右營仍委該將管帶歸安襄鄖荆道節制照舊駐紮老河口巡防又荊州沙市地方原設沙防兩底營飭令裁撤續添之前後右三底營其統帶官補用道朱滋澤在省另有差委改委遊擊蔣聲耀督帶兼帶中營其管帶左營遊擊蕭貞福病故飭遊擊姚紹期代理前募駐省武建八底營分爲左右兩旗練習洋操因該營督操官副將張彪訓練有效委令兼充統帶並委左旗第一營營官同知劉承恩兼充左旗四營督帶右旗第一營營官縣丞楊汝欽兼充右旗四營督帶又駐防漢陽之漢靖襄陽棗陽之襄防新營宜昌之宜勝營麻城羅田之武勝新營利川之利防營四家鎮之砲隊營並提督周升所帶漢江緝勇均飭一併裁撤宜勝營遣出宜昌鼓樓背防地令宜昌鎮所帶宜防營撥勇兩哨填札按三個月輪流換防飭素諳砲法之把總毛永興募勇五十名駐守田家鎮南北兩岸砲台又襄防馬隊右營馬勇二百五十名飭該管帶叅將婁成立裁撤一百名又由湘調鄂之威字三旗飭令統帶候選道黃忠浩照湖北營制分別裁減挑留兩底營改名武忠左右兩營駐防岳州掙扼武漢上游又駐省武愷中前左右四營改名爲武愷第一第二第三第四等營仍歸提督吳元愷統帶並將兼帶之中營現改第三營委候選知縣楊自新

管帶又原派彈壓鐵路護軍甲乙兩營分札漢口起至河南信陽州一帶按段防護未能會集操練且因鐵路加長防地加廣應添派兩營與原派之兩營輪流換防以便操練飭令原有漢防三營撥去兩營改爲護軍鐵路丙丁兩營歸原統鐵路營副將張彪兼統並飭管帶鐵路一營遊擊謝樹泉兼充四營督帶並飭管帶護軍右旗第一營知縣楊蓉第管帶鐵路甲營遞遺護軍右旗第一營事務委知縣劉錫祺接帶其餘漢防一營仍歸參將陳士恒督帶又管帶襄河水師前營漢陽鐘標中軍遊擊陶運亨病故委候補知府理學夏日蘭同知馮啓鈞接帶管帶襄河水師中營兼總查襄河水師五營提督謝得龍病故委本任襄陽縣知縣祖蔭接帶兼總查襄河水師五營隨時周歷巡查以資整頓所有湖北裁撤募防營並將現有各營更換管官統帶督帶管帶緣由除咨部外謹合詞恭摺具 陳伏乞 皇太后 皇上聖鑒謹 奏 硃批該部知道欽此

張之洞等片 戶部定賠款部撥湖北省裁減營勇作爲旗兵加餉銀十二萬兩一欸已久無著前經臣等 奏請改撥奉 硃批戶部知道欽此旋准戶部咨湖北裁兵節餉一項係應解部之欸未便以欸久不解遂成無著各省欸項同一支絀無可撥解仍令照數批解等因查光緒十二年湖北省裁勇節餉每年並無十二萬兩實只七萬三千餘兩此項原係有著之欸二十年中東事起 奏明添募援防營勇嗣復加餉練洋操新軍籌辦江防防增募勇營總計每年勇餉較二十二年以前數已逾倍極力供支時形竭蹶安實無餉可節歷年實用實銷冊內造報石案以稽此裁勇節餉實無存項之情形也至裁兵節餉作爲旗兵加餉一項查舊案光緒十年裁減各營兵餉每年節省兵餉米折銀五萬三千五百餘兩

所有節省銀兩業經按年解至光緒二十年為止計自二十一年起截至二十七年止除奏准截留歸還
息借商款本息銀兩外其餘之銀業於二十四年至二十七年先後經部撥補鹽釐案內指撥裁兵節餉
銀共四十二萬兩均經遵照部文奏解鹽道為撥補鹽釐之用尚不敷部指撥補之數所短尚多此又裁
兵節餉實無存項之情形也綜計裁勇裁兵兩項早經用罄既已無著之款指為常年認解的款實屬無
從籌解前因核准行在戶部電令將騰出前項旗兵加餉勻分十二次先將第一次銀數於十二月二
十日以前匯解等因當以款關中外交涉限期已迫未便稍涉拘泥致滋延悞即於留存加放俸餉各款
內挪撥銀兩季解附片奏請改撥在案理查提加放俸餉十萬兩加復俸餉一萬六千兩加增邊防經
費一萬六千兩共銀十三萬二千兩計自上年十二月即西歷一月起至本年六月即西歷七月止共已
解過銀十四萬七千兩又補關平銀二千四百十五兩二錢一分共解過銀十四萬九千四百十五兩二
錢一分除應解銀十三萬二千兩外計多墊解銀一萬七千四百十五兩二錢一分止擬督同司道核議
奏明請戶部撥開前因臣等伏查戶部責令北庫數批解如湖北力能籌措斷不敢請戶
部以撥徒令部臣為難無如湖北各款不外下漕關稅鹽課厘金數大宗以收抵支總屬敷
銷可按近年且至挪借商款款應付豈能再有盈餘可供指撥即現在新籌湊繳大財款膏捐簽
捐項約計將來可轉之款以賠款之數所差尚多而以前報解彌縫尚屬此
節餉一萬兩一欸季實欸提此欸關係交涉若不實直一有貽悞何能當此因
關是抽五稅項准文通各海即足值百五已商有成將

稅究能徵收若干應將增收數目專爲賠款應用各項此次分攤之款尙可酌量核減等語查此項增稅各海關按月提出解交海關道存儲現距一年期滿之時不遠滬關積存甚鉅而戶部劃撥應解部款三百萬中此等指撥無著之款他省或亦難免似應查明部款三百萬實在短少若干先由滬關彙存增稅項下按數提出再將部撥無著之款核明免解如此轉移並無出入再四思維惟有仰懇 天恩飭部查明擬定改撥免致有悞賠款要需如此辦理部款所指無著之項毋應復由部庫改撥可以稍濟戶部籌畫之艱湖北亦少免輾轉虧挪不至因應俱窮此實策之較善者再查湖北江漢關自上年十月起增收足五稅項每月所增之稅均經報滬關存儲又宜昌常關改歸稅務司徵稅亦有增收之項解交滬關均存爲攤還賠款之項查核漢宜兩關增收稅銀雖不敷撥此項銀十二萬兩要可藉資湊解或即以該兩關所增常洋稅銀爲撥解此項之需懇並 敕部核議施行惟每年尙約短銀數萬仍不能不請戶部另行籌撥似不如由滬關彙存增稅項下照數統撥銀十二萬兩較爲賅括簡易以免一欸兩籌轉致繁難據湖北布政使瞿廷韶善後局司道會詳請 奏前來臣等謹合詞附片具陳伏乞 聖鑒謹 奏奉 硃批戶部議奏欽此

盛宣懷片 再庚子七月以後 行在政務煩劇 詔旨頻頒加以東南保護之約全權議和之役京師及各行省合使臣往來問答萬里瞬息悉惟電局是賴維時臣卽嚴飭各該局員學生諭以事機危迫傳遞官電皆關緊要倘該員生等或不不小心致有洩漏或所轄桿線損壞致有阻滯定必從嚴懲辦如能線路暢通遞報慎密定必從優獎叙通行在案計自軍興而後以迄 回鑾各該局懷遵臣復於和局定後

褒其成勞許以 奏獎各該員感激企望爲日已久似未便失信於下僚且現議商約京滬江鄂往返會
籌仍賴電音通達督臣張之洞屬臣以要電如不遲悞應許優給獎勵夫用人之道激其將來必先勉其
已往伏查 行在官電局委員學生均經請獎仰蒙 恩准已照異常勞績優叙欽遵在案京城官電局
亦經外務部咨明臣處酌核辦理各局員生著有微勞事同一律容臣隨後嚴加汰核擇尤保獎伏望
天恩俯准以資鼓勵而免向隅謹附片具陳伏乞 聖鑒訓示謹 奏奉 硃批准其擇尤酌保毋許冒
濫欽此

盛宣懷片 再臣創辦電報歷年既久舉凡購料勘工悉與西國公司參互考核一事一物皆有定程張
家口外沙漠荒積承辦之員率以工作艱難藉詞糜費而俄國以恰克圖電線係總理衙門奉 旨訂定
期限建設不容稍緩時日臣於光緒二十五年二月改派已革在任卽選道江西餘干縣知縣何其坦前
往建設先經 奏請俟全工告竣查明限期用費電工三者符合程度籲懇 天恩從優給獎否則立予
懲究奉 旨該衙門知道欽此嗣以何其坦辦事勤奮操守廉潔限內工竣據實奏保光緒二十五年十
二月欽奉 硃批准其開復原官欽此旋准部議以被議人員未經咨部率行差遣於例不符聲請更正
逮北方匪亂直隸全省電綫被燬各路消息梗阻南北機緘全賴烟台接轉其時各國兵船齎集臣派何
其坦前往駐守會同局員督飭學生晝夜遞報免悞機要及至上海烟台大沽海綫造成烟局稍可放鬆
乃查近京至張家口外電綫電桿被燬殆盡臣以何其坦奮勇耐勞卽行籌款奏派前往修復並請將何
其坦交臣差遣委用二十七年九月三十日奉 旨著照所請該部知道欽此臣卽責令兼程往修尅期

銅計舍此別無長策愚昧之見仰懇 天恩飭部酌議如尙可行應請 旨飭下四川督臣轉飭鹽道官
運總局遵照辦理按季解滇毋得延悞所有京銅勢不可停銅本必須有著敬陳愚見懇 恩飭部酌議
緣由謹合詞恭摺陳請伏乞 皇太后 皇上聖鑒訓示謹 奏奉 硃批戶部議奏片併發欽此
護理山西巡撫布政使奴才趙爾巽跪 奏爲酌擬晉省兵數餉力先練常備軍十旗並遴派分統管帶
銜名繕單具 奏恭摺仰祈 聖鑒事竊照升任撫臣岑春煊於光緒二十八年二月奏請改練常備續
備各軍奉 旨交政務處會同各該部覈議嗣於七月初六日報明常備軍左翼步隊一二三四旗右翼
步隊二四旗馬隊第一旗業經成軍並裁撤防練各營又電請晉省常備軍內酌帶兩旗赴川均先後奏
遞 聖鑒在案奴才伏查自強之本莫先練兵而練兵之端尤以肄習新操爲要務在晉省防練全裁綠
營行將汰盡如爲整軍之計自須趕練常備軍屯訓練方足固 京師之屏陝豫之輔惟查原奏常備續
備各軍需餉八十餘萬以綠練各營養廉俸餉米豆全抵外不敷尙二十餘萬軍火雜支等并未估計在
內刻下晉省庫欸支絀籌供兵費賠欸教案賠欸百計羅掘短絀仍多本年夏旱過深秋霜過早早報成
災已有多處止賦且難悉完籌餉更多窒碍若必待認籌之二十餘萬已有著落再議成軍恐致稽延時
日轉慮戎備查七月奏案常備軍共成馬步七營旗除調川兩旗晉省止存五旗數與司道再三籌度以
原奉砲隊係中外軍制所共重且爲命中制勝之本馬隊馳騁利便與步隊有犄角之勢均關緊要應趕
練砲隊兩旗馬隊一旗補練常備兩旗合之原存馬步五旗共成十旗分隸左右翼計該兩翼所將步隊
三旗砲隊二旗馬隊一旗衡之原奏規模粗具以山西幅員之廣卽照原奏之數當嫌兵力不敷而以度

支之繼卽照現減之數而苦餉力不支當在 聖明洞鑒之中特是晉省洋操將領遴選殊難現查新軍
旗數尙未設齊事務甚簡擬就原派分統管帶等及現行遴派者酌令兼攝其餘新軍一切差使亦慎選
員弁量爲減少俟款項籌足兵數設齊再由晉省酌度情形查照原奏分別辦理其分統管帶銜名一併
繕單報明立案撫標親軍一旗亦飭卽行招募以資教練續備軍暫照升任撫臣七月奏案已設旗數分
駐訓練綜計現有常備續備各旗共需薪公餉的軍火雜支等項銀五十餘萬兩必俟綠營全撤悉以廉
俸兵餉米豆抵支方能敷用其餘未練各旗俟續籌有款卽續行添募以符奏案而重營伍等情由署布
政使吳廷斌署按察使胡湘林署冀甯道吳匡曾詳請 奏咨立案前來奴才覆查晉省兵伍之疲弱營
汛之散渙形勢之吃重振興之宜亟歷任撫臣奏內均詳言之刻擬改練新軍原期一振疲惰漸進精強
況當款絀如此時棘如此尤非破除情面嚴加整飭無以肅軍紀而勵士心至籌款爲練兵之本察看晉
省本年情形新軍餉項措畫已久仍嗟仰屋此後能否集有成數實未敢預計總期立此時之基礎待異
日之恢張仍一面傳知該分統等認真督練實力講求宣布 朝廷整軍之意曉諭晉省籌餉之難倘查
有侵扣廢弛情弊卽當遵 旨嚴懲以期漸收實效上副 朝旨整飭戎行之意再議改常備各軍奏案
前准政務處咨覆已飭籌議容俟續行具奏合併聲明除分咨查照外所有酌擬晉省兵數餉力先練常
備軍十旗并遴派分統管帶銜名繕單 奏明各緣由理合恭摺具 奏伏乞 皇太后 皇上聖鑒敕
諭立案施行謹 奏奉 硃批該部知道單併發欽此

爾崇片 再晉省太原等府州所屬本年夏來歉收緩徵上忙錢糧及得雨較遲補種曠禾並酌辦撫

恤各情形曾經升任撫臣岑春煊兩次奏陳在案滿望秋成告稔雖失之東隅猶可收效桑榆乃疊據徐溝沁州長子屯留趙城等州縣稟報於七月初四日及八月初五日被雹太原榆次太谷交城汾陽甯鄉長治沁源遼州清水河等廳州縣稟報於八月二十二三等日被霜太平縣稟報被蟲被霧秋禾成災臨汾洪洞等縣稟報秋收歉薄各等情節經批飭該管道府州及委員馳往督勘會勘並於被災最重之區先行發銀提動倉穀以資賑放其錢糧應如何分別捐緩之處統俟勘覆到齊再行彙案奏乞恩施聞被霜地方較廣如續行報到仍當一律勘辦以重民瘼伏查晉省近來一年連遭荒歉樂歲罕逢本年得雨遲而隕霜早秋收失望之處民力拮据其錢糧未能照常徵收入款頓絀自在聖明洞鑒之中而公約之償欸本省教案之賠欸爲數太鉅卽歲事無愆尙苦不支矧又遭偏災且頒賑撫從何取給奴才與司道等早作夜思點金乏術不勝焦灼所有秋災大概情形謹先行附片據實奏聞伏乞聖鑒訓示謹奏奉 硃批著卽安速查勘具奏仍於災重之區先行酌撥銀米以資賑濟欽此

奴才瑞洵跪 奏爲奴才前往阿爾泰山須俟明夏先將應辦事宜預籌布置請 敕借撥欸項以濟要需繕摺具陳仰祈 聖鑒事竊奴才前於本年四月間 奏請索還阿爾泰山借地安插哈薩克等因一摺奉 硃批著卽親往履勘將該處哈民清查酌度情形妥籌安插務令各得其所以前順輿情而重邊要餘依議欽此具仰 朝廷恩恤邊氓至意曷勝欽感自應遵 旨及時馳往詳查妥籌辦理惟查此路道途崎嶇強半山壩一交秋令卽大雪封山厚至數尺冷逾嚴冬人蹤斷絕向無郵驛從前會勘借地安撫蒙哈之役皆係先設台站方能行走現已九月中旬自難就道奴才之病亦未大痊騎馬前往實屬無能

少柱卽隨帶文武人員等亦須斟酌調派諸凡布置均費經營急切難期周妥況事關安撫蕃夷尤宜從容部署示以鎮定未便操之太急且哈薩克紛紛竄逸現在新疆者尙屬不少亟應先行收回方有歸宿亦免貽患鄰境刻正分別籌辦奴才熟思審處只可俟至明年四五月間再行前往其辦理收安事宜在在需款更非預爲張羅不可此項哈民現經查據該頭目總管等冊報所管哈薩克計二千五百餘戶人丁約在二萬四五千名口此外依附卡倫邊界住牧者尙不在內比年牲畜災倒率皆窮乏流離以光緒十年舊事相衡彼時由戶部撥給銀七萬兩撫恤偏重蒙古至哈薩克不過連類而及以致羣抱向隅未得同沾實惠奴才此行本以安插哈民爲主應撫之人較多又加安設台站駝馬隨帶文武委員以及親兵跟役通事薪費犒賞日用餼糧羊隻一切均非得有現款無從措辦此次安撫擬照前次賞給蒙古每二名乳牛一隻每一名乳羊五隻甄茶二塊之案將哈民之窮苦者每名酌量從減給與卽此已逾五萬兩之數其窮蒙尤須一律施惠方無缺望且哈衆由現居處所遷往阿爾泰山擇地住牧其無力者並須稍給遷費至撥分撥田畝發給牛具籽糧勸令兼習耕作以期各有恒產而盡地利尙當另議卽茲需款前估千萬兩之數殊覺不敷然旣奏明在先卽未敢請益於後只可由奴才設法撙節墊補第事體繁鉅需項孔殷雖奴才前於遼旨安籌經費內開單估請現已奉到戶部咨會候由各省將衛所屯田繳價稅契辦法議行報解卽行由部分撥第辦理收安事宜至遲卽在明夏仍屬緩難濟急奴才極知部庫不敷周轉而實逼處此萬不能不仰仗司農相應請旨敕下戶部暫行借撥銀五萬兩權應急需卽在將來分撥科城籌邊經費項下如數扣還庶事機旣不至貽誤度支亦無虛懸如蒙諭旨奴才卽派員

迅速赴京請領趕解回營應用所有奴才前往阿爾泰山須俟明夏先將應辦事宜預籌布置請 敕借撥款項以濟要需緣由謹繕摺具陳伏乞 皇太后 皇上聖鑒訓示施行再幫辦大臣瑞璋尙未到任未經列銜合併陳明謹 奏奉 硃批戶部知道欽此

瑞洵片 再奴才前准新疆撫臣饒應祺咨稱去年五月內有哈薩克人衆在喇沙爾塔什河地方強住貽害地方該哈薩克先云塔爾巴哈台所屬後又云係科布多所屬並不知究隸何城咨請奴才會同塔城派員查明押解回報等因當經奴才附片具陳奉 硃批知道了欽此嗣復准咨催辦奴才當以蒙古處前查該逃哈是否所管未能切實奴才未敢深信因將所管哈目總管等傳來城嚴加詢問始據稟稱此次逃哈實有所管在內因無準地住牧以致四出逃竄此外尙有潛往新疆者不止此數懇請收回安插妥地等情查該逃哈已據查明計有九百餘戶既係科布多所管自應查照撫臣原議派員往收奴才現派屯防參將世襲騎都尉祥祐帶領筆帖式兵丁並哈薩克通事等前往各該處查明一律收回以便明年辦理安插惟聞此次哈衆現在新疆各牲畜大半被疫駝馬倒斃尤多困苦流離殊堪矜憫茲既派員往收並應設法籌辦賑濟以資安戢奴才現飭糧餉處先於經費項下解撥庫平銀三千兩發交該參將祥祐携往各該處察酌情形分別辦理或購給糧石或添補牲畜迅速押解安靜回科以免再行出擾致貽口實此次銀兩應俟請撥款項領解到日再行歸還除咨請撫臣飭屬一體照料彈壓外理合附片陳明伏乞 聖鑒謹 奏奉 硃批知道了欽此

瑞洵片 再奴才擬明年四五月間前往阿爾泰山遵 旨辦理清查安插事宜竊謂科布多哈衆固當

安戢即爲塔城所管而有在借地之內住牧亦未便過分畛域迫令遷移應俟到彼後詳加察勘通盤酌度並當咨商春滿總以不失人心爲主庶期相安無事謹先附片陳請以釋 聖廬謹 奏奉 硃批知道欽此

頭品頂戴貴州巡撫臣鄧華熙跪 奏爲黔省邊防緊要添募勇營餉項無著籲懇 天恩准照上年賑捐章程展辦籌餉捐以濟要需恭摺仰祈 聖鑒事竊查黔省著名瘠區綠練營餉素恃各省協濟年來除四川一省照常撥解外其他均因自顧不暇應者寥寥來源日涸支絀萬分自去冬攤派賠款每年添籌銀二十萬按月挪移愈形竭蹶近因粵西游匪蔓延甚廣屢竄黔邊迭奉 諭旨嚴飭堵剿黔邊沿江上下幾二千里防務吃重不能不嚴密扼紮以免竄越曾將添營佈置情形於本年八月初十日續行奏明在案今以天氣久晴河水日淺粵岸過黔隨處可渡加以西陲邊境一帶夏秋缺雨頗形荒歉以致土匪莠民裹脅更易匪勢旣盛警報時傳八月十一二等日册亭州同所屬有游匪過河占站尾左馬黑等寨圍攻板蜂碉營之事十五六等日復有天河縣土匪糾衆偷渡過江竄擾羅斛廳屬馬場一帶勾結苗寨之事雖即登時攻剿潰散而防地太寬迭據各府州縣文武稟請添營援應因飭安義鎮岑有富招募鎮標練軍左右二營興義府石廷棟添募靖邊副營一營總辦邊防營務處道員張勝嚴添招中路新中一營均備興義一帶堵剿之用其羅斛廳屬附近均係苗寨良莠不齊最易煽動地接省城極當加意防維咨由署提臣何雄輝新募提標中前後三營聯絡分紮並飭中路練軍統帶副將徐印川添募中路新中一營均備各路之策應至都勻府屬與粵西之東蘭南丹思恩等州縣均壤地相接七月間匪勢日逼

大清光緒二十一年

時有竄越之虞會飭駐紮該處之遊擊副營都司宋秀廷添募兩哨防堵旋因粵西河池州失事人心惶惶復欽奉 電旨飭令認真堵剿當經派委總兵楊昌魁將抽調之銅仁鎮遠練軍各兩哨撥歸統轄並宋秀廷添募之兩哨合爲東路正副兩營飭令楊昌魁先往察看嚴密佈置至遵義大定兩府屬均與川省連界時有川匪百十成羣竄入劫掠動稱與教堂爲難藉此煽動遇有兵團巡查胆敢開仗有戕兵勇之事因飭大定協副將添募西路中營一營以資分路緝捕計自上月奏報後因沿邊上下游處處告警復經增添防軍十一營每營三百人共計本年先後共增防勇五千七百人合之固見爲多分之不過勉可敷布每月需餉約銀三萬餘兩兩軍軍裝鎗械川資用費一切尙不在內以庫款之入不敷出驟增鉅費知難於支持是以所添各營或選於內地丁壯或即用本地團勇或抽調別路練軍令其自行填補於招募之初已豫爲裁撤之地然游匪一日不靖防務一日難鬆卽糧餉一日不能或缺點金無術焦灼實深惟有籲懇 天恩俯念黔邊餉需關繫緊要准照本省外上年賑捐章程開辦黔省籌餉捐輸惟賑捐停止未久捐務勢成弩末所捐貢監封典虛銜翎枝仍照賑捐減成銀數辦理庶幾易於招徠不至有名無實一俟軍務平定防營遣撤卽行停止查前奉部文外省所收十成貢監捐銀概行解部黔省尙稱貧瘠上年勸捐集款已甚式微現在軍需待用甚殷情勢較迫合無仰懇 恩施將十成貢監捐銀概准留支以資補濟不勝迫切待 命之至所有黔省邊防餉項缺乏懇請准照上年賑捐章程開辦籌餉捐各緣由除咨戶兵部查照外謹恭摺馳陳伏乞 皇太后 皇上聖鑒訓示謹 奏奉 硃批該部議奏欽此

京報輯要 卷二 三十一 十一月初七日中外日報附張

巨竄次第清結諸獎出力文武援案擇尤酌保以勵勤勞恭摺仰祈 聖鑒事竊奴才等查西甯府屬界連藏衛蒙土漢回生熟番民雜處其間控馭稍疏毀端立肇其性情狡悍尤難撫輯者莫如生番一種查生番挿帳游牧住址無定偶凶口角細故糾衆械鬪讎殺不休強者愈肆欺凌弱者奔控文武衙門會派兵差查辦非恃衆抗官卽挈衆遠遁動經數年不能結案卽如貴德廳屬噶布族百戶都噶加因索債被噶加族百戶巷周加用砲擊斃一案係二十三年三月之事屢經控告抗不投案噶布族頭目遂糾邀番衆大舉復讎沿邊居民爲之騷動旋經派隊彈壓解散自是兩造逾結逾讎互相劫掠此貴德之番案大概也又循化廳屬狼家生番與雙棚生番因爭草山界址連年讎殺經官查辦旋結旋翻奴才聞普通武與奴才崧蕃往復函商非澈底澄清則愈殺愈讎勢必騷擾近邊牽動大局當卽派令候補道歐陽東清及文武委員等會同署貴德廳營宋之章李致中李士貞等指授機宜並酌調防軍分紮近邊各要隘剪榛除道揚言進剿以壯聲威一面繕發印諭遴選穩妥通更及素通番語之漢回正紳裹糧深入直抵生番老巢剴切開導令獻滋事頭目交官懲辦免其株連其兩造互傷人命互搶牲畜查照番規秉公抵算算結草山丈量清楚刊立界石分給印約各守各業不准越界侵佔傷斃番民按名酌給卹賞銀兩並賞給安分百戶茶布等物費令督率番衆各安生業否則兵已抵境定予痛懲兩造悚恐悅服遵斷各頭目均投案謝罪呈遞永不滋事甘結至宰奴才等已飭分別枷責發落並據委員等繪具草山圖說劃界立石詳請核銷並懇援案獎叙前來奴才等查番地毗連雪山每年三月以前八月以後大雪封山辦案委員及隨帶兵差人役往來冰天雪窖辛勞萬狀該文武等自二十七年春間起至本年夏間止將歷年警

殺巨案一律清結息爭端於當境消巨患於無形在事各員不無微勞足錄况歷辦番案均沐 天恩給獎此案事同一律可否擇尤酌保之處出自 逾格鴻施如蒙 俞允再由奴才等核實開單請獎以杜冒濫所有辦結積年番案請獎緣由謹合詞恭摺具陳伏乞 皇太后 皇上聖鑒訓示再此案係奴才闊普通武主稿合併聲明謹 奏奉 硃批准其擇尤酌保毋許冒濫欽此

奴才壽全奎瑛望岫跪 奏為承領米折銀兩經費難籌仍請 飭由山東將此款徑解 東陵以歸簡

易恭摺仰祈 聖鑒事竊本年六月間因內關防差役孤寡等譁索米折銀兩經奴才等奏請 欽派大

臣查辦旋經查辦大臣查明覆奏並附片奏請整頓永濟倉庫事宜奉 硃批戶部議奏欽此前准戶部

咨到議覆原奏內開 東陵查辦大臣敬信奏山東米折銀兩解部後該大臣委員赴部請領不如由山

東徑解永濟庫轉運較便運費較省惟領放米折亦有耗費請由山東耗米折價項下酌定數目變價撥

抵以備開支母任侵扣等因其東省粟米折價係彙總解交部庫由部分發 東陵 西陵及各駐防官

兵俸餉若 東陵各官兵應領米折由東省經解永濟庫兌交則 西陵及十四處駐防營亦須援照款

項零星恐東省礙難辦理擬仍照舊章但令東省每年將此項米折銀兩提前彙總解部該大臣等亦即

先期委員赴部支領等語伏查此項米折銀兩係自二十七年創辦始苦無舊章所以奴才等所派永濟

倉司員等連年辦理難臻允協既無章程可循又無絲毫經費不能不通融設法領取司員等竟蹈攤

扣之意差役孤寡亦罹徒流之罪職此故也前查辦大臣敬信所奏由山東將米折銀兩徑解永濟庫並

擬由耗米項下酌給經費實已洞燭難辦情形代籌殊極妥善迺戶部謂款項零星恐山東礙難辦理竊

以本然計。東陵八旗內關防及綠營每年應支領票米六千餘石折價銀十三萬三千餘兩並非佃款。該省專員運解不爲煩瑣且較解往部庫僅多三兩月途程而各省委解向由地方官換給車脚亦無耗費若由部轉發則須奴才等派員自行領運車脚盤費所費不資如遵部文先期赴部多日守候費用亦難爲繼總之此項銀兩先解戶部多一轉折於庫款絲毫無所裨而請領之本處廼大費周章卽山東亦無所獲益奴才等再四思維惟有仰懇 天恩俯准仍照查辦大臣敬信所奏章程 飭由山東巡撫將此項米折銀兩委員徑解 東陵永濟倉兌收照章散放以歸簡易而節虛糜至山東耗米折銀業經戶部奏明歸入節省解滬抵還洋款各門分放銀兩剪傷大耗一切經費照部咨由直隸總督飭司道運脚項下酌量籌撥再此項米折本係應支票所折銀兩自應仍歸永濟倉辦理庶免牽混合伊聲明所有承領米折銀兩經費難籌各緣由謹恭摺具陳伏乞 皇太后 皇上聖鑒訓示謹 奏奉 硃批著照所請戶部知道片併發欽此

頭品頂戴尚書銜陝西巡撫臣升允跪 奏爲遵 旨嚴切查明據實覆陳仰祈 聖鑒事竊於光緒二十八年七月十一日承准軍機大臣字寄六月二十一日奉 上諭有人奏廣東潮州鎮總兵蒯德浦盜賣官米招搖詐贓被控有案請飭查辦等語著升允按照所咨各節嚴切查明據實具奏毋稍徇縱原片著鈔給閱看將此諭令知之欽此欽遵 旨寄信前來當經欽遵飭委本任鎮安縣知縣許虎炳前往河南周 一帶嚴密察訪務得實情並飭署潼關廳同知趙乃普就近確查去後茲據該委員等稟覆前案奴才逐加查覆如原奏該總兵因陝州韓城縣等處糧價極昂遂將官米盜賣與福懋祥糧店仍折回

周家口收買糧米往來兩次以致停運不能周轉屢次嚴催故意遲延一節查該總兵初至周家口人多畏其威勢莫敢交易因託周家口之福懋祥號代買小麥于二十七年正月一面向車運往潼關一面由船裝運潔灣河其車運潼關之小麥無帳可查據車行稱發車不過二百數十餘輛潼關即于正二月間由戶部委員經收京斗小麥二千石約重二十八萬四千餘斤以周家口發車拉計此次所運小麥尙屬如數交到實未運多交少且陝州以南並無韓城縣惟有宜縣屬之韓城鎮爲南米糧車必由之道此鎮無福懋祥字號亦無一時能出數百金買糧之戶韓城鎮盜賣官米與福懋祥店查無其事其船運潔灣河之小麥查共八十餘萬觔包糧包所記實有官糧商糧之分商糧約共二十餘萬傳聞商糧爲福懋祥號所販該總兵是否商同夥販無從確知官糧商糧俱由汝州運陝州又由陝州運潼關並近省草灘所運官糧俱由潼關兼省倉交納其餘商糧隨地擇售亦不聞有盜賣官糧之事運糧遲延查周家口之糧必由汝州轉陝州又由陝州運潼關雇車雇船節節爲難一時不能力運前進衆日共覩事雖遲延查明尙非故意又原奏私招民勇與河南白米局爭車鬪毆傷斃數命及派勇各處拿車聲言載運官糧實藉此行劫商派並殺害人命被控有案一節查周家口汝州各屬並無河南白米局惟汝州有湖省白米局兩局爭車勢不相下幾至兩敗幸汝州妥爲調停尙無爭鬪斃命之事汝州署內亦無案可稽發糧運糧押糧交糧俱非勇丁力役不可該總兵招勇趨役事所實有各勇強拉貨車勒令卸載委棄如遺情似行劫實則客貨仍各妥寄行店並無遺失又原奏詐贓一節雖指有彭姓其人而籍貫銜名並未指出實屬無從訪查奴才伏思該委員等自奉札後留河南周家口往返一月有餘凡係曩月糧運經過之區周行

殆遍市井之口何知顧忌問者有意答者無心所述情形自尙確實可據原參該總兵盜賣官米招搖詐
贓各節或事出有因而不免言之已甚或以告者過而無實可稽均請無庸置議惟以爭車之故幾致釀
事已屬紀律不嚴至強拉貨車任意委棄該委員情似行劫一語出自各市人猶有談虎色變之勢則原
奏所謂橫戈躍馬甚屬爲害地方恐未必絕無其事雖據查明客貨尙無遺失而縱勇橫行該總兵實不
能辭其責夫一轉運賑糧雇用充役其數至少其事甚微而猶未免騷擾市廛洵洵不已矧總兵職司專
闡潮州地處海疆兵數之多責任之重不知幾什伯千萬於轉運賑糧此原奏所以有海疆重鎮恐難望
其得力之說也再查上年扈 蹕汴梁該總兵本無職事因車輛擁擠經大學士榮祿派令彈壓該總兵
遂藉此差使自稱爲軍機大臣營務處至設旗以相誇耀奴才會親見之原參謂其倚勢招搖即此一端
亦其明證總之該總兵被參各款雖未能一一查實而其聲名之惡劣奴才實不能曲爲之解應如何懲
儆之處 朝廷自有權衡非臣下敢擅擬所有覆奏緣由理合恭摺具陳伏乞 皇太后 皇上聖鑒謹
奏奉 硃批另有旨欽此

頭品頂戴浙江巡撫臣任道鎔跪 奏爲剿捕大嵐山匪徒在事出力文武員弁遵 旨擇尤擬保恭摺
仰祈 聖鑒事竊臣於本年八月間奏報大嵐山匪徒一律廓清請將出力員弁分別保獎奉到 硃批
准其擇尤酌保毋許冒濫欽此恭錄咨行欽遵在案臣查大嵐山久爲匪徒窟穴黨與衆多千百成羣肆
行劫掠勢燄鴟張若非及時殲除將成地方巨患光緒二十六年前撫臣劉樹堂憚祖翼先後與前署提
臣余宏亮商籌剿辦飭令附近各縣密爲戒備並於山口要隘派隊分防即於十月間調集防練各營會

同各該印委入山剿捕擒斬頭目焚毀賊巢迭獲首要各匪陳元水小癩頭等多名旋又於上海緝獲著名爲首之老攏麻一名均經訊明正法餘黨解散地方收平自數年前海疆多事游匪散勇互相勾結盤據山內根株已深其地勢外接海洋南連台郡此拿彼竄防不勝防向幸先事籌維嚴密布置扼要堵截節節兜圍在事員弁於嚴寒冰雪之時裹糧深入所歷皆窮巖絕壑爲自來人跡所未經而該匪兇悍異常往往憑高據險鎗砲齊發鑿連日我軍傷亡甚多前者殞生後者繼進奮力猛撲大挫凶鋒卒能於數月之間擒渠掃穴俾積年巨匪一旦廓清洵屬艱瘁不辭勤勞卓著茲由署提臣及營務司道開摺擬獎經臣一再覆核遵照部章擇尤分別開列未敢稍涉濫合無仰懇 天恩俯准照擬給獎以資激勸而勵將來其千把總以下由臣照章咨部核給獎叙仍嚴飭各該印委將善後事宜妥籌辦理以期永絕亂源除飭取各員履歷咨部查照外所有剿捕大嵐山匪徒在事出力文武員弁擇尤請獎緣由理合會同閩浙總督臣許應騫浙江提督臣呂本元恭摺具 奏並繕清單敬呈 御覽伏乞 皇太后 皇上

聖鑒訓示謹

奏奉

硃批該部議奏單併發欽此

督辦墾務理藩院尙書銜兵部左侍郎奴才貽穀跪 奏爲調辦墾務各員仍懇免扣資俸以示體恤而

昭激勸恭摺仰祈 聖鑒事竊奴才前因墾務事繁在在需員差遣會同升任撫臣岑春煊奏調京外各

員前來晉邊聲請免扣資俸業蒙 俞允在案茲接吏部咨稱該部具奏候選郎中熙煜等二十五員可

否仍扣資俸一摺奉 旨依議欽此仰見 朝廷綜核名實部臣慎守成規奴才自應欽遵辦理惟實在

下情有不能不籲陳 宸聽者晉邊開墾從前屢議屢格迄未果行奴才此次復奉 命督墾事同創舉

兼以邊塞之地天氣嚴寒風物迥殊人情亦異久居內地者往往聞風生長觀望徘徊晉省得力人員或擬咨調而先有要差或甫到邊而旋經調省其派辦墾務之員不過就差委人人數本屬寥寥是以開辦之初必須借才異地然前調各員中現在到差得力之員僅十數人就此十數人者分布於東馳西突之途往來於朔吹驚沙之地辛苦况瘁靡敢定居數月以來奴才在察哈爾豐鎮甯遠等處地方往返數次親見該員等晝司勘丈夜理文書受地者紛來爭田者待判加以蒙旗興墾動與交涉相關操縱之間尤資心力奴才方覺地遠差苦無以獎其勞惟恃慰勉交施冀生感奮該員等迫於公義許以馳驅有不賞而勸之心無行役懷歸之歎特以服官從政積有歲時舍易就難事非得已若遽停其選補恪守定章誰肯棄已往之資勞從事於荒寒之域况兩盟十三旗及察哈爾兩翼八旗東西不啻三千餘里事方經始在在需人使人皆愛惜前資紛紛求去則已來者尙退然思返未來者更裹足不前墾務之成期於何日在在需人使司銓補申明舊例自當事者之不得不然即奴才在部辦事亦必不稍假借但各員從公朔漠不避艱辛與尋常辦理局務者有間即就墾務而論亦與內省尋常辦墾者不同查從前各疆臣使臣調員差遣部臣亦有引案聲明者一經據實歷陳無不重邀 慈允今調辦邊墾各員事同一律其勞苦更有過之合無仰懇 天恩俯念墾務之重用人之難仍將前調各員及續調辦理公司人員一併免扣資俸出自 鴻慈逾格理合恭摺具奏伏乞 皇太后 皇上聖鑒訓示謹 奏奉 硃批著照所請吏部知道欽此

奴才增祺跪

奏爲現已派員勘辦札薩克圖王旗蒙荒情形恭摺具陳仰祈

聖鑒事竊查本年四月

間 欽差查辦哲里木盟事件大臣兵部尚書裕德會同奴才覆奏查明札薩克圖郡王烏泰疊被參控各節緣該王初因生計維艱欠債無款籌還始擬放荒招墾繼因不諳章程致墾戶日多佔地日廣梅楞齊莫特色楞等復袒護荒戶不准台吉壯丁在彼游牧由是積忿成隙計告不已近來該旗台吉壯丁亦深知耕穫之有益故一徑查辦札賚特王旗放荒收價每晌收中錢四千三百文以一半歸 國家作為報効以一半歸蒙旗自王府以下至台吉壯丁喇嘛分別等差各有應得之數此次開辦擬照札賚特成參酌增荒價以期兩有裨益謹將酌擬章程十條恭呈 御覽如蒙 俞允再由奴才奏派廉幹之員前往詳求辦法各等因於光緒二十八年四月二十九日奉 諭旨著照所議辦理該衙門知道欽此欽遵在案旋該郡王回旗後隨經奴才先行派員前往查勘得該旗陶爾河南北已墾未墾約有荒地一千萬餘畝當於七月十四日札派開復留都統銜總管依桑阿試用知府張心田為蒙荒行局總辦一切事宜帶用各員司人役分起馳往該旗將已墾未墾各地與該郡王就近商定荒價即一面試辦一面報由奴才奏明立案以免往返延滯並曉諭台吉壯丁此次招墾該旗荒地係為蒙民籌謀生計各宜仰體 皇仁安分當差聽候委員分別勘放儻敢造言生事從中阻撓惟有隨時嚴為懲辦以重墾務另於省城設立蒙荒總局一所選派妥員專司稽核收支一切案牘再該王旗遠距省城千餘里地方遼曠人烟稀少收歛丈地均須有兵保護彈壓方免疎虞並募馬步隊一百二十名派員管帶聽行局調遣所支餉項即由所收荒價作正開銷至前次酌擬章程十條其中如有應行變通之處奴才再為隨時查核奏明辦理總期上裕 國帑下恤蒙艱無負 朝廷軫念藩封之至意除分咨戶部理藩院暨哲里木盟長查辦外

所有派員開報蒙荒緣由理合恭摺陳明伏乞 皇太后 皇上聖鑒謹 奏奉 硃批著即認真經理以裕國帑而恤蒙艱欽此

頭品頂戴尚書銜陝西巡撫奴才升允跪 奏爲丁憂人員指部招搖漁利擬從嚴懲處以祛奸蠹而肅紀綱恭摺仰祈 聖鑒事竊查向來積習相沿各省常年奏銷以及軍務賑務各報銷均不無規費然皆爲數無多乃有前任陝西布庫大使馬惟浚由部書選授斯缺到任以後遇事招搖凡陝省請補請署各缺概稱部中索費補缺者急於邀准莫不羅掘輸資一或不從必遭指駁奴才前在糧道任內履有所聞徒以各牧令心知予受同科莫敢舉發故不得其實據該員於前年丁憂盤踞省城專以撞騙爲事近來賑務告竣奴才援照光緒三年成案奏請開單報銷荷蒙 俞允在案乃馬惟浚輒向賬局聲稱部書索費非六萬餘金不能核准奴才聞之不勝憤詫伏查上年欽奉 諭旨各部均改爲司員辦事部書不過繕寫札件收發公文並將三庫奏裁羣情 聖明獨著部吏婪索之弊自應迴異從前而馬惟浚於力除積弊之時作牢不可破之計造言挾制恣意招搖不惟於陝西之政體有傷抑且於各部之聲名有礙計該員到省數年勒騙同寅不知凡幾今又借詞索費至六萬餘金之多果遂所求按二八分成核計該員坐扣一萬二千餘金貪狡狂愚莫此爲甚據藩臬兩司會詳請叅前來相應請 旨將丁憂布庫大使馬惟浚革職永不叙用仍遞籍管束不准潛詣京師及各省施其故技以儆貪邪再查各部辦公本需經費與其暗中婪索居間中飽計莫若化私爲官擬請將府州以下補署各缺及各案奏銷向來需費若干者定一酌中數目隨案咨解名曰津貼銀兩雖部書亦得沾溉可否 飭下六部堂官公同酌議定一妥善

章程通飭各省遵照辦理似於公私兩有裨益所有特委劣員指部招搖緣由及化私爲官辦法謹專摺
奏陳伏乞 皇太后 皇上聖鑒謹 奏奉 硃批另有旨欽此

頭品頂戴開缺浙江巡撫臣任道鎔跪 奏爲浙江省隨辦洋務教案出力人員遵 旨擇尤併案請獎
恭摺仰祈 聖鑒事竊臣於本年七月間奏明隨辦洋務人員已逾六年中間時值艱危調和民教清釐
新舊各案始終奮勉著有勤勞援照南北洋山東成案請將出力各員併案彙獎奉到 硃批著照所請
該部知道欽此恭錄咨行在案臣查浙省自光緒二十一年奏明於杭州城外之拱宸橋地方開設商埠
劃定租界由是各國官商往來絡繹交涉事件日益繁多遂奏設通商洋務局派員專辦至二十六年北
地拳匪事起全局震驚浙省亦情形岌岌匪亂乘之當將各國官商及教士人等護送出境旋復會合江
南等省與駐滬各領事倡議互保訂約既定人心稍安而浙東各屬民教尙多齟齬嘉應萬德之案商籌
賠卹等款尙無成議至是台州之黃巖太平甯海温州之樂清玉環永嘉瑞安平陽紹興之諸暨衢州之
西安江山等處又疊出教案毀堂數十處搶劫教民房屋千餘家當經遴派委員分赴各屬會同營縣彈
壓巡防將被搶教民加意撫卹拿犯懲辦並飭逐案勘查核實估計二十七年正月飭派道員許貞幹督
率各員與英法主教切實磋商開誠布公反覆勸導將通省天主耶穌新舊各教案一律清結各該員在
事數年適值多故疊乘事機危迫之秋艱苦經營殫竭心力或當機立斷禁遏亂萌或事後調和消弭嫌
釁皆於大局深有裨助與尋常辦理交涉者不同且教案疏防各員均經奏明參處而出力人員未蒙優
獎不足以昭平允而示勸懲洋務局司道將隨辦洋務屆滿六年及辦理教案出力各員分別開摺擬獎

具詳前來臣覆加查核與南北洋山東等省奏准成案均屬相符查南北洋定章每屆二年保獎一次以十員爲率浙省自開埠至今已屆四次應保之期至前年變亂猝乘亦與東省情形無異各該員調利民教清厘各案實屬艱苦備嘗茲援照東省分別異常尋常擇尤擬獎未敢稍涉冒濫合無仰懇 天恩俯准照擬給獎以資鼓勵除飭取各員履歷咨部查照外所有隨辦洋務教案出力人員併案請獎緣由理合繕具清單會同閩浙總督臣許應騭恭摺具陳伏乞 皇太后 皇上聖鑒訓示謹 奏奉 硃批該部議奏單併發欽此

太子少保頭品頂戴湖廣總督臣張之洞頭品頂戴湖北巡撫臣端方跪 奏爲遵 旨查明知州被參各款確切情形恭摺復陳仰祈 聖鑒事竊臣等承准軍機大臣字寄光緒二十八年五月十八日奉上諭有人奏湖北蘄州知州凌兆熊疏性糊塗信任下役積壓公事縱盜弛刑以致持械搶劫之案層見迭出請飭查參等語着張之洞端方按照所指各節確切查明據實參奏毋稍徇縱原片著抄給閱看將此通諭知之欽此遵 旨寄信前來臣等當即札飭布按兩司確查密訪一面遴委湖北候補道趙濱彥馳赴蘄州按照原參所指各節切實查明稟復茲據湖北布歧使瞿廷韶湖北按察使李珉琛會查覆稱按照原參各層核明案據覆加訪查如原參蘄州知州凌兆熊歷官之處士民皆呼之爲凌糊塗嗜好最深俾晝作夜信用家丁差役賄賂公行一節查凌兆熊於光緒十九年到任二十六年調省二十七年回任先後在任十年於地方公事均能斟酌辦理且起家科目文理優長心地明白惟秉性寬和近於舒緩尙無糊塗之名該員平日性好讀書公餘時恒手執一卷又愛育士林一遇考試必親自衡文每至夜深

不寐所稱嗜好最深晝作夜者或即此傳聞之悞又該員操守謹飭頗知自愛前在州任時有家丁江靜菴性好游蕩該員當即驅逐此外實無信用丁役賄賂公行之事又如原參州署背水面山尙稱勝境該員復構園亭專以遊宴自娛一節查該員到任以來曾於州署後院造樓一座南門外構亭一椽均就原有基址自行捐廉修葺無關政事得失此外別無營造訪之本地士民僉謂偶一登臨亦未見其常往遊宴又原參兩造爭訟聽斷不明輒推案曰不管每年上控之案多至七八十起一節查凌兆熊此次回任審斷頗勤上控案件每月均有報冊可稽檢查尙不甚多至推案不管等語訪之曾經涉訟到官者據云並無所聞又原參州紳江樹芳繆樹人陳沛霖王金英及民人吳姓張姓等數家皆被匪持械搶劫巨贓雖經報案獲犯並不懲辦一人以致盜風日熾一節查該州於光緒二十四年十月十一日據永福鄉職員江樹芳二十三年十二月初三日據永平鄉貢生陳沛霖二十四年四月初十日據高山鄉孀婦繆洪氏二十四年九月初六日據安平鄉監生王金華先後呈報被盜強劫均經勘驗通詳繆樹人當係認洪氏之悞王金華當係王金華之悞惟陳沛霖一案尙未獲犯其餘案均經獲盜供詞忽認忽翻致未定讞現仍勒緝匪盜質審究辦並非獲犯不行懲辦此外查無吳姓張姓十數家被劫呈報之案又原參今年三月州紳許以唐家被盜匪陳鳳林陳爲普迭次偷竊後復糾衆劈門搜括一空并將婢媼輪姦幾至斃命委驗獲犯該牧仍欲釋放一節查光緒二十八年三月二十日據監生許棣華遣抱許藻卿呈報本月十六日夜被陳鳳林糾匪竊爲普等執持鎗械劈門入室先將門客許藻卿雇丁許賢佑等繩縛置地珠玉金銀衣服罄搶一空等情許以唐當即許棣華之悞原呈併未叙及輪姦婢媼情節凌兆熊親詣勘

驗拿獲陳爲普張許氏並據陳鳳林投案提訊前後供詞各執張許氏係許棣華家已嫁之婢先據供稱與其夫在逃未獲之張耀德串通勾搶嗣經獲犯孫發枝柴四爾賈宜元華中元等訊明持械夥劫許棣華家得贓不諱並起獲原贓給王認領續又拿獲艾瘋癩索天佑李宜元李容元等犯雖經艾瘋癩供有華柱元李容元輪姦婢媼等語當未質訊明確然僉稱并無陳鳳林糾劫情事查陳鳳林因陳爲普屢竊許姓許姓向其理論積有微嫌此次被搶之歹事主本不在家但據抱告許藻卿擬議之詞率行指控未可盡信臣等以案關重大節經批飭臬司將全案提省審辦以昭詳慎一面嚴飭務緝張耀德等到案質訊凌兆熊并無獲犯後仍欲釋放之事以上各節案卷具在委無掩飾等語并據道員趙濱彥稟復前情核與司詳大致相符臣等覆加體訪該牧凌兆熊兩任蘄州尚能謹慎從公不失爲安靜之吏被參各節當屬有因或并無其事均可毋庸置議惟查蘄州地方濱江近年長江輪船日增扒手游匪附搭往來每多滋事以故在今日沿江緝捕尤爲吃重凌兆熊性情和緩於州不甚相宜相應請旨將蘄州知州凌兆熊開缺另補以重地方除飭司督飭武昌漢陽兩府將許棣華呈摺被劫案內已獲解省盜犯研訊確情另行擬結懲辦并各案在逃夥盜仍飭勒拿分別究治所有遵查知州被參各款并擬議辦理緣由謹合詞恭摺具陳伏乞 皇太后 皇上聖鑒訓示再所遺蘄州知州係衝煩難三字要缺例應由外揀員請補合併聲明謹 奏奉 硃批著照所請該部知道欽此

爨之洞片 再湖北試用道任子齡向在湖南充當刑幕以臬司幕友兼充長沙府臬局幕友廣通聲氣冠蓋盈門省中州縣幕友大半皆薦其幕徒爲之非出其門下者公事輒加批駁是以通省官場畏之趨

承恐後聲名素劣曾經被人叅劾列款多端經前任湖南撫臣查覆幸免深究嗣捐納道員指分湖北試用初到之時尙屬安靜一年之後其狡悍情形日漸發露語言謬妄變亂是非通省要政無一不加梗阻該員若久在湖北必致官場習染敗壞風氣致蹈他省候補道把持全省公事之惡習方今屢奉 明旨掃除書吏積弊查劣幕之頑謬自是事事以因循搪塞爲宗旨專舞空文不辦實事與蠹吏同而其悍黠則又過之故欲除蠹吏必先自除劣幕始相應請 旨將湖北試用道任子齡勒令卽回江蘇原籍 敢下吏部將該員分發湖北省分註銷不准在湖北逗遛免致敗羣生事以肅官常臣等謹合詞附片具陳伏乞 聖鑒訓示謹 奏奉 硃批另有旨欽此

太子少保頭品頂戴湖廣總督臣張之洞頭品頂戴湖北巡撫臣端方跪 奏爲修築湖北省城沿江堤岸九十餘里工程完竣涸復官民田地數十萬畝恭摺具陳仰祈 聖鑒事竊照湖北省城之南保安門外白沙洲至金口五十里省成之北武勝門外新河起經紅關至春山三十里省城外江岸南起鮎魚南內之熊家渡北抵塘角十二里餘沿口一帶南路舊堤年久殘廢僅有堤形可按北路間有小埂每年夏間必爲江水灌入堤內之田數十萬畝悉成湖蕩坐棄膏腴居民耕種失業極形困苦且其中有於標江夏縣馬廠各數十里亦被淹沒畜牧無從實於民田官地關繫甚大查南堤爲前督臣周天爵所築現就日久坍塌前人苦心經營澤民惠政何容聽其湮沒且鄂省前數年疊被水災各屬貧民流離失所齎聚二澤間深虞滋生事端因思如將此堤修復既可以工代賑濟無數之窮黎又可永安州鑿得無數之良田維時湖北賑捐尙有存款是以力籌大修之舉爲一勞永逸之計經臣之洞於光緒二十五年春間先

將紅關至春山之堤分作八段派委各員興修是爲北路之堤民間舊日沿江偶因春漲築作土埂全不足恃一經夏漲或春秋稍大泛便至漫淹將沙湖大水郭鄖湖連城一片日江岸直抵磨盤諸止一帶一片汪洋現於北路三十里築爲長堤皆係以平地爲基因地勢之低昂定堤身之高低高一丈至丈七尺堤面一律寬二丈旋復於秋冬水涸將白沙河洲至金口之堤分作十段分別委員興修是爲南路之堤南堤較北堤地段尤爲廣遠堤內地段與過東湖門南抵入風山督標馬廠卽在其內有南湖湯孫湖黃家湖春林湖巡司河夏間江水內灌則諸湖及河道連成一片其舊存堤址大半距江岸甚遙今則於沿江附近改作新堤使舊日濱江被淹之地併包於新堤之內涸出田畝不可勝數計南堤綿亘五十里增築一丈餘不等堤面一律寬二丈工程尤爲浩大諄飭在事文武員弁督率民夫日夜趕築晴雨無間倍極辛勤得以歲事數年以來南北兩堤新堤之未隱者則復令翻築堤身之衝刷者則復令培厚堤身之較低者則復令加高南北兩堤之地面皆經屢加測量務令一律砥平現已一律工竣堤外僉令其種植柳樹之外栽種蘆葦以禦風浪而復護堤根惟外江之水既有堤以禦汎漲內湖之水須有閘以資宣洩因於南北兩堤擇地建閘數座因時啓閉蓄洩有資石閘工費尤爲艱鉅臣端方抵任後察看情形與臣之洞公同商酌以爲興大利不啻惜重費固始基乃克垂久長因委員詳加勘查按段培修長堤悉臻穩固臣等每於堤閘出有險工親往查勘督飭各員極力搶險幸保無虞此先後修築南北長堤及石閘之各工情形也至省城附郭一帶江岸十餘里向來舊有石駁岸之處尺寸較低且不盡有駁岸當江水盛漲雨潦日久之際城內之湖塘溝渠城外之濠梁港汶積水漫溢淹沒路衢不能啟閘以洩之入江而

外江之水繼長增高乃至泛及岸路侵入城闔不可不籌抵禦之方因將沿江舊有石駁岸之處增修加高使內水可洩外水不入并於武勝門外未有石駁岸之處一律加修石駁俾資捍衛其南北兩端與新築南北兩長堤相接之處則加築高厚土堤俾與長堤相等至石岸雖屬堅定惟以江水之激盪石岸內之沙土椿木不免有年久坐卸之虞仍須歲時撥款量加修補以期永久鞏固此又增修中段城外附郭沿江石駁岸之情形也南北兩隄既成之後涸復田土甚多有官地有民地有無主之地從前湮沒既久一時驟難分晰若不詳細清查實啓民間紛爭之端復經臣等派員設立清丈局按地勘丈詳加考察清出官地或仍舊爲畜牧之廠或撥作通商場界址之用或撥作農務局耕牧之需其民地驗有契據糧券者照契管業無主者分別發給執照令其繳租墾種現計南北兩路共清丈有官民田地近二十萬畝之譜係令各暢放湖水後南北兩隄內沿湖之地涸出者尙多其未及清丈及民間舊業無待清丈從前被淹現可免淹者殆不可以數計以後永澹汎災長安田宅在功雖艱受益甚鉅此又清查田畝之情形也其最有益者則北路紅關至春山一帶爲粵漢鐵路發軔之所此隄不築將來修造鐵路塞水填土工程甚鉅所費殆將以數十百萬計之築成此隄於鐵路經費所省極多裨益至非淺鮮尤有益者省城迤南之金口爲上游自湘岳入鄂省之門戶省城迤北之春山爲下游自黃州到武漢之要隘金口之山大軍山江狹嶺峻青山地方岡阜重疊此兩處皆可以置炮屯兵他日若武漢江防有事則由省城南至金口北至青山此九十里中皆有高岸平隄兵隊及馬砲車可以晝夜通行往來援應調度捷速尤爲省防勝算至此項南北中三段隄岸工程逾九十里修至二三次加以運造木閘增修石駁經費實爲不資賴

有以工代賑之款動用賑捐銀兩藉此挹注得以竟此全功應由藩司籌賑局核明確數彙同工賑案內詳請開單奏銷茲據湖北布政使瞿廷韶暨籌賑局司道具詳請 奏前來臣等謹合詞恭摺 奏陳伏

乞 皇太后 皇上聖鑒 奏奉 硃批該部知道欽此

張之洞等片 再竊查南北洋成案隨辦洋務人員三年奏獎一次近時山東省奏請彙獎洋務人員亦

經奉 旨允行各在案鄂省商埠久開惟從前交涉尚簡辦理較易故未敢將承辦洋務之員率請獎叙

自近年創興鐵路武漢爲南北樞軸長江商務日闢已駸駸直達上游於是天下大勢日漸趨重於鄂中

各國之賓從駱驛電牘紛紜幾於日不暇給而鄂省洋務之煩重亦遂不下於南北迨乎前年拳匪事起

畿疆告警全局爲之震動臣之洞等率 聖謨保疆定約其事甫經就緒而富有票匪輒乘機煽亂

黨羽徧布長江巢穴潛藏租界維時事幾倉猝瞬息變更當經督率在事各員密籌妥辦均尙克殫心力

不負委任嗣又因湘省教案屢見迭經揀派熟諳條約之員與各國領事教士等一併磋磨分別議結其

時西北鄰近各省凡商埠未開之處遇有交涉事件均歸漢口各國領事兼管實言日以往復籌商以及

平時之函電交馳無不以鄂省爲驛騎於是鄂中洋務且不免有兼顧鄰省之勞臣等核計近十年中變

故旣多情形迥非昔比所有隨辦洋務各員洵屬始終勤奮著有微勞合無仰懇 天恩准予援照南北

洋成案將歷年隨辦洋務各員併案擇尤奏獎并請此後每屆三年照章請獎一次以示鼓勵如蒙 俞

允應俟 命下之日再由臣等開單奏請獎叙斷不敢稍涉冒濫謹合詞附片具陳伏乞 聖鑒訓示謹

奏奉 硃批著照所請該部知道欽此

太子少保頭品頂戴湖廣總督臣張之洞頭品頂戴湖北巡撫臣端方跪奏為湖北書院院長品節可風懇恩獎勵以端教化恭摺仰祈聖鑒事竊惟朝廷設立學校慎選師儒所以培養士風修明學

術湖北地方居長江之上游天下之中樞形勢雄偉人文秀蔚其間圭璧之彥舟楫之才必有先達為之津梁名師為之模楷故能養成植榦炳耀膠庠臣等先後來治此邦問俗思賢時加采訪亟欲表章師範垂示方來茲查有興國州處士疊山書院院長萬斛泉曾於咸豐九年經前撫臣胡林翼專疏奏稱萬斛泉結茅山中讀書講道賊至時正襟端坐賊不敢近自相引去仰蒙文宗顯皇帝賞給頂戴光緒九年

前督臣徐宗瀛又專疏保奏仰蒙皇上賞給國子監博士銜是其學行端純一鄉感化曾荷先朝之寵賚後承聖主之恩言公論久昭士林翕服臣等聞萬斛泉今年已九十有三精神強健尙能日課諸生議論則正而不偏教思則老而彌篤及其門者類皆廉隅自勵不入公門以胡林翼所舉之耆儒至今猶在可謂楚國之蘭荃人間之鳳凰矣又御史銜蒙求書院院長吳兆泰居心溫厚持論正直主講省城經心書院有年喜論國事寤寐不忘江湖有魏闕之思松柏存歲寒之節前學臣王同愈重其為人疏稱其課士盡心成效卓著仰蒙賞還原銜吳兆泰感激涕零益自淬勵今年甫五十若聽其優游講舍不

能効力國家可為可惜倘蒙起用必不孤恩以吳兆泰立朝有節居鄉有教求之今日蓋不甚多近來風氣大開學堂廣設通知時務之士講求變法之時果能有辨邪正明義利者維繫其間收益更為

閔遠臣等區區之愚實在於此合無仰懇天恩將國子監學正學錄銜萬斛泉一員賞給五品卿銜或國子監司業銜御史吳兆泰一員可否飭令送部引見特加錄用出自逾格鴻施臣等為表章

師儒整頓士習起見謹合詞奏請伏乞 皇太后 皇上聖鑒謹 奏奉 硃批萬斛泉著賞給五品卿
銜吳兆泰著毋庸議欽此

太子少保頭品頂戴湖廣總督臣張之洞頭品頂戴湖北巡撫臣端方跪 奏爲兩湖書院監督分教勤
苦數年卓著成效懇 恩優獎以勵作育之功恭摺仰祈 聖鑒事竊維敬教勸學二者相資古來興國
者欲圖自強其端必基於此近者屢奉 諭旨令各省建立學堂海內聞風相告此誠文教昌明人才蔚
起之會也查湖北省兩湖書院係臣之洞到湖廣時所創建其規模較各書院爲最大初時有齋課而無
堂課有月課而無日課設立數年學生文藝斐然可觀惟是世變孔亟道術宏深不通博則無以開心知
不專精則無以得實用於是恪遵光緒二十四年九月三日 懿旨酌改章程區分門目於經史二者之
外立天文輿地兵法算學四門又於兵法一門分爲三子曰一兵法史略學專講歷朝史事之言兵者一
兵法測繪學專講測量圖畫理法以爲行軍之用者一兵法製造學專講化學有關製造鎗砲火藥之法
者凡八門每門延聘分教一人以監督董率之又立行檢一門監督司之每日早午兩堂分班講授每月
總計分數及行檢有無過失第其高下嚴其去取又以文士多弱習武可以自強於院後關操塲一所派
武備學堂優等學生及營中武弁每日傍晚時教以體操法行軍步法操鎗法騎乘法使之文武會通冀
復古制而監督分教督率經營於其間自朝至暮無時不與學生相左右風雨與偕甘苦與共蓋闔院師
生無一人不勤無一日不勞者此即仿東西各國學堂之意爲之以故學生一百數十人皆能恪守院規
不辭煩苦數年以來成材甚衆臣端方奉 命撫鄂屢到講堂考察功課見其整齊勤密文武兼資他年

院中人材必有出而匡濟時艱酬答 國恩之一日今年鄉試臣端方正充監臨官榜發後優等學牛中式至三十名其文字多能發抒忠君愛國之忱博通古今中外之故目前兩湖書院改爲兩湖大學堂院中儲養有素取才甚便且自願遵奉新章不以爲難不以爲苦是該監督分教等數年講究化導之功不可沒也竊思教育既有成效所有監督分教各員似應優予獎敘方足以勸將來謹開列清單恭呈 御覽合無仰懇 天恩俯准照擬給獎以勸師範而廣成才實於今日學堂要政不無裨益臣等謹合詞具

陳伏乞 皇太后 皇上聖鑒謹 奏奉 硃批該部核議具奏併單發欽此

謹將兩湖書院監督分教各員酌擬獎叙開列清單恭呈 御覽 監督內閣中書銜直隸霸州訓導紀

鉅維文學淵雅品行方嚴課士盡心終身不懈擬請 旨以內閣中書用 經學分教廣東順德縣廩貢

生馬負榆研精左氏之學人品端篤守正不渝擬請 旨賞給國子監學正銜 史畧學分教江南江浦

縣訓導陳慶年史事博洽經世之才擬請 旨賞給內閣中書銜 天文學分教布政司理問銜江蘇南

匯縣附貢賈文浩家學專門殫心訓課擬請 旨以教職選用 輿地學分教五品銜分省補用知縣鄒

代鈞曾到歐洲遊歷熟知險要博學通才擬請 旨仍以知縣儘先選用 算學分教通判職銜湯金鑄

有學有法啓迪擅長 兵法測繪學分教通判職銜羅照滄思密學精成就甚衆以上二員均擬請 旨

以通判選用

陝西巡撫臣升允護理山西巡撫布政使臣趙爾巽跪 奏爲議明陝岸鹽釐暫歸晉省徵用以紓商力

而裕餉源恭摺仰祈 聖鑒事竊查潞鹽引銷陝豫前奉 部飭舉辦加價經山西升任撫臣岑春煊以陝

豫兩省加價已重未能再加奏請 飭部勻撥當經部臣議令自行咨商各該省斟酌辦理在案嗣經奴才等往返咨照以潞鹽引銷陝岸既有前辦加價之每斤一文又有鹽厘每名十二兩現又新加每斤四文計已將至六文若再由晉省加價商力實有不逮而陝省新議加價本係指供償款若照晉省原議核減則償款無出又恐貽誤要需勢處兩難籌商至再奴才升允查明陝岸鹽厘之每名十二兩本係由晉代收解陝應用本年因議辦加價並將鹽釐歸陝現既晉省舉辦加價商力維艱且恐官滯私銷有虧課項惟有將陝釐暫歸晉用仍由晉併歸新加二文內徵收以期畛域不分兼籌並領惟是陝庫奇絀現將舊有之的款接濟鄰疆自應俟晉省商銷暢旺籌款稍易即照原案仍歸陝省自行抽收應用以免久懸似此暫為通變在晉無重累吾民之慮在陝無致礙償款之虞實於兩省均有裨益所有商由陝省鹽釐暫歸晉省徵用各緣由除咨部外理合會同恭摺 奏明伏乞 皇太后 皇上聖鑒再此摺係奴才爾

異主稿合併聲明謹 奏奉 硃批戶部知道欽此

雲貴總督臣魏光燾跪 奏為遵 旨設立雲南省城課吏館謹將開辦情形并妥議章程仰祈 聖鑒

事竊准吏部咨光緒二十八年正月十七日奉 上諭各省候補人員冗濫尤甚平時不加考察一旦使之臨民蒞事安望措置得宜近來各省已有奏設課吏館者自應一體通行惟重在考核人才不得視為調劑閑員之舉仍著該將軍督撫兩司等勤覈僚屬訪問公事以覘其才識並察其品行其賢者量加委任不必盡拘資格其不堪造就者即據實參劾咨回原籍統限半年具奏一次務當破除情面嚴行甄別不准虛應故事稍涉瞻徇致負朝廷循名責實之至意將此通諭知之欽此等因當經行司飭議簡易章

程尅期開辦在案臣維勢之強弱先視民心之向背而能係乎民心宣上德而抒下情者實莫先於州縣我朝廷於親民之官特重其選卑其職而不卑其權卑其職使之親民不卑其權使之治事兵刑錢穀無不寄於州縣以造其端苟一事之失常動基禍變於無形昔之教匪粵匪今之拳匪其初不過竊發於州縣果得明練之吏及其初而遏制則一人治之而有餘矣是以州縣實爲治亂所由起課吏尤宜加急自外侮迭至交涉愈繁濱僻壤遐陬教堂日見林立莠民趨之若鶩迨積不能平而其焚燬之事以起卒乃索賠受侮貽患無窮非得地方官信義足以固結民氣才識足以綏服外情一遇事機每難肆應曲當矧植維新之際振興庶務凡農工商礦學練兵諸事宜悉待次第推行卽無不借資州縣上年臣入滇以來日以甄拔賢能爲殄地處邊瘠人才尤形寥落因特設文職月課每屬試期躬親督課分別評取雖亦能知鼓勵然均不過驗其所已能而不能益其所未學欽奉 明詔特頒設課館吏臣擬取 大清律例及通商條約先與研習月定兩課觀其心得以期飭吏治而諳外情使知目前當務之急他如滇產五金則宜講礦學滇多曠土則宜講種植學滇重邊防則宜講武備學凡此度地制宜專門學術尙須待諸數年之後未可一蹴而責諸僻陋之邦也茲已於八月二十日開辦在省城西箭道設課吏館一所以藩司爲正館長遴委道員爲副館長并設提調文案收發各員經理其事就在省實缺候補各官選取同通州縣鹽務官二十員佐雜官二十員入館肄習資之以薪水加之以獎勵皆有定額其餘考取各員皆爲備取遇有缺出方准補送入館一俟經費充裕再行逐漸擴充其實缺亦必課試者任官惟賢不以循例之准補信其奉職之無虧也其有差亦准給獎者蒞事以治不以一端之歷練轉後於豫事之講求也

其館外各員准其早核日記者始屏之以生其愧奮終收之以廣其甄陶也其名署檔案准其自赴檢閱者考已成之事實卽爲推行之先導也凡爲辦法十條館規七條課程六條經費七條由司詳議來臣覆核無異惟有隨時督飭該司道認真課試其有學識過人者自當擇尤奏保次則遴委差缺其資質尙堪造就者分別勒限學習否則咨送回籍總必實事求是以副聖主循名責實求治育才之至意除將章程分別咨咨送立案外所有開辦雲南省城課吏館大概情形謹恭摺具陳伏乞皇太后皇上聖鑒訓示再雲貴總督係臣本任毋庸列銜合併陳明謹奏奉 硃批著卽督飭切實講求認真考核務收實效欽此

護理北洋大臣直隸總督布政使臣吳重熹跪奏爲蘆綱各岸滯銷原停引目實難復額請援案推展五年以恤商艱而保現課恭摺仰祈 聖鑒事竊照長蘆所屬直隸兩省引案前於道光二十四年停引十萬道嗣後迭經 奏准推展於光緒二十八年限滿經前督臣袁世凱飭司預籌復額旋據鹽運使汪瑞高詳稱蘆課關繫餉需現值庫欸支絀但能復引額斷不敢稍涉因循惟蘆屬直隸引地滯岸居多自停引以來從未領過六十六萬現行之引及庚子變亂以後私鹽充斥糜爛難堪各岸積囤私鹽難以數計官引益形滯銷若將原停引十萬道再行增復則引積愈多課增益重商力萬不能支必致叅懲相繼無裨實事有礙大局據綱商楊俊元等瀝情稟懇推展該司詳加體察確係實情請援案推展五年俟限滿察看核辦等情具詳 奏前來臣查蘆綱現行引六十六萬餘道歷年設法疏銷均未如數領運況值兵燹以後私充滯商情艱窘其勢實難再加相應仰懇 天恩俯准將原停引十萬道自光緒二

行省照例分發候補者尙不及半且需才亟則取才必須稍寬取才寬則選才愈可詳審現在本省課吏館業經遵旨開辦此次人員擬俟奉准後仍歸課吏館考課能者錄用否則或即咨回或仍交館督

課庶幾爭自濯磨羣才共奮賢能可以日出委任不慮濫竽屆時人與地宜才與任當煩劇之理教養之施亦必蒸蒸日上漸有起色合無仰懇天恩伏念根本重地大亂初平正當振興吏治准將該員各以本

班留於奉天補用俾資選任出自逾格鴻慈如蒙俞允內有應交足各項銀兩者仍令分別補交再行給咨送部引見除飭取各該員履歷咨部外所有援案請留人員緣由謹合詞恭摺具陳伏乞皇

太后皇上聖鑒訓示謹奏奉硃批吏部議奏單併發欽此

增祺片再奉天典史吏目兩班舊設新設額缺較多現在本省候補無人此次被効之員亦少應請

旨飭部揀發典史十員吏目三四員以資委用謹附片具陳伏乞聖鑒訓示謹奏奉硃批吏部知

道欽此

太子少保頭品頂戴湖廣總督臣張之洞頭品頂戴湖北巡撫臣端方跪奏為籌辦鄂省清丈屯田增

收契稅並酌定兼抽經費各情形恭摺仰祈聖鑒事竊照光緒二十八年正月十七日內閣奉上諭

各直省衛所屯田原為轉漕養贍連丁而設自南漕改由海運以來屯衛弁丁半成虛設屯項田畝私行

典賣輾轉糾葛弊端百出亟宜認真清查改歸丁漕以昭核實而裕賦課著漕運總督陳夔龍會同有屯

衛省分各督撫將各省屯田地畝逐一澈底查明令該屯戶報官稅契聽其受業將屯餉改為糧統歸

州縣官經徵有盜賣私售者亦飭據實報明定納正供不究既往更須嚴禁胥役需索苛收等因欽此又

於五月二十六日承准軍機大臣字寄五月十四日奉 上諭有人奏各直省衛所屯田詳飭清查核價以裕國帑一摺據稱近來各省屯田半係民戶頂替其私售價值約得民田常價之半現在衛所既已裁撤若將屯田一律清查可得巨款於籌餉大宗不爲無補等語著各直省督撫迅即認真清查分別委籌辦理詳晰具奏毋稍延緩原摺著抄給閱看將此通諭知之欽此遵 旨寄信前來節經臣等轉行司道遵照辦理並先將湖北各衛節同城各州縣兼署接收交代又以各衛屯產情形不一頭緒紛繁另設清理衛田局派委湖北候補道朱滋澤總辦局務與司道酌商籌辦以專責成各在案茲據布政使瞿廷韶督糧道譚啟宇會同該局詳稱湖北各衛多在水鄉歷有冲塌荒廢之區額徵屯糧蠲緩已經及半軍戶人口繁滋皆藉耕爲活非必家有餘裕若責令按畝繳銀小獨貧戶無此力量即小康之家非盡售田地不可至於民戶頂替雖屬不少然未必家皆素封且歷年久遠其中輾轉糾葛非惟難以究詰亦恐徒滋騷擾窒碍甚多繳銀一節鄂中實無從措手現擬先將屯項屯產議令遵 旨據實報官由司發給印契完納契稅一面由司局派員分赴各衛所屯坐州縣會同地方官澈底清查費屯頭戶首先將坐地方戶畝數目無論本軍丁民一律據實開冊報明按屯逐戶勘交以一戶管業之畝爲一塊造具魚鱗塊冊統一冊之塊數以舊戶別爲歸戶冊俾有田者實數報明無田者虛糧豁免其徵契稅之法則以軍田向無買賣應查比該地方民田價值如每畝值二十千以外者均照二十五千之價完稅值十千以外者照十五千之價完稅值十千以內者照十千之價完稅並照本年正月奏准成案統按六分徵收田價就地定估每錢一千即收錢六十文並隨抽清丈經費錢二十文以資辦公契紙由司局刊發蓋印給領聽其管

業得相轉售另繳契紙經費比擬契稅章程以畝爲斷十畝以上者繳銀三錢二分五畝以上者二錢五畝以下者一錢二分此外不准需索分文其替軍頂糧私典轉售之戶悉照軍戶一律辦理如有刁健之徒匿地不報即將田地充公按法治罪等因詳請奏咨前來臣等覆查各衛屯產本屬公田今改完丁糧即准報官管業此後田值得與民田相比較私行典售之價均約高一半產價較增即產資加裕是該屯戶荷 朝廷寬大之德世世無窮僅令按照民田完納契稅實爲力所能給分所樂輸之舉其所抽清丈契紙經費既別無可籌不爲苛索自應責令迅速開辦以期早就清釐至原摺所稱照值勘估定價追繳一層就事理論之則以公產而化爲私田取之誠不爲虐而就情勢論之則必售田而始能繳價出者實不能堪既據該司局體察情形恐形窒碍似可毋庸置議除仍督飭司局認真經理並咨戶部查照外所有籌議清丈屯田照完契稅各情謹合詞恭摺具陳伏乞 皇太后 皇上聖鑒謹 奏奉 硃批戶部

知道欽此

頭品頂戴調補浙江巡撫安徽巡撫臣聶緝渠跪 奏 安徽省沿江各屬上年被水成災情形較重擬

將籌辦要工急賑尤爲出力各員紳懇 恩分別給獎以示鼓勵恭摺仰祈 聖鑒事竊查安徽省上年

六月間沿江十九州縣同被水圩堤潰決老弱流離困苦萬狀經前撫臣王之春先後 奏報渥蒙 聖

恩疊沛 頒發內帑截撥漕折以資接濟均將收到銀兩分別賑撫在案臣於上年十二月間到任沿途

留心察勘民間田地尙未涸復麥收難望冬賑之後急需春撫接篆後又復詳加查訪大約飢民待賑以

上游之懷甯桐城下游之無爲州及和州含山等處爲最急圩堤工程亦以該三段爲最重當即督同賑

捐局藩臬兩司相其緩急工賑兼施俾貧民得以因工就食公家得以寓賑於丁其有老弱不能工作者仍酌量給賑以免失所一面廣勸義賑以輔官欸之不足開辦將及一年已據各員紳先後呈報竣事情形除下游無爲州一帶尙有添辦善後工程已飭原辦該處工賑之浙江候補道張士璠已革直隸候補道鄧賢輔一手經理應俟工竣再行核議外所有本省丁憂在籍紳士江蘇試用道陳際唐督辦之上游懷甯桐城一帶新堤二千四百餘丈培補老埂九千六百餘處添築永豐圩等處石閘五座鮑家村等石壩一道均已如式堅固經募振捐銀二萬二千九百餘兩米一千石已會同印委分途查放完竣又浙江義紳候選知府蘇秉彝自行募欸五萬餘金棉衣數千套散放下游和州含山等處急振修築江河內堤一百三十餘里圩閘三座骨塔一座並於和州所屬之雍家鎮含山所屬之銅城閘兩處各造善堂一所辦理就地各項義舉現亦一律完竣據振捐局署布政使聯魁署按察使毓秀詳請將在事出力員紳照案給獎並聲明陳際唐蘇秉彝二員自稱不敢仰邀獎叙履歷未據開送分別具詳前來臣詳加查察該紳等所辦丁振悉係親自督率工堅料實惠澤均沾閭閻已無閑言伏查光緒二十三、四兩年安徽省連遇水災籌辦振撫前撫臣鄧華熙將出力員紳奏獎有案此次工振並舉爲時既久需欸更鉅各員紳隨同陳際唐蘇秉彝二員或在皖省督工散賑或在外省勸捐不避寒暑始終其事固應酬其勞勸陳際唐前以知縣筮仕江蘇歷任繁劇勤政愛民能盡其職臣在江蘇時知之有素現在督辦堤工綿長一百餘里經募振欸數至二萬有餘舉重若輕有條不紊以昔証今益信其才具開展辦事實心蘇秉彝以外省紳士不辭勞瘁力任其難屆時將歷一年募捐幾及六萬并於丁振之外兼及各項善舉臣五月閱兵道

過蕪湖該員來謁面加考察見其循謹篤實好義急公証以所辦各事尤能不矜不伐條理井然洵屬才
長心細能耐勞苦以之身任地方必能整躬率屬不負職守論事則該二員勞心勞力艱苦備嘗理應奏
請給予獎勵以爲他日竭力核實辦工振者勸論人均屬有用之才合無仰懇 天恩俯准將江蘇試用
道陳際唐浙江義紳候選知府蘇秉彝二員送部帶領引 見恭候 聖裁臣爲錄用人才起見非僅以
其工振之勞績也至此次皖省水患既重且廣修復堤壩振卹災黎兼籌並顧較難措手與上情形實有
不同在事各員均屬異常勞瘁謹擇尤爲出力者十八員一併開單恭呈 御覽可否照原擬給獎之處
出自 逾格鴻施除將軍開各員之履歷咨部查核外理合會同署兩江總督臣張之洞恭摺具陳伏乞

皇太后 皇上聖鑒訓示謹 奏奉

硃批著照所請該部知道單併發欽此

河南巡撫兼管河工事務臣張人駿跪 奏爲查明豫省蘆鹽新案加價收數專備賠款要需恭摺仰祈
聖鑒事 照前准戶部咨議覆直隸督臣袁世凱請以豫岸新加鹽價四文照案飭商包繳銀二十四

萬兩一半留直備用一半撥解豫省等情一摺奏奉 諭旨依議欽此欽遵粘連原奏咨行到豫查豫省

新攤賠款數鉅期迫經升任撫臣錫良遵照部定章程就現在鹽斤價值每斤再加四文 奏明開辦蘆

綱額引十九萬三千餘道每引收錢二千二百文每年應共收錢四十萬四千餘串按時價合銀三十萬

兩有奇雖歷年銷不足額以八成核計可收銀二十四萬兩直隸原奏謂不及二十萬兩殆以開辦之初

收數或有短絀約畧言之現在嚴核功過責成州縣設法疏銷以期徵收暢旺部臣盱衡全局以豫省業

經開辦毋庸再由直隸飭令蘆商繳免涉紛歧所議至爲平允且以蘆商困累准將舊案已停之二文

加價暫爲寬免體恤商艱無微不至該商人等亦應激發天良破除積習認真措繳勉濟要需豫省本非饒富之區常年庫帑久已入不敷出奉派賠款每年至九十萬兩之多竭力騰挪實已無可挹注祇此新案鹽斤加併一項爲就地勉籌之款若直隸再分半留用勢必束手坐困貽悞實非淺鮮現既歸豫抽收應將此項盡數湊解賠款以本省之所出仍濟本省之用揆諸情理尤爲允當至議以河南舊案未免之二文加價前由直隸包繳自庚子亂後此款究竟如何著落行令據實聲覆一節查蘆商每年包繳豫省加價銀十二萬兩經交長蘆連庫按年分解戶部及抵撥河南償款歷經照辦在案前准直隸督臣袁世凱咨稱應解英德俄法息款自庚子被兵以後所有自光緒二十六年八月起至二十八年五月止均經奏准改由他省籌撥本年八月內應還息款運庫已如數籌齊海防支應局兌收劃抵等因此項包繳銀十二萬兩數年以來長蘆如何指撥如何騰挪豫省無案可稽應由直隸據實查覆據布政使延祉糧鹽道干維翰會詳請具奏前來臣伏查各省新攤賠款同艱窘然如豫庫之帑藏匱乏萬分爲難實更有甚於他省者此次籌賠款以鹽斤加價爲大宗部臣統籌兼顧深知豫省爲難情形准將蘆綱新案加價仍歸豫省抽收臣當督同司道嚴緝飭行銷蘆岸各州縣核實稽徵儘收儘解卽以此項盡數湊新案賠款庶騰挪應用豫力尙可勉支而直省少此截留一欸亦無大損所有查明豫省蘆鹽新案加價收數專條賠款要需各緣由理合恭摺具陳伏乞 皇太后 皇上聖鑒敕部查核施行謹 奏奉 硃批戶部知道欽此

魏光燾跪

奏爲添軍剿游餉糈無著請截留解欸預撥關稅以濟急需恭摺仰祈

聖鑒事竊查粵匪

頻年漫溢滇黔邊民受害迭奉 嚴旨三省會剿以淨根株嗣以釐定通省營制改設常備軍十二營續備軍二十四營及砲隊工程各隊共計萬人因開廣沿邊二十餘里不敷分佈陸續添募十四營均照常備餉章別作一軍專備剿游事竣裁撤所需薪餉無措業經 奏明另製籌辦在案茲據署雲南布政使會同善後局營務處司道劉春霖等詳稱計全省新舊裁併額設常續軍三十六營每年需薪餉七十六萬數千餘兩較之原定餉額不敷銀十萬兩有奇現又另設剿游十四營均照常備餉制軍需薪餉銀二十七萬數千餘兩連不敷之數綜計每年共短軍餉三十八萬餘兩此時不獨各省協餉久虛且於籌備賠款三十萬兩之外常年并有解部款項在十萬兩以上加以興辦學堂整頓武備議修鐵路選派出洋游學各新政同時並舉匱竭情形爲從來所未有部中現又指撥銅本三十萬兩搜剔不遺毫髮際此時艱勢迫羅掘盡淨既無可騰挪之款亦無可挹注之資部庫之空匱逾常各省關之艱窘相等若望格外撥濟勢有難能現雖籌有鹽捐一欸而通省添設團營購備鎗械製造軍火修建碉堡一切費用尙有入不敷出之慮目前黔邊興義河一帶迭報該匪越境竄擾粵邊泗城西隆西林各屬匪勢日見披猖滇防愈形吃重前因匪攻興義縣城告急時一面飛飭羅巡防營李德濂就近派勇馳往救援并派省防魏榮斌率營武威等三營星夜拔往會剿開廣古障等處踞匪亦不時乘虛出擾若非另立十四營專事遊擊攻剿僅恃早設之團營萬難分佈迭經嚴飭總辦南防營務現署臨安開廣道魏景桐督率各營團妥籌布置分途剿辦併會合黔粵各軍認真夾擊以期痛懲在案惟軍情緊急餉益不支再四籌維不得不先其所急擬請 滇省常年解部之新加士藥茶糖烟酒釐金及減平整頓稅課等項每年共解銀十萬餘

兩暫行儘數截留此外尚不敷二十八萬餘兩卽由蒙自騰越兩關徵收稅課項下如數提撥供支俾應
要需而濟眉急一俟游匪肅清再行照常報解並請部中免再指撥銅本以維邊局等情詳請具奏前
來臣查餉項支絀京外皆同而粵匪蔓延脅脅益衆非有大枝勁旅專任攻擊斷難一就救平前次另立
十四營專作剿游之軍實萬不容已之舉必俟先籌的款再行添募誠恐貽誤事機合無仰懇 天恩俯
念邊疆剿匪餉糈無著准將滇省常年解部之課釐等銀十萬餘兩爲數無多按年儘數截留滇省充餉
其不敷之二十餘萬兩由蒙騰兩關徵收稅項提撥支以滇省之進款濟滇省之急需較之另籌自屬
有別一俟游氛平靖卽行停止明知關稅不旺提撥未必裕如然此外別無可籌不得不於無可設法之
中爲暫時指望之計如蒙 俞允卽請 敕部立案所有關稅於備還洋款照舊籌解之外不復指撥他
用庶於邊務營伍均有裨益所有滇省添軍剿游餉項無著請截留解款豫撥關稅以濟急需緣由除咨
部查照外謹恭摺具 奏伏乞 皇太后 皇上聖鑒訓示再雲南巡撫係臣兼署毋庸列銜合併聲明
謹 奏奉 敕批戶部議奏欽此

邇光靈跪 奏爲特參捏報圖功累及無辜之知府請 旨暫行革職歸案審辦恭摺仰祈 聖鑒事竊
臣前於本年二月內迭據雲南開化府知府蹇念威電稟府屬漫雲等處地方有游匪數百人執持快鎗
竄入邊境擬親督所部緝私營前往剿辦旋據電稱安平廳屬歸仁里馬廠洞匪首王春勾通游匪招集
亡命多人若不趁此撲滅恐致滋蔓已飭幫帶緝私營前革遊擊田南亭帶兵馳往該洞一面示諭散脅
繳械如敢抗拒卽加剿洗各等情均飭詳查妥慎辦理去後嗣據該守稟稱田南亭前往該洞匪首王春

竟開砲拒擊連日奪獲炮台石礮將洞中土游各匪及男婦等悉數燒斃并於水溝內搜獲逸犯取供確
警等情當查前後稟報情節互異迭經先後委員并飭該管道署臨安開廣道陳燦署迤東道石鴻韶查
明該匪王春平素磕作不法固罪不容誅惟並無糾集亡命勾串游匪情事田南亭帶兵圍攻竟將逃入
洞內暫避各村民男婦老幼四十餘人及王春全家九丁口一同燒斃開具姓名年歲列冊附報洞外亦
查無砲台石礮各等情次第稟覆前來核與該府稟報情形迥不相侔顯有畧及無辜捏報圖功情弊當
經批司將該府撤任並將應訊一千人証及田南亭行提來省發委審辦在案相應請 旨將開化府知
府塞念咸暫行革職以俾歸案訊究除俟訊明確實情由分別按擬另行奏報並咨部查照外理合恭摺
具陳伏乞 皇太后 皇上聖鑒訓示再雲南巡撫係臣兼署毋庸列銜合併聲明謹 奏奉 硃批塞

念咸著革職歸案審辦田南亭濫斃無辜多命情節甚重著即從重治罪欽此

奏奉 硃批塞

周馥片 再山東河務本屬草創向來按照成規治理將就補苴歲決歲堵遂成無底漏卮考其受病之
由固非一端而尤以與水爭地爲一大病根臣此次履勘通工民埝縱橫有逼近河唇以致河面之寬不
及二里者是非拆去民埝不能修守查光緒二十四年原任大學士李鴻章欽奉 諭旨履勘黃河籌議
辦法十條內有云民間於河灘上搶築私埝愈逼河愈狹灘上每佔一分則對岸險工吃重一分顧一
隔而害全局等語誠屬探本之論今擬派官紳通行查勘凡攔河逼水之埝有碍河流一律拆除如上游
孫樓中游胡家岸隰孟圈下游圈董莊卞莊十六戶等處情形尤重不可不先行量拆放寬河面而查埝
卽應遷民須寬給買地蓋房之費使不失所尤須遠築大堤使民住於堤外永保室家日就近可耕灘地

約計需費非銀七十萬兩不能舉辦現蒙 天恩准臣收捐濟用除彌補此次堵口丁需外如有贏餘即
擬陸續籌辦此事至河灘淤地宜麥向來照舊徵糧查李鴻章等原奏民種灘地收麥一季應免上忙如
民收雨季言祇徵下忙一季若兩季失收官應酌量給振自應照此辦理方足以示體恤而免藉口自民
搶拆除之後民間如再有擅築埝壩攔逼河流者照例懲辦責成沿河州縣認真諭禁並飭工員隨時查
報以免日久弊生臣爲河患已亟漸圖補救起見是否有當伏乞 聖鑒訓示謹 奏奉 硃批著照所
請欽此

周馥片 再臨清鈔關徵收戶工兩部稅銀原定稅盈餘及銅斤水脚共銀五萬六千數百兩向恃運河
商船徵稅自咸豐五年黃河銅瓦廂決口穿運自張秋鎮迤北至臨清州運河無水稅收大減所收者僅
天津衛河一路之稅其餘東昌府魏家灣北尖塚村廠皆屬有名無實歷年短徵額時勢使然無力可補
救而在關書役衆多例支工食有限隨添出無數名目畧難需索弊難窮詰卽不議加稅免釐亦應痛除
積習從新釐正臣悉心酌核臨清關本歸巡撫管理委臨清州知州稽徵並由濟東道兼管拘循舊例無
論如何整頓總不脫從前窠臼現擬另派委員住關核實經理無庸臨清濟東道兼管將舊日書役全行
裁撤另選有身家有受保者酌量雇用一切規制仿照海關章程辦理其應徵稅則暫照向例徵收向來
陋規應裁者應收者歸併一筆徵收不必多分名目俟試辦數月察看應否加減再行酌辦至有名無實
之卡現擬一律裁撤將來開辦加稅免厘之時此項常關照議仍舊徵收如有因地制宜撤此移彼自應
查照議章派員會同稅務司查明詳奏查有候補知府陸安清候補知州程丹桂勤慎廉明辦事結實卽

委該員等前往臨清關察看籌議定於光緒二十九年正月初一日概照新章辦理除俟辦有端倪擬定章程另行具奏外謹先附片陳明伏乞 聖鑒謹 奏奉 硃批著照所請該部知道欽此

奴才渾順車登索諾木奎煥跪 奏為恭酌時勢擬請設立中俄通商事務局揀員承辦以專責成而維邊局恭摺仰祈 聖鑒事 維邊疆之要首曰睦鄰凡一切事機自應因時制宜諒為久安之計查烏里雅蘇台地處極邊與俄接壤形勢孤懸此處是道貿易俄商絡繹不絕此重訂和好之際邊局益不能不慎鄰睦更不可不修設局而理商務實為睦鄰保邊第一要義溯查從先俄商來城貿易者朝來夕去交涉率少暫歸瑣落際今則俄商在烏多設舖所常年與蒙民交易兼以烏梁海連界俄屬之烏蘇河套壘恰克圖均設有俄官與蒙古諸部落近在咫尺中無隔關以致喀爾喀盟無一旗無貿易之俄商其所交易者專以牛皮獺子皮牛隻為大宗每年由三扎兩盟以貨換買駝羊毛進烏城者不下三四百萬斤其由名和碩徑迎俄國者為數尤鉅故近日交涉事繁較昔不啻倍蓰什蕪此時即派專員承辦猶恐有拮据不遑之勢若仍以理藩院兼辦實屬顧慮難周設有貽悞非惟有失鄰睦實與邊局關係匪輕奴才等熟籌再四擬仿照科塔爾處成案在烏城街市設立中俄通商事務局擬設承辦章京王專職銜一員額爾筆帖式二員專司其事庶責有專歸而無貽悞責烏城辦公向交事浮於人此次設局辦商又關交涉應委各員非久歷邊疆通達吏務蒙文者才克勝其任所設承辦章京一缺擬由綏遠城擇其曾在西北路邊區通達商事務諳蒙文之員指劃來烏委用以資熟手爾期得力其筆帖式二員即擬由在營旗員內挑選補用至各員等升階俟案暨應支鹽糧加增等款按照烏城額設主事職銜筆

帖式等員之例一體辦理惟烏城設立商務係屬創始且俄官往來似應稍加優待擬月給辦公心紅柴燭紙筆等項銀四十兩書識四名以備書寫一切招募巡兵十六名以資巡查備蒙俄交易偶有口角即便前往彈壓勿令釀成事端每名按月給津貼四兩至中俄交涉必須曉俄蒙繙語者添募通事二名方不悞事月支口分每名按牌六兩發給總計一年所需連閏不過二千二百餘兩惟當此多事之秋庫欸支絀奴才等亦應共體時艱變通辦理所有該員等應支各欸暫由烏城常年各項六分減平項下核發仍歸入常年經費造冊不令稍有浮冒庶免部籌之難如蒙 俞允擬按照科布多由奴才刊刻木質關防一顆文曰辦中俄通商事務關防報部開用以昭信守其餘一切設局開辦暨支發各項銀糧日期並調員承辦各情形俟奉 旨後再行酌核奏咨辦理除咨呈政務處查照外所有恭酌時勢擬請設立中俄通商事務局揀員承辦以專責成而維邊局緣由是否有當理合恭摺具陳伏乞 皇太后 皇上聖鑒訓示遵行謹 奏奉 硃批著照所請該衙門知道片併發欽此

太子少保頭品頂戴調署兩江總督湖廣總督臣張之洞跪 奏為交卸湖廣督篆起程日期恭摺仰祈 聖鑒事竊臣奉 命署理兩江總督飭令迅速赴任當以鄂省經手事件太多必須畧為清理並適有法總領事克納貝來鄂商辦撤兵罷會之事法水師提督來鄂商設躉船之事法提督行後法總領事尚在漢口勾留連日磋磨迨二十八日照復去後二十九日接具復函法總領事尚無異詞日本租界亦於日內始行商妥始得定日交卸均經分別電奏暨電軍機處在案於十月初一日將湖廣總督關防並王命旗牌暨文卷等項派員齎送兼署督臣端方接收任事臣即於初二日由湖北省乘輪啓行赴江至

商務大臣關防臣係奉 旨特派應即將關防帶赴江南遇有應辦事宜隨時鈐用理合恭摺具陳伏乞

皇太后 皇上聖鑒謹 奏奉 硃批知道了欽此

張之洞片 再湖北護軍各營係副將張彪統帶該副將兩赴日本考校兵事該軍營規操法極爲東西洋游歷武員所稱許查江南各防營雖亦漸改洋操但一切仍係老法教練情形簡畧且各省勇營規制操法參差百出實爲今日各營大弊江南爲江海首衝臣奉 命調署兩江總督自以整飭戎行爲先務當經商諸撫臣端方擬調湖北護軍營勇一旗并將弁學堂教練隊前赴江南精加訓練作爲標準俾各營有所觀感操法亦歸畫一撫臣端方謂此舉能使江營防軍聯絡一氣實爲整頓沿江軍備要義且江南可增得力之兵湖北可節數營之餉於兩省均有裨益大加欣贊因將該軍左旗四營并將弁學堂教練隊一百餘人調赴江甯省城容臣蒞任後籌定餉項統歸江南給餉以清界限除咨部查照外理合附片具陳伏乞 聖鑒謹 奏奉 硃批知道了欽此

張之洞片 再湖北營伍前值大閱之年恭奉 諭旨飭臣查閱前湖北綠營迭經裁汰較前所存已不及半所駐各處之兵零星散布每值巡閱必須於各處遠爲調集會操各營勞費甚多皆係出之扣餉而綠營疲敝已久鈍械老陣毫無可用且向來總督出省巡閱經過地方州縣不無供億之煩縱上官能力崇儉約穿恐於地方不免煩擾竊以爲校閱綠營及省外零星勇營不如認真校閱精練洋操之各勇營較有實際茲於九月二十一日調集護軍馬步砲工營並鐵路營教練隊武建武愷武防等營暨護砲廠之工防營調省學操之宜防營擇地於省城外二十里東湖門外操練行軍野戰之法并令將弁武備

自強各學堂暨兩湖經心江漢各書院學生同往閱看二十日爲查閱各軍隊伍軍械衣裝之期二十一日爲操期兩日夜大雨不止因先已定按照軍律不能更改自前一日列隊候驗整隊赴汛夜間支帳安營次日分爲兩軍對操馳逐十餘里各軍俱服雨衣奔走於泥淖之中其進退起伏均能依照定法伏聽將領指揮既無行列散亂藥彈損濕之弊亦無畏難瑟縮之狀往返六十里軍容不改勇氣有加臣偕撫臣端方周歷行視並有東西洋員來觀見各將士如此冒雨奮勇不避艱苦深爲歎異聞畢後酌給獎賞切實訓勉仍期其精益求精至荊州駐防練兵一事乃臣所注意者除挑選該駐防入省城武備學堂學習暨派赴日本學習外於去年冬間咨商將軍臣濟祿挑選精壯明白之旗兵七十二人來省令武備學堂洋教習教以砲法現已學成臣與撫臣相校閱於砲法均能嫻捷合用氣概軒昂在省半年有餘恪守規矩甚爲可嘉當經臣加以優獎發給快砲一二尊遣回荊州令其轉相傳習所有校閱省城及宜荆調省學習各營伍情形理合附片具陳伏乞 聖鑒謹 奏奉 硃批知道了欽此

張之洞片 再蘆漢鐵路現已由漢口造至河南信陽州地方於本年夏間開車近日行李商貨往來絡繹該鐵路公司洋總管屢請臣前往查閱查此項鐵路係臣創議興辦之事現將離鄂赴江自應親行一閱以究利弊前於九月十七日辰刻自漢口乘坐火車取行於申刻馳抵信陽州十八日由信陽乘原車駛回計自漢口至信陽州共四百三十餘里中間所有道路橋梁工程俱極堅實宏壯車站各房一律完整沿途商民欣悅爭謀造房屋開店鋪設行棧山鄉瘠壤頓有興旺氣象於民間生計裨益甚多地方農民工人亦極安謐湖北所派鐵路兩營沿途按所分紮恪遵規矩彈壓認真照常操練洋工司甚爲許可

臣回至漢口後順道查勘法國新拓租界址法國近年新開之租界及通火車站之枝路並查勘比
利時日本兩國現議未定之租界並會晤各國領事商酌一切是晚即渡江返省理合附片具 奏伏乞

聖鑒謹 奏奉 硃批知道了欽此

奴才增祺跪 奏為謹將丈放大凌河馬廠地畝在事尤為出力人員遵 旨擇尤保獎恭摺仰祈 聖

鑒事竊奴才於上年七月奏派花翎留奉試用知府李淦總辦丈放大凌河馬廠地畝曾經奏將事竣後
在事出力人員擇尤從優保獎奉 硃批該衙門知道欽此欽遵在案茲據該員冊報丈放該馬廠地畝

一律告竣共收荒價庫平銀五十八萬三千數百兩計自開辦為時不及一年實為向來辦理荒務所僅
見尤難者時當和局未定窒礙多端兼之馬廠左近土匪出沒靡常該員內外策應措置裕如復以身率

屬終日奔走荒烟蔓草中餐風臥雪手絨足塚既勞瘁之莫辭復變通以盡利且比年來營口一埠被外
人占據釐稅減收設非添此鉅款挹注其間則各路剿匪兵餉及一切要需幾至仰屋而歎故亂後持籌

羅掘不病官不擾民洵以該員放地一役為勝任愉快所有尤為出力之總辦委員花翎留奉試用知府
李淦懇請免補知府以道員仍留原省補用並請賞加二品銜其餘出力各員弁分別異常尋常另繕清

單恭呈 御覽合無仰懇 天恩俯准照擬給獎以示激勵之處均出自 逾格鴻施現正次第勘放蒙
荒藉資觀感實於墾政餉源大有裨益除飭取各該員弁等履歷咨部查照外理合恭摺具陳伏乞 皇

太后 皇上聖鑒訓示謹 奏奉 硃批著照所請該部知道單併發欽此

增祺片 再大凌河牧廠地畝前經奏准丈放收價業已將酌定章程奏明在案查原定章程平地分為

四等山荒另爲三等現在丈放事竣自宜分別定賦俾之有所遵守奴才詳加考覈並參諸通省賦課舊章酌中定擬上地每畝按年徵正課銀四分耗羨銀一分中地每畝徵正課銀三分耗羨銀一分下地每畝徵正課銀二分耗羨銀一分鹹地每畝徵正課銀一分耗羨銀一分其全鹹及不堪耕種留爲樵採牧養並承領山荒率多貧民小戶擬無論等差每畝概徵正課銀一分免徵耗羨均自光緒二十八年撥地認領本年起予限三年第四年開墾成熟一律起科已墾熟地現既分上中下三等收價其正課耗羨亦照牛荒按上中下分別徵取惟當茲兵燹之後閭閻苦不可言且每戶墾地爲數無多併請與現荒生放一律起科以紓窮困之處出自 鴻慈至將來屆期應徵課賦必須經理有人查此段牧廠原屬錦州副都統所轄擬請就近仍歸該副都統認真經徵其所收各項耗羨即留爲津貼該副都統衙門辦公之需除分咨查照外謹附片具陳懇請 敕部立案伏乞 聖鑒謹 奏奉 硃批戶部知道欽此

奴才增祺跪 奏爲大凌河牧廠現已一律丈放完竣謹將放過之生熟地畝並將放過荒價銀兩各數目恭摺仰祈 聖鑒事竊錦州府大凌河牧廠地段上年經奴才奏請弛禁招墾收價以裕餉源業將辦理一切章程先後奏陳各在案茲據總辦委員花翎留奉試用知府李淦等將已放地畝及核收過荒價各數目分別造具細數清冊呈請查核具奏前來奴才覆加詳核此次勅放該牧廠地畝原定章程生荒分爲四等後經查明實有全鹹及不堪耕種之地不能不將地價酌減丈放以免累民又熟地原定爲一律按照土地交價嗣以原墾半多貧民地亦肥磽不一復隨時查看情形將該地亦照生荒分爲三等收價其間極貧零星小戶實係無力繳價者自當仰體 皇仁從寬免追以示矜恤綜計共放過各項地畝

五十萬九千四百九十畝六分七釐六毫七絲共核收荒價庫平銀五十八萬三千三百五十四兩八錢七分三厘九毫七絲謹分繕清單恭呈 御覽飭部備案除將清冊咨部外理合恭摺具陳伏乞 皇太后 皇上聖鑒謹 奏奉 硃批戶部知道單併發欽此

增祺片 再向來出放荒地易滋弊端此次勘放大凌河牧荒曾經嚴飭不准需索舞弊但責人以嚴必須養人以寬所有委員書役應支薪水以及辦公各項不能不從優酌給當於奏定荒價正欸之外另收一成五釐經費專為辦公一切需用現在全段竣事通計共動用過銀四萬零六百七十二兩零尙餘銀四萬六千八百三十一兩零另行存儲查奉天省城將來屆期交還舉凡 官殿城垣以及各衙門公所均須修葺工程既鉅需欸亦繁擬即由前欸提用實用實銷如有不敷再容奴才另行籌備除咨部查照外謹此附片陳明伏乞 聖鑒謹 奏奉 硃批戶部知道欽此

頭品頂戴調補浙江巡撫臣聶緝渠跪 奏為徽省仿鑄銅元行銷無滯辦理已有成效恭摺具陳仰祈 聖鑒事竊照安徽省制錢缺少行用鋪色不一市儈任意高下商民受累甚深臣當到任之後即議試造銅元以利民用旋准戶部咨光緒二十七年十二月二十四日欽奉 上諭近來各省制錢短少不敷周轉前經福建廣東兩省鑄造銅元輪廓精良民間稱便近日江蘇仿造辦理亦極便利著沿江沿海各督撫籌款仿辦即就各該省搭鑄等因欽此當經督飭前藩司湯壽銘查得省城原有銀元局一所現已傳鑄屋宇宏廠所存機器先經戶部電令解京嗣以京局機器足用後奉電止毋庸起運現雖日久不用間有銹蝕稍加修理以之改鑄銅元均尙可用就原有之局地用原存之機器既少開支且免廢棄毋須另

就別省搭鑄以免周折所需經費由該藩司先後籌撥銀三萬五千兩作為鑄本於本年四月初十日開局與工仿照各省辦法試造當五當十當二十三項銅元以計重一錢二錢四錢為等差凡民間完納錢糧關卡徵收稅釐以市塵買賣貨物均照制錢行使出入一律不准低昂其銅質輪廓悉與廣東福建江蘇所造無異數月以來商民同聲稱便行銷甚為流通覈計每鑄本銀一萬兩鑄成銅元一百五十餘萬元就現在銀價低平而論除銅本局用覈實減省開支外約可獲餘利銀二千餘兩之譜積少成多於籌款似亦不無少補據辦銅元局署布政使聯魁詳請 奏咨立案前來除咨戶工兩部查照外謹會同署理兩江總督臣張之洞恭摺具陳並將現鑄錢樣咨送軍機處進呈 御覽伏乞 皇太后 皇上聖鑒訓示謹 奏奉 硃批著即寬籌鑄本次第擴充以利民用欽此

奴才增祺跪 奏為奉省股票報效移獎懇 恩展限恭摺仰祈 聖鑒事竊本年七月准戶部咨開光緒二十七年十月間具奏報效股票移獎人員請展限一年統扣至二十九年正月二十九日限滿等因奉 旨允准通行遵照咨行到奉當經轉行欽遵辦理茲據辦理昭信奉局署奉天驛巡道景賢稟稱自奉札後遵即分飭各屬一體遵辦一面出示曉諭在案迄今數月之久屢經飭催而冊報者寥寥且有查報未詳駁回復查者推原其故或因難後卷案燬失難以澈查或因領票之人逃去未歸未克及時具報或因舊符不靖道路梗阻往來文牘每多稽滯尤難查者如金州營口等處尚未交還紳商人等住處無定派員往查無從尋覓出示曉諭未能週知察看情形斷難如期一律造報倘因逾限概不獎叙未免阻其報效之忱可否懇求 奏明展限半年以二十九年七月二十九日為滿俾各屬得以詳細查明以免

同隅等情稟請奏咨前來奴才復核無異除分別咨行查照外理合會同盛京副都統奴才鈕祜祿奉天府尹奴才玉恒恭摺具陳伏乞皇太后皇上聖鑒訓示飭部施行謹奏奉 硃批著照所請戶部知道欽此

頭品頂戴陝甘總督奴才崧蕃跪 奏為遵旨籌建甘肅武備學堂謹將擬辦大概情形恭摺具陳仰

祈 聖鑒事竊奴才迭奉 諭旨現在整頓兵制亟應於各直省會建立武備學堂以期培養將才練成

勁旅等因欽此欽遵並准政務處咨催奏報開辦前來奴才歷查直東山陝各省均已開辦學堂咨會到

甘細核辦法大致相同惟情形甚異奴才擇其切實可行者斟酌採擇第甘省邊地瘠苦歲受鄰協辦事

易而籌款惟艱前於奏報籌修省城大學堂案內曾經聲明在省城南關選擇地基一處俟學堂修理工

竣分設東西兩學東考文學西講武備俾肄業文武生童彼此觀摩砥礪功效可以兼收即在事經理員

役亦可互相照料奴才與司道反覆籌商一則因邊省款絀可以撙節經費一則文武兼收並蓄聲氣相

通無偏輕偏重之弊取材較為核實似可一舉兩得已派委學堂提調甘肅候補知府楊增新於引見

之便親歷直隸山陝航海至蘇鄂各省察看各處學堂規模辦法繪具圖說考核實在訪延兼通中西各

學教習數人採購時務各種書籍攜回甘肅奴才再與司道妥議章程按期開辦先是楊守請咨赴京之

前即經分委各員採料勘工刻下大致辦齊惟邊省地寒早凍須俟明年春暖興工彼時楊守計已回甘

教習書籍亦到即可次第舉辦至選將練兵乃國勢強弱攸關實目前當務之急惟創辦之初不能不因

時因地略事變通除蒙養學堂另選幼童課習外其大學堂學生年二十以下粗通中學體質秀弱只可

兼習算學測繪者爲一等其氣質壯實兼習體操兵家雜技測繪諸學者爲一等等年二十以上三十五以下中學精通可兼習西學者爲一等凡在籍武舉生童年三十以下身軀壯偉技藝可觀可練習中西各種學問者一併考收蓋武科已停以免有志向上者自等廢棄現值強鄰環伺外患方殷欸細時艱人才難得奴才受 恩深重尤當竭盡心力以誌後愆前之計爲強兵禦侮之方斯則夙夜兢兢不敢稍自暇逸者也除詳細章程另案奏咨外所有籌建武備學堂俾文武並課大概緣由理合恭摺具陳伏乞 皇太后 皇上聖鑒訓示謹 奏奉 硃批著卽次第認真舉辦並詳細章程具奏欽此

頭品頂戴署理兩廣總督臣德壽 調署廣東巡撫江西巡撫臣李興銳跪 奏爲廣東夏潦秋旱米價騰貴現在籌款採運平糶以資振撫恭摺具陳仰祈 聖鑒事竊照廣東本年夏間溼潦爲災西北各江水勢驟漲衝決基圍廣肇兩府屬被災甚重先經 奏咨在案入秋以後數月不雨旱象已成粵省所產米穀本屬不敷民食早禾旣已失收晚稻又無可望外府及西省同時均遭荒歉紛紛來省購米價益騰踊米價之昂爲百餘年所僅見人心皇皇深恐轉於溝壑平糶一事亟不容緩惟辦糶必先籌費雖已奏蒙 恩准開辦振捐而爲時未久尙無成數司道各庫入不敷出萬分爲難臣等督同司道百計騰挪並飭署廣州府知府龔心湛等轉向各商號籌借統共湊銀十六萬兩復邀集各善堂紳董在府署商議廣仁善堂首先認辦平糶愛育述善明善廣濟崇正等善堂亦各相繼舉行一面提用堂中存款一面分勸紳商富戶協力相助不論捐借多多益善隨卽將宜籌之項發交各善堂紳董分領湊同該紳等自籌之款合計不下數十萬派人前赴蕪湖鎮江等處及南洋各埠購辦米石運回接濟茲據署廣州府知府龔

心泄等並稱各善堂所購之米多已運到業經陸續開辦在於省城河南等處分設廠所清查貧戶減價平糶外府及西省需米之處來省購辦者亦經商允各善堂除去運脚各費照原價發賣俾得共沾實惠俟平糶事竣將官款繳回察看虧折若干將來振捐如果收數暢旺再請量撥歸款等由並據各善堂紳董以現往蕪湖鎮江等處購米請奏免釐稅以輕成本等情具稟前來臣等復查所議採運米石減價平糶官紳各籌鉅款通力合作相輔而行辦法尙屬切實已飭令該府縣會同各善堂紳董認真經理務須欸無虛糜事有實濟以期稍資補救至請免運米釐稅查江蘇安徽等省均已奏明不准減免在案礙難率行請免第本年東省各屬非旱即潦災區甚廣而西省匪亂未平糧食奇貴且轉瞬即交冬令來年春時尙早統籌兼顧仰屋徒嗟惟有將准辦振捐設法招徠廣爲勸募並督率司道等轉飭地方文武加意撫綏務使災黎不致失所以期仰副朝廷子惠元元至意所有廣東省籌欸採運平糶以資振撫各情形謹合詞恭摺具陳伏乞 皇太后 皇上聖鑒訓示謹 奏奉 硃批著卽妥籌辦理以資振撫

欽此

馬亮等片 再查接管卷內據辦理伊犁滿營事務檔房呈稱竊查前任伊犁將軍金順於光緒十年初次規復伊犁滿營制時曾經查照舊制 奏請飭部頒發伊犁駐防惠遠城協領關防八顆佐領圖記四十顆分交該員等鈐用在案十五年前任將軍色楞額遵照部議將挑留錫伯陽入滿營官兵撥回原營飭存舊滿營官兵分設左右兩營編列八旗設協領二員佐領八員十七年前護將軍富勒銘額遵照部議奏准挑立新滿營分設左右兩翼編列八旗設協領二員佐領八員均未另請鑄給關防圖記 奏明

卽於前項部頒關防圖記內以廂黃正黃兩旗協領關防發交舊滿營左右翼協領借用以正白正紅兩旗協領關防發交新滿營左右翼協領借用以八旗牛牛綠佐領圖記分發舊滿營八旗佐領借用以八旗二牛綠佐領圖記分發新滿營八旗佐領借用其餘協領關防八顆佐領圖記二十四顆均飭交庫封存聲明請俟更時再行一併繳銷等因於光緒十七年十二月十三日附 奏奉 硃批該部知道欽此

欽遵在案伏思舊新兩滿營營制早經 奏請改設所有舊滿營左右兩翼協領二員佐領八員新滿營左右兩翼協領二員佐領八員現在借用關防圖記均係從前滿營舊制字樣體制均與現在改設舊新兩滿營八旗字樣不合自應呈請奏咨另行更換俾昭信守等情前來奴才等覆查無異相應請 旨敕部換鑄伊犁駐防惠遠城舊滿營左翼協領關防一顆右翼協領關防一顆八旗佐領圖記八顆新滿營左翼協領關防一顆右翼協領關防一顆八旗佐領圖記八顆以昭信守而垂久遠理合附片具陳伏乞 聖鑒訓示其舊新兩滿營左右兩翼協領八旗佐領等現在借用並庫存圖防圖記一俟換鑄關防圖記頒發到日再行飭令悉數送部銷燬合併陳明謹 奏奉 硃批禮部知道欽此

暫護將軍印務花翎歸化城副都統世襲二等剛烈男奴才文瑞跪 奏爲伊克昭盟達拉特旗教案應賠各款或已交清或已籌定業有成數惟前餘尾款該旗萬分無力措辦擬懇 天恩飭下山西撫臣暫行籌墊仍由該旗設法歸還俾早結案而安蒙教恭摺仰祈 聖鑒事竊查伊克昭盟達拉特旗教案上年蒙教兩造立定草約該旗認賠銀三十七萬兩業由調任將軍信恪奏明在案該旗前後共交過地畝租及現款糧石等項統計銀十八萬兩尙欠銀十九萬兩原擬俟兩盟屯墾大興自不難湊集無如該盟

長至今尙未來城會議而教士催欸甚急勢難再緩月前該貝子呈請交地二千頃請由前任將軍鍾泰招商代放得價付賠邊方苦乏富商招徠無術幸賴督辦墾務大臣貽穀全大局體恤蒙艱勸諭股商變通辦理先行承領計該地二千頃共核價銀十四萬兩言定不待清丈交割豫繳銀七萬兩俾濟教堂急需先由墾務同公費項下暫挪銀一萬兩於本年十月二十一日付給教堂下餘六萬兩屆時補交俟地畝兌清全數交楚所欠尾數五萬兩教士必欲有切實著落當經鍾泰代爲擔承仍責令該貝子趕即籌措旋據該貝子派員來綏稟稱本旗教案情節重大上年議賠之時經前任將軍派員百方設法磋磨始得以三十七萬兩定議爲數既減亟應竭力清價惟本旗生計夙艱綜計業已交清及已籌定共銀三十二萬兩實屬力盡筋疲下欠之五萬兩萬分無力籌付伏思賠欸重要不容再事遷延擬懇代奏籲乞天恩垂恤窮蒙 飭下山西撫臣暫行籌墊銀五萬兩稍緩時日仍由本旗設法歸還俾早結鉅案等情呈 懇前來查該旗以彫敝之區籌還賠欸三十二萬兩幾於悉案敝賦所餘尾數該貝子所稱萬難籌措確係實在情形本年三月間信恪因烏蘭察布監四子郡王旗欸議未定教士催辦緊迫曾咨由外務部轉咨山西撫臣籌借銀四萬兩代付教堂今該達拉特旗賠欸較四子郡王旗爲鉅而籌欸亦較四子郡王旗爲尤難該旗同戴 祈懍仰維 覆幬之仁本無偏厚合無籲懇 天恩俯念蒙屬困窮殊堪矜憫准如該貝子所請 飭下山西撫臣暫行籌墊銀五萬兩俾早完結該旗感沐 聖慈實無涯際如蒙 兪允一俟該旗墾務開辦奴才當商請貽穀由該荒內扣還否則亦必令其另籌歸欸以免累及公家奴才明知晉省財力艱窘羅掘方殷在該督臣籌此數萬金拮据可想而知以帑項出納之地較之邊

漠旗屬究易騰挪矧晉蒙唇齒相依賠款果清變端自弭裨益全晉大局實非淺鮮該撫臣必能不憚焦
苦力任其難也所有達拉特旗教案賠款尾數萬分無力措集懇 恩飭籌各緣由是否有當謹恭摺陳
請伏乞 皇太后 皇上聖鑒訓示施行再此摺係鍾泰主稿甫經繕定遽因病出缺事關交涉事件未
敢延擱且奴才前於署將軍任內曾接辦此案是以遵照鍾泰原擬辦法迅即馳奏合併聲明謹 奏奉
硃批該部知道欽此

趙爾巽片 再前准 欽差督辦蒙旗墾務大臣兵部左侍郎貽穀咨鈔創設墾務公司一摺內開前據
山西在籍紳士直隸試用知府曹潤堂稟請創設墾務公司當商之岑春煊擬先由商務局剩存款下撥
給官款六萬兩並由該紳等自行籌集銀六萬兩共湊銀十二萬兩計成本官商各半先行試辦准貽穀
咨達拉特旗有撥地一千七百頃先償十七萬之說該旗既分起撥地正可分起贖回請飭司於前籌之
墾務公司商務局兩項十二萬外再設法另籌五萬兩湊成十七萬另款存儲俾應要需各等因先後咨
行到晉並疊准咨催令將官商股本以及另籌墊款迅速委解以便收地前來奴才查晉邊蒙旗墾務上
爲 國家恢拓利源下爲蒙藩疏濬生計內消隱患外固邊防關繫亟爲重要自光緒十二年至二十三
年前撫臣屢議屯墾皆由蒙部疑阻弗竟厥功現既有可乘之機自當設法因應免致中輟惟晉省庫款
萬分奇絀本省賠款尙苦無出代墊蒙款原屬力有未逮第念達拉特旗地前經調任綏遠城將軍信恪
議結該旗教案內聲明以該旗地畝抵賠銀一十七萬兩現該旗不願棄地屢次呈懇貽穀以地歸晉開
墾由晉墊賠款情勢頗爲迫急若不順其所乞有以應之誠恐蒙款無指墾議多碍迹所從違勸關大局

又查伊克昭盟烏審旗前議以謙地抵賠教案經陝省奏明以陝款五萬兩付給教士將謙地收歸陝省與達旗情事相同當與藩司再四商度不得不於萬難設措之中竭力措墊銀五萬兩合之官商股本共成十七萬之數以應蒙急以成墾事業飭司將南局存款六萬兩另湊墊款五萬兩解交貽穀收儲俟墾務辦有端緒仍應將另墊賠款五萬兩由公司歸還晉省以重款項其曹潤堂等湊集銀六萬兩亦飭自行解往俾免貽悞除分咨查照外所有墾務公司官本銀另籌墊款先後解交各緣由謹附片具陳伏乞聖鑒訓示謹 奏奉 硃批該部知道欽此

頭品頂戴貴州巡撫臣鄧華熙跪 奏為廳學應試人多請加學額恭摺具陳仰祈 聖鑒事據署布政

使曹鴻勛署按察使桂霖會詳稱案查前司任內准署糧儲道桂霖稟據署仁懷直隸同知朱廷勵詳據儒學訓導華之鴻申據廳屬舉人段世模等稟稱竊仁懷廳自乾隆四十一年改為直隸同知專設學校定取文武學額歲科各四名廩生增生各八名拔貢一名四年一貢附入遵義府搭棚考試當日應考文武童生僅四五十人或六七十人迄今百有餘年文風蒸蒸日上讀書之士莫不爭自琢磨力圖上進每屆考試已增至四百餘人惟地處邊隅士多寒苦其附棚遵義往返數百里備極艱辛比及入場又以額少人多懷才者多不獲售以致鬱鬱長年窮經白首竊查學政全書內載雍正二年奉 上諭令督撫會同學臣查明人文最盛之州縣題請小學改為中學中學改為大學大學照府學額取錄務宜秉公詳查不得徇私冒濫欽此嗣安順府屬之永甯州原係小學額取文武各八名後以人多額多於道光年間題請加額二名共取十名議准在案現在廳屬應考人數較小學為多取進之額遠不逮小學未免向隅懇

請援照永甯州成案於廳學原額四名外加取四名以符小學之例等情由廳申道轉移到前司經前司具詳因值拳匪肇亂奉飭從緩具題茲復據該廳查案稟請等情前來臣覆查仁懷廳學原額文武各四名今因 聖澤涵濡既久人才倍出每屆應考童生增至四百餘人較之小學人數有盈無絀且近科以來亦多與賢書之選實係人文最盛核與道光十八年永甯州加額成案亦屬相符合無仰懇 天恩俯准仁懷廳學照小學之例於原額四名外歲科試各加學額四名廩貢增生則仍照舊俾邊隅人士鼓舞奮興更可期人材蔚起矣除册前已咨送部科外所有廳學應試人多請加學額緣由謹會同雲貴總督臣魏光燾貴州學政臣趙惟熙合詞恭摺具陳伏乞 皇太后 皇上聖鑒敕部議覆謹 奏奉 硃批 禮部議奏欽此

趙爾巽片 再查奴才前以山西天城營守備出缺晉省綠營兵業分兩次全裁官無所附奏請免其序補以省周折旋准兵部咨覆員缺未便久懸業由另行揀補並令續出各缺遵章請補等因查晉省綠營武職各員前經奏明全行裁撤嗣後擬不繫以營汛即改設於常續備兩軍業由政務處核准惟以各省辦理須歸一律請 旨飭下袁世凱劉坤一張之洞覆議具奏各在案現在晉省常續備兩軍均已添練所有餉需即專指綠營裁兵一項自應查照奏案一律全裁以資撥用其官弁俸薪馬乾亦係備抵餉項之需勢難坐耗伏思晉省裁遣綠營辦法與江鄂各省微有不同各省議分年緩裁故官弁可徐圖安插晉省則綠營裁盡官同瘤贅若拘守序補成例則舊者未去新者旋來辦法兩歧且俸廉不能騰出即新軍餉項無著實於營務大有關碍推原部臣之意亦因營制驟改苦無位置官弁之方不能不遲回遷就

奴才詳審籌度現在所存武職及候補員弁人數尙多其中不無可造之才未忍聽其概投閑散原奏本
令入武備學堂查晉省武備學生業已足額不能再容多人自非變通辦理不足以廣裁成現擬於撫鎮
各標設立武備學堂除副參遊各員向駐要隘習改練巡營兵一二十名協同地方官鎮攝一切聽候
部章分撥其都守以下各員弁卽令帶職來省或赴各鎮標考學堂課以新操步伐行軍除鎗械營壘
諸學每月課其殿最給以廩餼俸資著瞻一概停支俸廉其優者挑入常續備兩軍借補各缺疲弱者分
別會否立功奏請賞給恩俸終身餘者酌量資遣所有費用卽於裁兵截餉各款內設法籌動此外各
州縣所練巡警井亦准稟請裁員弁幫帶操練概不由上司派委以免牽制仍俟政務處議有一律通
章再行遵辦惟此所出各缺仍概行停補以免紛歧雖與前章稍有未符然實有迫待騰餉之勢亦
尙非毫無位置之方况綠營積弊情形各省有僉同之議不出數年纔歸省標卽可一律通行於戎政無
出入所有綠營裁官擬令帶職歸標投考武備學堂各緣由理合附片具陳伏乞 聖鑒訓示謹 奏奉
硃批政務處會同兵部議奏欽此

駐防門侍衛山海關副都統奴才倭恒額跪 奏爲山海關兼轄各處官兵差防緊要俸餉太單援 懇
天恩俯准仍照減成舊章支發以資養贍而恤兵艱恭摺具陳仰祈 聖鑒事竊奴才所屬山海關
駐防兵丁除關外向有兼轄四處迤北則喜峯口冷口羅文峪三處均係邊關要隘中路則永平府係赴
京最要衝途該四處共設有甲兵五百五十名舊制永平府每月支餉銀三兩其餘三處每兵皆月支
銀二兩自咸豐年間軍興以來庫款支絀日俸均減爲六成兵餉均減爲七成按季各該道詳由藩庫具

領轉發歷經遵辦在案迨至二十六年畿輔一帶猝遭變亂餉需無措經前直隸督臣李鴻章奏明自二十六年秋至二十七年夏四季俸餉凡由藩庫支領者一律停發以後均按照減成實數核發一半等因前已飭令該處一體遵行奴才竊思庚子夏秋間拳匪變亂起於京東各屬潰兵土匪每欲勾結邊外馬賊以滋蔓延自喜峯口至羅文峪長邊隘口到處騷然小平府適當其衝羽檄紛馳更急如星火幸該處官兵等不辭勞瘁協力同心卒至地方得獲安全要差均無貽誤在該兵丁等勉力從公本屬責無旁貸而奴才權衡時勢萬不敢膜視兵艱因查該四處駐防官兵歷蒙國家豢養之恩惟有仰食俸餉盡力差防此外別無謀生之路自咸豐初年俸餉核減以來物價昂貴核計每兵每月所支三成半實銀除明差外所得無幾當此物貴銀賤之際餬口實屬不敷況時值隆冬無計禦寒情景尤為可憫正擬具摺間適接閩邸鈔得悉密雲副都統于珊因該處戶衆餉單奏請仍按減成舊章發放等情旋奉 上諭著照所請欽此益徵我 皇太后 皇上軫念兵艱無微不至之至意凡屬旗僕莫不同聲感頌 皇恩奴才詳閱該副都統所奏官兵俸餉前後核減章程及現時困苦情形與山海關分防各處大致相等該俸餉既蒙 恩允准復舊山海關事同一律自應援案奏請以免向隅為此叩懇 聖慈伏念喜峰口等四處官兵差防緊要俸餉太單 恩准仿照密雲此次所奏章程將應支俸餉米折等項自光緒二十八年冬季起免其減半仍按減成舊章按季發放以資養贍而免飢寒如蒙 俞允俟 命下之日奴才即恭錄咨行直隸督臣轉飭藩司遵照所有援案籲懇俸餉復舊緣由理合恭摺具陳伏乞 皇太后 皇上聖鑒訓示遵行謹 奏奉 硃批著照所請該部知道片二件併發欽此

頭品頂戴江蘇巡撫奴才恩壽跪 奏爲鎮江府屬徒陽連河現已開浚深通舟楫暢行飭委驗收並造
報用過土方工價等費恭摺仰祈 聖鑒事竊承准軍機大臣字寄光緒二十八年五月十四日奉 上
諭有人奏請修江蘇常州鎮江河道一摺據稱常鎮兩府河道爲南北咽喉要路近年久失修泥沙淤
墊行旅苦之請旨飭修等語著劉坤一恩壽按照所陳各節體察地方情形酌核具奏原摺著抄給閱看
將此諭令知之欽此遵 旨寄信前來等因承准此伏查鎮江府屬之丹徒丹陽運河誠爲南北往來要
道且爲農田灌溉所依溯自光緒十九年挑浚以後歷時既久江潮挾沙沖積河身日漸淤滯舟楫有艱
行之患田疇鮮蓄洩之資去冬經前撫臣聶緝筮察酌情形飭司籌款派委特用道沈佺督辦疏浚事宜
當即籌辦尅日開工自丹徒之大閘口起至丹陽之三板橋止此一百餘里節節淤塞非築壩下掃大加
挑挖難期通暢客歲秋歉各洲災民衆多該道以工代賑招集人夫一萬餘名督同在工各員逐日趕挑
適奴才蒙 恩調授蘇撫蒞任後卽檄飭沈佺務將沙底挑挖一律深廣毋任乍高乍低有礙舟行所起
沙土用船裝載卸置大江心之最低處以免江潮沖積淤墊之慮復派撥營勇前往督工彈壓迨本年三
月奉 命蒐討軍實乘輪至鎮便赴工次詳加察看間有未能挑築如式之處經奴才酌度形勢授以機
宜飭將河面稍狹者一律開拓寬展河岸稍低者一律培厚加高通工所在逐處親勘並諭該道乘茲天
朗氣清春水未發集夫趕辦冀早蒞事奴才於閏伍回蘇又復迭次札催趕浚卽於六月據該道稟報此
項工程已於五月二十八日通工告竣各壩開啓江水暢流舟輪可駛隨委統領南洋常備右軍候補道

疏浚深通重載往來暢行無滯委屬工堅料實其北岸土性鬆實不等種樹須擇其宜等情當經批飭沈
佺將用過土方工價開支各款造報由司詳銷去後茲據蘇州布政使陸元鼎兼辦水利工程候補道朱
之榛會詳准沈佺將支用銀數造冊送司核銷以此次開浚徒陽運河一百二十餘里計工長一萬六千
八百五十九丈零共用土方築壩工料局用薪水等項合庫平銀一十萬九千四十六兩零委係實用實
銷樽節無浮詳請 奏咨並聲明在工大小各員閱時半載沐雨櫛風認真從事懇請擇尤酌保等情前
來奴才查徒陽運河日久失修舟楫頗稱不便前經一律疏浚深通行人得資利濟而工段綿長該道督
率員夫竭力挑挖趕早告竣不爲盛夏潮汐所阻尙屬辦理動速察核支用經費一十萬九千四十六兩
零內動司庫舊存振餘銀二萬五千九百八十三兩零又二十七年沿江沿海各縣奉撥截漕改折銀三
萬兩並在司庫籌備河工欸內湊撥銀五萬三千六十二兩零核與原奏所估經費十萬兩左右無甚軒
輊尙爲核實其事各員弁於冰天烈日中半載有餘亦皆卓著辛勤不無微勞足錄可否仰懇 天恩
俯准援照江南歷辦浚河成案擇其尤爲出力者酌保數員以示鼓勵出自 鴻施除飭取開支細冊分
咨戶工二部查照並飭察明岸身酌植柳株以堅河堤外所有鎮江府屬徒陽連河開通工較核銷經費
緣由謹會同署兩江督臣張之洞恭摺具陳伏乞 皇太后 皇上聖鑒訓示謹 奏奉 硃批准其擇
尤酌保母許冒濫欽此

社倉前往驗收並飭勘明河岸土性能否栽植柳株以固堤防旋據杜俞稟稱至工逐加查驗實已一律

鄧華熙片。再據安義鎮岑有富咨稱本年九月十二日據册亭州同張兆芭飛稟九月初三日有粵西游匪另股渡江竄踞册亭屬之團烘央壩者述板汪等處距城只二十餘里勢甚猖獗等語當由該鎮檄派鎮標營管帶鄭錦榮親兵營哨弁和繼聖等率領所部於十三日馳往剿辦十五日行抵板汪探悉該匪已退聚央壩當即督兵前進至者述寨外林深箐密該匪設伏以待我軍猝與之遇鏖戰自午至酉陣亡哨長裴有慶一員練勇六名受傷練勇十七名該匪亦爲我軍鎗斃三十餘人是時大雨遂即收隊十六日五更時我軍即分四路埋伏先踞形勝天明後該匪排隊前來適過其半我軍伏起用鎗轟擊匪等猝不及防死傷無算正衝殺間該匪忽來悍黨數百接應奔入團烘遂即駐軍央壩商議進攻團烘之策詢之士人僉謂團烘在羣山之中分五大寨環以二十餘堡路多險隘附近皆係水田不易進取再三查詢探有距江邊三十餘里之者岳寨乃團烘後路僅有匪二三百人屯聚於十八日商令伍樹棠張占元督隊由大路往攻團烘鄭錦棠領所部由間道馳取者岳遂各分軍前進午後將抵者岳該匪探悉督隊出戰我軍奮力轟擊斃匪甚多始行奔潰團烘之匪聞者岳後路有失亟派悍匪來援而伍張各軍已到遂與合力夾攻哨長和繼聖奪踞山巔用抬砲轟大寨該匪抵禦不住遂分悍黨護送輜重先行餘匪斷後且戰且走各寨之匪相繼奔潰我軍一面收復各寨一面分兵追殺生擒匪首王浩然等三名陣斬首級二十七顆奪獲鎗械多件我軍陣亡二名帶傷六名八達百隴者竟之匪聞大軍掩至一律奔回粵岸訊據匪首王浩然等供稱此次犯黔原約六路並進大股注重興義縣城其餘分股竄撲牽我兵勢等情不諱當經正法示衆咨報前來臣查此次粵匪分股圖黔計甚狡悍黔省邊地延長防營遂覺單薄東馳

西突力實不支該鎮調派得力之軍指受機宜尅期進剿一鼓蕩平不致重煩兵力辦理尙稱迅速所有在事出力人員可否擇尤保獎以示鼓勵之處出自 天恩其陣亡弁勇容臣查明分案咨部辦理謹附片具陳伏乞 聖鑒訓示謹 奏奉 硃批准其擇尤酌保母許冒濫餘依議欽此

鄧華熙片 再黔省防剿游匪添募營勇業於本年八月間兩次 奏明在案九月下旬因廣西天峩一帶匪勢甚盛逼近黔之羅斛廳人心惶惶該廳文武飛稟請營來廳駐紮當調本任松桃協副將尹光祥挑募中路遊擊中營三百人前往鎮懾又總兵楊昌魁所統東路正副兩營係將銅仁鎮遠調省練軍各兩哨並都司宋秀廷添募之兩哨聯合而成現鎮遠兩哨派紮興義縣名爲中路遊擊前營宋廷秀兩哨分紮都司府名爲東路練軍中營均未移因飭楊昌魁另募苗兵四百名合之銅仁兩哨仍名東路練軍正副營交該鎮率領由羅斛沿江上赴興義縣商同各處原駐防軍渡河會剿准廣西提臣蘇元春電稱已派黃鎮忠立率熙字四營春字五營沿紅各河十日子至白樂與黔軍會剿此次如切實辦理淨絕游匪根株邊境倘獲謐安卽當將新增各營斟酌裁減以節餉糈所有續添防勇一營四哨緣由除咨戶兵部查照外謹附片具陳伏乞 聖鑒謹 奏奉 硃批該部知道欽此

頭品頂戴江蘇巡撫奴才恩壽跪 奏爲蘇省遵鑄銅圓解京用過成本運脚各費請抵釐金京餉恭摺仰祈 聖鑒事竊准戶部咨奉 上諭近來各省制錢缺少不敷周轉前經福建廣東兩省鑄造銅圓輪廓精良通行市肆民間稱便近日江蘇仿照辦理亦極便利並可杜私鑄私銷之弊著沿江沿海各省督撫籌款商辦卽就各該省搭鑄通行至京師制錢亦應照辦著福建廣東江蘇等省將所鑄銅圓趕緊各

擊並調該軍營務處楊慕時率各營由東荒西援適蚌河川賊王朋等股敗竄撰山黑山巢突防其糾合
亟飭堵剿於大哈拉道口元寶山疊嶺李發科等賊目多名賊突過老河路由赤峰而入西圍即調赤幫
帶馬隊營官尙鴻恩會勦於杜家地桑桂川等處時賊復裹脅至三百餘人正圍義合公鍋鋪出其不意
被官軍夾攻傷斃四十餘賊生擒十一賊奪賊馬百十四匹無煙鎗十餘桿毛瑟鎗六桿奪回被綁鄉民十
五人餘賊由長漢溝竄西圍奴才因首賊兇脫仍責前敵各將領務獲旋於八月十九日據楊慕時督飭
副營官汪正綱左營官陳春廷追逼賊由圍竄向多偏研界之向岔香磨賊尙八九十名據北大山列陣
抗拒悍賊施繼莖在山顶指揮被官軍擊斃左營弁孫文紹亦陣亡衆兵猛進羣賊始驚潰於陣生擒匪
首佟洛疙疸卽佟守仁及悍黨佟守志等十五名解該營及平泉州會訊明確經奴才電飭一併正法在
案該股匪自口內圍竄追奔八百餘里始得就擒狡悍已極此剿平佟洛疙疸等一股及擒匪首之實在
情形也又賊首王朋盧發白洛疙疸等股均係多年積匪今復南援朝建等縣敖漢土默特各蒙旗被害
尤甚八月中經馬隊副營官汪正綱剿敗於東荒率夥百餘人遠遁邊界沙坂子山內九月初經前營官
尹德盛追賊於沙坨子等處斃賊極多我軍陣亡什長正兵二人於十月十四等日始據各營稟報將王
朋盧發及其餘匪目一併陣擒緝獲復於十一月十八日電稟又將著名匪首白洛疙疸拿獲均經訊明
電飭正法此剿拿匪首王朋等各股之實在情形也此外八月間有圍場竄匪一股約賊百餘人經張玉
春痛剿於西圍斃賊甚多獲快鎗號坎多件賊馬四十四匹陣擒賊目黃起於軍前斬訖我兵傷四人餘匪
無多逃入圍內復經佐領榮陞等帶兵沿邊搜捕拿獲多名計自八月以來除拿獲佟洛疙疸郭大蟻王

朋等著名大股賊首外前後計由總兵楊玉書及旗練各營縣稟報除陣斃不計外統共殲賊一百三十五名均會訊明確照章就地正法各在案現經奴才嚴飭營縣趁此兵威羣賊解散之際趕緊搜捕勿稍鬆勁並曉諭民間不准私藏賊匪鎗烏俾易查拿至朝陽花子溝已平其建昌朝陽及土默特貝勒旗等處降隊業經會商提臣馬玉崑分飭營縣妥速遣散以除隱患而靖地方堪以仰副 聖主軫念邊陲之至意據楊玉書等彙案咨呈前來奴才伏查該員弁此次剿辦各股著匪尅期擒獲積年悍目大小十餘戰實係軍營異常出力合無仰懇 天恩俯准照章給獎以昭激勸而勵戎行其打仗陣亡弁兵應俟查明彙案奏請 敕部優卹出自逾格 鴻施除拿獲郭大蟻等匪出力之武衛左軍統帶副將孫多慶等業由提臣馬玉崑另案奏保並其餘出力文武各員仍歸彙案請獎外所有剿平積年悍匪及籌辦地方情形並擇尤開單請獎緣由理合恭摺具 奏伏乞 皇太后 皇上聖鑒訓示謹 奏奉 硃批着照所請該部知道單片併發欽此

松壽片 再據武衛左軍統帶右路等營副將孫多慶統帶先鋒馬隊遊擊趙調營務處同知于振江知府用建昌縣知縣羅毓祥會稟巨匪郭大蟻一股係積年渠魁於五月間糾賊數百與佟守仁合股竄擾圍場平泉豐寧一帶拒斃武弁練總胆敢竄入口內勾匪張紅果綁劫員弁焚掠遷撫臨榆等縣勢甚鴟張經該軍與該縣督練疊次追剿敗散該股尙有數十人竄至建屬砂果子溝經該縣練董舉人李沐霖練總文童孫廷弼等探報該軍會捕圍攻多時斃賊十餘名奪賊鎗馬多件該匪首受傷突圍兔脫逃匿臭肚子溝養傷復經李沐霖偵明帶茶棚等三鄉練勇往捕出其不意將匪首郭大蟻擒獲其悍目劉景

漚逸匪修贊等亦經該縣督練會營疊獲送縣均經奴才電飭訊明正法並傳首平泉等處被害地方以昭炯戒在案除統帶武衛右軍右路等營副將孫多慶等業經提臣馬玉崑專案奏保外奴才伏查建昌縣知縣羅毓祥督飭練董李沐霖等不動聲色殲厥渠魁並隨同防營擒獲悍賊多名洵屬異常出力自應按照軍營異常請獎以示鼓勵而資觀感知府用建昌縣知縣羅毓祥擬請俟歸知府班後賞加三品銜練董同知銜候選知縣李沐霖擬請免選本班以知州不論雙單月儘先即選並賞加四品銜文童孫廷弼擬請以巡檢不論雙單月儘先選用附生王鎮寰李潤霖均擬請以縣丞不論雙單月選用合無仰懇天恩俯准照擬給獎以爲團練剿賊奮勉者勸是否有當出自逾格鴻慈謹附片具陳伏乞

聖鑒訓示謹奏奉 硃批覽欽此

河南巡撫兼管河工事務臣張人駿跪 奏爲體察豫省情形所有兵力實在不敷分布現擬添練常備一軍以資鎮攝而衛地方恭摺瀝陳仰祈 聖鑒事竊照接管卷內前准政務處咨光緒二十七年七月三十日欽奉 上諭著各省將軍督撫將原有各營嚴行裁汰精選若干營分爲常備續備巡警等軍一律操習新式鎗砲認真訓練以成勁旅等因欽此仰見 聖謨深遠力圖自強跪誦之餘莫名欽悚臣維修明武備實今日切要之圖自庚子以後豫境四通八達門戶洞開不但毗連七省盜賊票匪出沒靡常卽內地教堂逐漸添增各國教士絡繹於途在在均須保護近值南幹鐵路接築已至確山北幹鐵路插標已近邊界臣適奉 恩命督同經理派兵照料彈壓必須有一支得力勇隊方保無虞又兼河北一帶福公司經營路礦外來土工千百成羣動輒與居民齟齬且不免勾結生事以目前大局與將來布置而

論非歷任撫臣所及料亦與升任撫臣錫良在任時所值不同若兵力太單殊覺補苴罅漏無臨事應變之資啓外人輕侮之漸此揆時度勢必須添練常備一軍之實在情形也查本省原有豫正各軍十四營合之制兵加練及陸續添募精銳捷勝等營計共有三十九營一隊之多節因餉絀之故兩次遣撤八營本年春間升任撫臣錫良以新約賠款數鉅期迫無法可籌又裁十營一隊以紓騰挪之力曾經奏明在案至未裁各軍隊練軍七營不計外儘有豫正及精銳等軍十四營尙稱得力均仍擇要分紮而其實幅員太廣事機日多縱臨時更調巡防究不免顧此失彼况分紮各屬距省較遠操練稽察勢難逐細講求節經與司道悉心商確原駐分防各營暫勿移動將來練爲續備巡警等軍省城祇有精銳兩營既嫌空虛亦難策應擬再添練五千人分爲步隊六營馬隊兩營砲隊兩營合計十營應卽恪遵 明諭作爲常備一軍無事則專力勤操有事則更番調遣將來訓練嫻熟本省分布固較周密設有緩急亦可備援剿之用如蒙 俞允容由臣詳悉斟酌略仿武衛右軍先鋒隊營制餉章其一切未盡事宜隨時奏咨辦理至練兵必先籌餉通計改習新操之軍裝器械招募成軍之員薪勇糧以及津貼卹賞等費均屬不資明知部庫同一艱窘焉得有大宗鉅款率請動支亦惟督同藩司就地妥籌勉爲其難倘實在偶有不敷祇可通融裁挪先其所急總期練成勁旅有備無患以仰副 聖主宵旰憂勤整軍經武之至意所有豫省目前防營不敷分布擬添練常備一軍並聲明就地籌款各總由除分咨查照外謹恭摺具陳伏乞 皇太后 皇上聖鑒訓示施行謹 奏奉 硃批著照所請該部知道欽此

頭品頂戴調補浙江巡撫安徽巡撫臣聶緝渠跪 奏爲安徽省沿江洲地已飭認真查丈八柱包課業

之處一併詳明查辦一面嚴杜豪強霸佔吏胥舞弊容俟該司飭具清冊委員分赴會文明確詳復到日再行酌量飭遵隨時 奏報所有皖南荒地臣於本年夏間閱兵回署經通飭各屬趕緊確查分別有主無主妥議開墾各該州縣先後稟報臣隨時批飭有報數過少駁令復查者有因農工未畢須俟秋後察辦者統俟查報齊全歸入另案辦理至桐城崇文洲地本係敬敷培文兩書院公產敬敷書院租課因由錢劉兩姓八柱包收以致積弊叢生本年六月間據署安慶鳳知府石鎮諭飭舉人王源瀚前往勘丈報墾酌增租錢一律改歸正紳經管永革八柱名目議章通詳已由臣批司核飭遵辦在案是八柱名目先已革除無慮吞蝕各署吏胥亦無把持自可毋庸再議除將沿江洲地認真飭確查辦外理合先將大略情形恭摺由驛復陳伏乞 皇太后 皇上聖鑒謹 奏奉 硃批知道了欽此

頭品頂戴署兩江總督臣張之洞江蘇巡撫臣恩壽跪 奏為查明江蘇省各屬地方民力尙能支持來春似可無庸接濟恭摺由驛復陳仰祈 聖鑒事竊臣等接准軍機大臣字寄光緒二十八年十月初三日奉 上諭本年四川南充等州縣災區甚廣欽奉 慈禧端佑康頤昭豫莊誠壽恭欽獻崇熙皇太后懿旨撥銀三十萬兩交該督核實振濟並准將新舊捐輸酌量減免復因冬振春撫為日方長非有鉅款不足以資接濟准開辦減成振捐俾資急用又諭令將義振餘款十二萬兩儘數撥解該省開辦冬振以惠窮黎惟念來春青黃不接之時民力未免拮据著傳諭該督撫等體察情形如有應行接濟之處即查明據實復奏務於封印前奏到俟新正降旨加恩此外各該省有無被災地方應行調劑撫恤之處著該督撫等一併查奏候旨施恩欽此即經恭錄行司欽遵查辦伏查本年江甯蘇州等屬入夏以來雨降愆

期高阜田地缺雨滋培禾豆維糧間有受傷其低窪之區復因湖河湖水泛漲被淹受傷收成均屬歉薄
經各屬查勘稟報現擬將應徵新舊錢糧漕米查明分案 奏請量予蠲減緩振以紓民困惟詳加察看
目前情形民力尙可支持來春似可無庸接濟臣等仍隨時體察如有應行撫恤之處自當由外設法籌
辦加意撫綏以仰副 聖主軫念民依之至意茲據江甯布政使李有棻蘇州布政使陸元鼎具詳前來

除咨部外謹合詞恭摺由驛復 奏伏乞 皇太后 皇上聖鑒謹 奏奉 硃批知道了欽此

魏光燾跪 奏爲滇省遵 旨創設學堂謹將開辦情形恭摺具陳仰祈 聖鑒事竊光緒二十八年十

月十四日准京師大學堂咨七月十二日奉 上諭張百熙奏遵擬學堂章程開單呈覽一摺披閱各項

章程尙屬詳備卽照所擬辦理並頒行各省著各該督撫按照規條寬籌經費實力奉行總期造就真才

以備國家任使其京師大學堂著實成張百熙悉心經理加意陶鎔樹之風聲以收成效期副朝廷興學

育才之至意開辦之後如有未盡事宜應行增改仍著隨時審酌奏明辦理欽此等因刊印 欽定章程

咨滇遵辦前來查此案前奉 上諭各省所有書院於省城均設大學堂各府廳直隸州均改設中學堂

各州縣均改設小學堂並多設蒙養學堂著各省督撫學政切實通飭認真舉辦等因欽此當卽欽遵行

飭藩司仿照山東省籌議章程詳經臣覆加查核飭行在案茲復欽奉前因自應卽行開辦舉其大要約

有四端一曰籌費備用滇本邊瘠之區財力近益奇絀此學堂直合家塾羣庠術序一以官力辦之事繁

費鉅僅取辦於原省各書院經費萬不敷用庫款則實無可籌擬若遽安於苟簡又無以善始圖成一再

商籌官紳會議查有鹽捐圖費提購鎗砲款內每年暫可勉強挪銀十萬兩作爲經費當經會商前撫臣

李經羲 奏明在案擬即照捷按年以五萬兩辦理省會官立高等學堂以五萬兩辦理各屬官立之小學堂及蒙養學堂其各府廳州官立之中學堂及擬設之校士館則以各書院原有各經費循支將來逐漸擴充或有不敷現時容可勉爲挹注且以保衛地方之款移爲培植人才之需名義正大尤可持諸永久一曰度地建堂省會書院有三曰經正曰育財曰五華經正三面臨水育才近市湫隘皆難擴充惟五華規模宏敞其後直接五華山上有憫忠廢寺四旁隙地甚多臣等臨踏勘極爲高曠頗通空氣諸山列秀滇海環流林木葱蘢水泉甘美以之拓爲高等學堂凡屬應造之禮堂講堂食堂寢室樓院及應備體操場布置均有餘地足以疏濬性靈開拓心胸洵爲名勝之區允叶文明之兆前經臣飭司會同委員估勘擬新建講堂二所左右齋舍三十六間儀器院樓房一院並於五華書院改修講堂五所暨齋舍九十餘間作爲自修室以備先行開辦所奉 頒發章程建置均有程式自應遵辦以宏規制而昭劃一一曰預儲師資兩漢經學最重師承况學堂將以培養通才儲濟時彥授受之際尤關緊要自科舉盛而真儒少求其淹貫中學者已不易得兼通西學者尤難其選憶每念此輒以爲慮查近日學校之盛同州者宜推日本以其無論何科首以倫理爲重兼採東西政藝均能刪繁就簡遺粗取精頗堪則效臣已於通省舉貢生監中考選心術端正文理明達之錢良駿等十名委員資送日本分科肄業並另照京師大學堂來咨按其格式考選舉人袁嘉穀等五名資送師範館肄業俟學成回滇發充教習並另設課吏館以爲在學之先導均經 奏明在案雖備用非在目前然三年之艾不蓄不得況即欲求速而勢亦有所不能一曰購書器蕭何收圖籍而知阨塞故古人讀書圖史並重西人各種學業凡夫天地之大動植之繁有